

20

93



~~Handwritten scribble~~

0074

Fast  
ff

00

Der Prophet Jona / aus-  
gelegt durch Mart. Luth.



St. Joh. Bapt. 1711  
Geistl. Rathh. K. K.



## Vorrede auff den Propheten Jona.

**W**Eyl der welt furst seyn vnkraut allenthalben geseet hat/das deudschland vol rotten vnd geyster worden ist/durch wilche er nit alleine viel verfuert/sondern auch den ienigen so bestendig bleyben/viel vnnutzer geschafft zufugt/damit er sie aus der schrift reysse/vnd ynn sein gezencke menge/vnd also zu letzt mit solcher list/aussen der schrift vbunge/ynn gezeng erbassche vnd vmbbringe. Ist vns wol von nöten/das wyr seynes listigen vnd schalckhafftigen anlauffs warnemen/vnd vns nicht zu weyt besgeben ynn seyn zankspiel/auff das er vns nicht aus vnser wehre vnd burg locke vnd also erschleyche. Denn wyr wissen wol/spricht S. Paulus/was er ynn synn hat. So spricht S. Petrus/Er feyre nicht/sondern schleyche vmb vns her vnd suche/wilchen er verschlingen muge. Derhalben nu ich mich eyne zeyt her/mit disen geystern vnd rotten wol geschlagen vnd versucht habe bis das andere auch dazu komen sind/wil ich eyn mal widder yn die schrift/vnd vnser hertzen widerumb weyden/stercken/trösten vnd rusten/das wyr nicht zu müde vnd lass werden vber dem teglichen kempffen/so viel myr Gott gnade verleyhet/das wyr durchs wort Gottes vnd trost der schrift erquickt deste frischer vnd mütiger werden mehr zu kempffen.

Nicht alleyne aber vmb der geyster vnd rotten willen/thu ich solchs/damit vns der teuffel zur rechten seyten angreyfft/sondern auch vmb der tyrannyen willen/damit er vns zur lincken angreyfft. Denn die tollen fursten vnd Bischoffe durch yhrs gotts reytzung mit gantzem ernst wüeten vnd toben/vnd schlechts ym

A ij chts ym

chtsym synn haben / Gott vnd seynen gesalbten zu  
vertreyben vnd seyn wort zuuertilgen / Vnd schon viel  
vnschuldigs bluts vergossen / vnd zuuergiessen mit al  
ler macht eylen / das wyr vns wol mügen rhümen / die  
Christenheit stehe vnd gehe itzt ym rechten schwanc  
weyl sie zu beyden seyten so hart wird angetastet / vnd  
dazu von beyden teylen so schendlich verflucht / geles  
stert / geschendet vnd gehönet wird / als sie villeycht  
noch nie gelestert vnd geschendet ist worden / das  
mich dunckt / der teuffel versuche sein hochstes / vnd  
weyl er sich des iungsten tags versihet / wil er zur letze  
alles sein vermügen beweysen an Christo vnd seinem  
wort. Gegen dem allen ist vns auch widerumb trosts  
von nöten / das wyr dafür nicht erschrecken / sondern  
vnuerzagt yhr dreyen / trotzen vnd toben verlachen /  
als gewis / das sie damit vns auffs aller höhist fod  
dern zum hymel / vnd yhn selbst den hals auffs eylen  
dest ablauffen / das sie durch Gottis gericht ia balde  
zu aschen werden. Es ist vmb ein augenblick zuthun /  
so wollen wyr vns anders mit eynander ansehen /  
vnd sol der teuffel erfahren mit seinen laruen / das ist /  
mit seinen fürsten vnd bischossen / wer die sind die sie  
itzt / lestern / veriagen vnd erwürgen.

Darumb hab ich disen heyligen propheten Jo  
na für mich genommen / auszulegen / als der sich zu dis  
sen sachen fast wol reymet / vnd eyn trefflichs / sonder  
lichs / tröstlichs exempel des glaubens / vnd ein gros  
mechtigs wunderzeychen gottlicher guete / aller welt  
für tregt. Denn wer solt Gott nicht von hertzen traw  
en / vnd widder alle teuffel / welt vnd alle rasende ty  
rannen hohmütiglich trotzen vnd stoltz sein auff Got  
tis guete? wenn er dis exempel bedenckt / das Gotts  
gewalt vnd gnade / so viel vermag / das sie Jonan /  
mitten ym tieffen meer / dazu mitten ym walfisch / das  
ist / nicht

ist/nicht ynn eynerley/sondern vielerley tod/von allen menschen/von allen creaturn verlassen vnd vnbeskand/so leychtlich erhelt/vnd widder bringt/als sey es yhm keyne mühe/vnd richt solchs nur mit eym wort aus/als solt er vns sagen/Sihe/das thu ich mit eym wort/was meynstu das ich kund thun mit meynem geyst vnd krafft? so doch menschlichem hertzen vnbegreyfflich ist/das eyn grösser werck geschehen müge denn das ist. Darumb auch Christus selbs viel von disem geschicht helt/vnd fur allen propheten disen Jona anzeucht/als ein beyspiel seynes todes vnd aufferstehunge/da er sagt Matt. xij. Dieser art wird keyn zeychen widderfaren/on das zeychen Jonas des propheten. etc.

Dazu ist er auch eyn trost aller/so das wort furen sollen/das sie nicht verzweyffeln sollen an der frucht des Euangellij/wie fast es auch sich vbel anleest vnd nicht scheynet/das es viel frucht vnd nutz bringe. Denn hie wird eyn eyntzeler man Jona gesand zu dem aller mechtigisten Könige vnd grössstem reich/da zumal aufferden/Das so mans gegen ander ansihet/was Jona ist gegen dem Könige/eyn lauter spot vnd vnmüglich ding anzusehen ist/das so ein mechtiger König/vnd so ein grosses reych sich solt bewegen/beke- ren vnd erschrecken lassen/von eynes eynigen gerins- gen/dazu frembden menschen wort vnd von eyner predigt/die doch der König selbs nicht höret/sondern nur das gerüchte dauon vernam/das ich mag sagen/ Es hat keyn Apostel noch prophet/noch Christus selbst mit eyner predigt so gros ding gethan vnd auss- gericht/als Jona. Vnd ia so gros wunder ist/odder wol grösser/das Jona die stad Nineue bekeret mit eyner predigt/als das er aus des walfischs bauch er-  
A iij löset ist.

erlöset ist. Denn gleych wie der walfisch durch gotts wort muste Jona ausspeyen / also hat auch Jona durchs wort Gotts die stad Ninene / aus dem bauch vnd rachen des teuffels / das ist / aus den sunden vnd tod gerissen. Solt nicht eyn solcher König sich verlassen auff seyne grosse macht / vnd den eynigen man für eynen lägener halten / wilchem doch seyne Ebreer selbst nicht gehorchten? Vnd die Aposteln gleych wie Christus selbst / so schendlich verachtet worden von den Königen vnd fürsten auff erden Psalm. ij. Vnd noch itzt fürsten / bischoffe vnd herrn sind / die gegen dem König zu Ninene rechte betler sind / dennoch auff yhren bettelsack sich so hoch verlassen / das sie nicht alleyn das wort Gotts verachten / sondern auch verfolgen.

Darumb furet auch Christus Matth. xi. die Nineuiten erfur / widder alle vngleubigen vnd verachter seynes worts / vnd spricht / Die leute zu Nineue werden am iungsten gericht aufftreten / vnd dis geschlecht verdammen / Denn sie busseten durch die predigte Jona / Vnd sihe / Die ist mehr denn Jona. Vnd das ist auch nicht vnbillich / Denn es yhe eyn gros wunder ist / das sich die Nineuiten so bald bekereten / vmb eynes frembden predigers willen / durch eyn schlecht wort / on alle wunderzeychen / Vnd diese bekeren sich nicht durch yhren eygen heyland / der so viel prediget thut / vnd mit wunderzeychen sie gleich vberschuttet. O wilche eyne schande ist das itzt zu hören / Aber wilche eyne schande wird es seyn / wenn mans nur auch sehen wird. Aber es hilfft nicht / sie sind vnd bleyben verstockt / Darumb lassen wyr sie faren / vnd nemen vnsern trost vnd nutz aus diesem Propheten / so viel vns Gott gonnet. A M E N.  
Der Prophet



# Der Prophet Jona.

## Das Erst Capitel.



**I** geschach das wort  
des **HERRN** zu Jona dem son  
Amithai vnd sprach / Mach dich  
auff vnd gehe ynn die grosse stad Ni-  
neue / vnd predige drynnen / Denn  
yhre bosheyt ist erauff kommen fur  
mich. Aber Jona macht sich auff zu fliehen fur dem  
**HERRN** auff's meer vnd zoch hynab gen Japho/  
vnd da er eyn schiff fand das auff's meer wolt faren/  
gab er fehrgelt vnd trat dreyn / das er mit yhnen auff's  
meer fure fur dem **HERRN**.

Da lies der **HERR** eynen grossen wind auff's  
meer komen / vnd hub sich eyn gros vngewitter auff  
dem meer / das man meynt / das schiff wurde zu-  
brechen. Vnd die schiffleute furchten sich vnd schry-  
en / eyn iglicher zu seynem gott. Vnd wurffen das ges-  
redte / das yhm schiff war / yns meer / das es leychter  
wurde. Aber Jona war hynuntern ynn das schiff ge-  
stiegen / lag vnd schlieff. Da trat zu yhm der schiff-  
man vnd sprach zu yhm / Was schleffestu? stehe auff/  
russe deynen Gott an / ob villeycht Gott an vns ges-  
dencken wölte / das wyr nicht verdörben.

Vnd eyner sprach zum andern / kompt / wyr wol-  
len lassen / das wyr erfahren / vmb wilchs willen es vns  
so vbel gehe. Vnd da sie losseten / traffs Jonan. Da  
sprachen sie zu yhm / Sage vns / warumb geht es vns  
so vbel? was ist deyn gewerbe? vnd wo kompst her/  
aus welchem

aus wilchem lande bistu? vnd von wilchem volck bistu? Er sprach zu yhnen / Ich byn eyn Ebreeer vnd furchte den **HERRN** Gott von hymel / wilcher gemacht hat das meer vnd das trocken. Da furchten sich die leute seer / vnd sprachen zu yhm / Warumb hastu denn solchs gethan? Denn sie wusten / das er fur dem **HERRN** flohe / denn er hatte es yhnen gesagt.

Da sprachen sie / was sollen wir denn mit dyr thun / das vns das meer stille werde? Denn das meer wuetet. Er sprach / Nemet mich vnd werfft mich vns meer / so wird euch das meer stille werden / Denn ich weys / das solch gros vngewitter vber euch kompt vmb meynen willen. Vnd die leute trieben / das sie widder zu land kemen / aber sie kundten nicht / denn das meer fur vngestum widder sie. Da riefen sie zu dem **HERRN** vnd sprachen / Ah **HERR** las vns nicht verderben vmb dieses mannes seele willen / vnd rechne vns nicht zu vnschuldig blut / Denn du **HERR** thust / wie dyrs gefellet.

Vnd sie namen Jona vnd wurffen yhn vns meer / Da stund das meer still von seynem wueten. Vnd die leute furchten den **HERRN** seer / vnd thetten dem **HERRN** opffer vnd gelubde. Aber der **HERR** verschafft eynen grossen fisch / Jona zuuerschlingen. Vnd Jona war ym leybe des fisches / drey tage vnd drey nacht.

### Das ander Capitel.

**U**nd Jona bettet zu dem **HERRN** seynem Gotte ym leybe des fisches vnd sprach.

Ich rieff zu dem **HERRN** ym meiner angst / vnd er antwortet myr / Ich schrey aus dem bauche der hellen / vnd du hoerest meyne stym. Du

Du warffest mich ynn die tieffe mitten ynn meer/  
das die flut mich vmbgaben/ Alle deyne wogen vnd  
wellen giengen vber mich.

Das ich gedacht/ich were von deinen augen ver-  
stossen/ Ich worde deynen heyligen tempel nicht  
mehr sehen.

Wasser vmbgaben mich bis an mein leben/die  
tieffe vmbbringete mich/Schilff bedeckte meyn heubt.

Ich sanck hynvntern zu der berge grunde/Die  
erde hatte mich verriegelt ewiglich/ Aber du hast  
meyn leben aus dem verderben gefurt/ **HERR**  
meyn Gott.

Da meyne seele bey myr verzagt/ gedacht ich an  
den **HERRN**/ Vnd meyn gebet kam zu dyr ynn  
deynen heyligen tempel.

Aber wilche sich verlassen auff eytelkeit vergebs-  
lich/Die lassen barmhertzigkeit faren.

Ich aber wil mit danck opffern/meyne gelübde wil  
ich bezalen dem **HERRN**/das myr geholffen ist.

Vnd der **HERR** sprach zum fische/vnd der  
selb speyet Jona aus ans land.

### Das dritte Capitel.

**U**nd es geschach das wort des **HERRN** zum  
andern mal zu Jona vnd sprach/ Mach dich  
auff/gehe ynn die grosse stad Nineue vnd predige yhr  
die predigt die ich dyr sage. Da macht sich Jona auff  
vnd gieng hyn gen Nineue/wie der **HERR** gesagt  
hatte. Nineue aber war eyne stad Gottis/drey tage  
reysse gros. Vnd da Jona anfieng hynen zugehen ey-  
ne tage reysse/predigt er vnd sprach/Es sind noch vi-  
ertzig tage/so wird Nineue vmbgekeret. Da glaubten  
**B** die leute

die leute zu Nineue an Gott/vnd lieffen predigē/ man  
solte fasten. Vnd zogen secke an/beyde gros vnd kleyne

Vnd da das fur den kōnig zu Nineue kam/ stund  
er auff von seynem thron/ vnd legt seyne purpur ab/  
vnd hullet eynen sack vmb sich/ vnd satzt sich ynn die  
asschen/ Vnd lies ausschreyen vnd sagen zu Nineue  
aus befehl des kōniges vnd seynere gewaltigen also/  
Es sol widder mensch noch thier/ widder ochsen  
noch schaffe etwas kosten/ vnd man sol sie nicht weys  
den/ noch wasser trincken lassen/ vnd sollen secke vmb  
sich hüllen beyde menschen vnd thier/ vnd zu Gott  
ruffen hefftig/ Vnd ein iglicher bekere sich von seinem  
bösen wege vnd vom freuel seynere hende/ Wer weys  
Gott möcht sich bekere vnd rewen/ vnd sich wend  
den von seynem grymmigen zorn/ das wyr nicht ver  
derben.

Da aber Gott sahe yhre werck/ das sie sich bekere  
ten von yhrem bösen wege/ rewete yhn des vbels/ das  
er geredt hatte yhnen zu thun/ vnd thets nicht.

### Das vierde Capitel.

**D**As verdros Jona fast seer vnd ward zornig/  
vnd bettet zum **HERRN** vnd sprach/ Ach  
**HERR** das ists/ das ich sagt/ da ich noch ynn mey  
nem lande war/ darumb ich auch wolte zuuoer kōmen  
zu fliehen auffss meer/ denn ich weys/ das du gnedig/  
barmhertzig/ langmütig vnd von grosser guete bist/  
vnd lest dich des vbels rewen/ So nym doch nu **HE**  
**RR** meyne seele von myr/ denn ich wolt lieber tod  
seyn denn leben. Aber der **HERR** sprach/ Meynstu  
das du billich zornest?

Vnd Jona gieng zur stad hynaus/ vnd satzt sich  
gegen

gegen morgen werds der stad / vnd macht yhm das  
selbs eyne hütten / da satzt er sich vnter ynn den schat-  
ten / bis er sehe / was der stad widerfahren wurde.

Der **HERR** aber verschaffte eyne wilde rüben /  
die wuchs vber Jona / das sie schatten gab vber seyn  
heubt / vnd ergetzt yhn ynn seynem vbel / Vnd Jona  
frewet sich seer vber der wilde ruben . Aber der **HERR**  
verschaffte eynen wurm / des morgens da die  
morgenröte anbrach / der stach die wildenrube das  
sie verdorrete / Als aber die sonne auffgangen war /  
verschaffte der **HERR** eynen durrenden ostwind /  
vnd die sonne stach Jona auff den kopff / das er matt  
ward . Da wunscht er seyner seelen / den tod / vnd  
sprach / ich wolt lieber tod seyn denn leben.

Da sprach Gott zu Jona / Meynstu / das du bil-  
lich zurnest vmb die wildenrube? Vnd er sprach / billich  
zorne ich bis an den tod . Vnd der **HERR** sprach /  
Dich iamert der wildenrube / daran du nicht geerbey-  
tet hast / hast sie auch nicht auffgezogen / wilche ynn  
eyner nacht ward / vnd ynn eyner nacht verdarb /  
Vnd mich solt nicht iamern Ninene solcher grossen  
stad / ynn wilcher sind mehr denn hundert vnd zwens-  
tzig tausent menschen / die nicht wissen vnterscheyd /  
was recht odder linck ist / Dazu auch viel thiere ?

**D**isen Propheten Jona wollen etlich halten / wie Hie-  
ron. zeygt / er sey der widwyn son gewesen zu Zarpach  
bey Zidon / die den Propheten Elia neerete zur theuren zeyt /  
ym ersten buche der Könige cap. xvij. vnd Luce. iij. Nemen  
des ursache / das er hie sich selbst nennet / Eyn son Amithai /  
das ist / ein son des warhafftigen / weyl seyne mutter zu Elia  
sprach / da er yhn vom tod erwecket hatte / Tu weys ich / das  
die rede deynes munds warhafftig ist. Das glaube wer da  
B ij wil / ich

wil/ich gleubs nicht/ Sondern seyn vater hat Amithai ge-  
heysen/auff latinisch verax/auff deudsch/warlich/ Vnd ist  
gewesen von Gath Hopher/wilche stad ligt ym stamm Se-  
bulon/Josua.xix.Denn also steht geschrieben am.xiiij.capitel  
ym andern buche der Könige/ Der König Jerabeam brachte  
widder erzu die grenze Israel von Hemath an bis ans meer  
ym blachen felde/nach dem wort des Herrn des Gottes Is-  
rael/wilchs er geredt hatte durch seynen diener Jona/den  
son Amithai den Propheten von Gath Hopher.Auch so war  
die widwyn zu Zarpach eine Heydin / wie Christus auch mel-  
det Luce.iiij. Aber Jona bekennet hie cap.i er sey ein Ebreeer.

Das sage ich darumb/denn wo mans haben kan/ists  
fast gut/das man wisse/wilche zeyt/vnd ynn wilchem lande  
ein Prophet gelebt vnd gewesen ist/denn es hilfft wol dazzu/  
das man seyn buch verstehen müge/wenn man/zeyt/stete/  
person/vnd geschichte weys/die sich dazumal begeben ha-  
ben. So haben wir nu/das dieser Jona gewesen ist zur zeyt  
des Königes Jerabeam / wilches gros vater war der König  
Jehu/zu wilcher zeyt/ der König Usia ynn Juda regierte/ zu  
wilcher zeyt auch gewesen sind ynn dem selbigen Königreich  
Israel die Propheten/Hosea/ Amos/ Joel/ an andern orten  
vnd stedten.Daraus man wol nemen kan/ wie eyn trefflich  
er/thewrer man/diser Jona ynn Königreich Israel gewesen  
ist/vnd Gott gros ding durch yhn gethan hat / Nemlich  
das durch seyne predigt/ der König Jerabeam so gluckselig  
war/vnd gewan alles widder/was Hasael der König zu Sy-  
rien hatte dem Königreich Israel abgeschlagen/vnd so gros-  
sen schaden gethan/das auch der Prophet Elisa düber wey-  
net zuuor ehe es geschach cap. viij. ym andern buche der Kö-  
nig/Vnd dennoch Gott solche wolthat beweysete/vnange-  
sehen/das das Königreich Israel noch ymer abgöttisch war/  
vnd neben Gott/gleichwol die gulden kelber zu Samaria  
anbettet. So gros gnade ists/ wo Gott einen man cym lan-  
de gibt mit seynem wort/ das er vmb desselbigen willen/cym  
ganzen

ganzen lande nicht alleyn vertregt die missethat vnd vnges  
horsam / sondern auch hilfft vnd wolthat erzeyget / vber  
schwenglich / was solt er nicht thun vnd lassen / wo mehr  
denn eyn göttlicher mensch ist :

Ob nu dis geschichte Jona zu Nineue vnd ym wal  
fische sey geschehen / ehe denn er dem Könige Jerabeam so ret  
tig vnd hilfflich war / odder hernach als er widder von Ni  
neue komen ist / kan man nicht anzeygen aus der schrifft /  
Gleublich ist aber / das er zuuor dem Könige Jerabeam ynn  
seym lande gedienet vnd geholffen hat / bis er das Königreich  
Israel widder auffgericht vnd angericht hat / darnach ist er  
ferner gen Nineue / ausser seynem lande von Gott geschickt /  
Denn ynn seynem lande / hat er gelernt mit erfahrung / wie  
Gott so gütig vnd gnedig war vber das abegöttisch König  
reich Israel / Derhalben er sich auch wol versach / er würde  
vber Nineue auch so gütig vnd gnedig seyn / das seyne pre  
digt wurde vmb sonst vnd vergeblich seyn / wie er denn selbst  
bekennet vnd drüber zurnet. cap. iij.

Summa / so ist gestanden ynn der welt zu der zeyt Jo  
na / Das vberst reich odder Keyserthum ynn der welt / war  
ynn Assyria zu Nineue / wie es hernach zu Babylon / vnd dar  
nach zu Roma gewesen ist . Daneben waren nu die andern  
Königreiche / als Syria / Israel / Juda / Edom / Moab / eyn ig  
lichs fur sich . Vnd das Königreich Israel stund nu wol vnter  
dem Könige Jerabea vmb Jonas willen / so stund das König  
reich Juda auch wol / vnter dem Könige Osia / Aber das war  
die letze vnd der Johannes segent / den Gott dem Königreich  
Israel gab . Denn nach dem tod Jerabeam / da sich das volck  
gar nichts besserte / noch von abegötterey ablies / wider durch  
straffe noch durch wolthat / zefiel das Königreich / mordet  
ymer eyn König den andern / bis der Keyser von Assyrien kam /  
vnd zurstöret beyde Syriam vnd Israel / vnd furet sie weg /  
das sie noch heutes tages nicht sind widder komen / wie das  
letzte capitel ym andern buch der Könige zeuget . Weyl nu fur

B iij handen

handen war solch gros vnglück vnd zerstörung des ganz  
en Königreichs / vmb des volcks sünde willen schickt Gott  
zuor seyn wort durch seyne Propheten / vnd lest sie warnen /  
auff das sie sich bekeren / odder doch ia etliche errettet vnd  
behalten werden.

Denn so pflegt Gott ymerdar zu thun / wenn seyn grosser  
zorn fur handen ist / das er zuor seyn wort schickt vnd etliche  
errettet / Also schickt er Noa fur der sindflut / Loth ehe denn  
er Sodom versenckt / Abraham / Isaac / Jacob / ehe er das  
land Canaan verderbt / Joseph vnd Mosen / ehe er Egypten  
schlug / Also auch hie Jonan vnd Hosea / ehe er Israel zerstö  
ret / Vnd Jonan / ehe er Nineue wolt umbkeren. Also hat er  
auch Christum seynen son selbs ynn die welt gesand / ehe denn  
der letzte zorn des iungsten gerichtes kompt. Aber nach Chri  
stus tod ward nicht alleyn Jerusalem / sondern Rom / vnd  
der ganz Römisch kreys vnd reych zebrochen. Wyr haben  
auch izt die selbigen gnade vnd grosses liecht Göttlichs  
worts / Darumb ist gewis eyn gros verderben furhanden /  
da wil Gott etliche holen / ehe denn es kompt vnd bringe  
vns gar vmb / wo wyr vns nicht bessern / wie wyr vns denn  
leyder vbel gnug anlassen / auch der straffen bereyt grosse  
stuck angangen sind.

**Mach dich auff vnd geheynn die grosse  
stad Nineue vnd predige drynnen etc.**

Hie sehen wyr / das Gott sich nicht alleyn der Juden  
annympt / sondern auch der heyden / vnd wie S. Paulus sagt  
Ro. ij. Gott ist nicht alleyn der Juden / sondern auch der  
heyden Gott. Vnd stehet doch hie nicht / das die Nineuiten  
sich beschnyttten / odder der Juden gesetz gehalten odder an  
genommen haben / sondern alleyn daran gelobt werden das  
sie dem wort Gottes glaubten / vnd sich besserten vnd frum  
wurden. Dis ist gar eyn mechtiger stos widder die Juden  
vnd stercke vnsers Christlichen glaubens / vnd vns wol zu  
mercken



mercken ist. Denn hyraus mügen wyr gewaltiglich schliessen  
das die beschneyttung vnd Moses geseze nicht not sey dazu/  
das man frum sey vnd Gott gefalle/ vnd nicht war ist/ das  
die Juden meynen/ alle welt müsse Juden werden vnd Mos  
ses geseze annemen. vnd halten/ als solten alleyne die Juden  
Gotts volck seyn. Denn hie stehet Jonas mit seym buch/ vnd  
zeyget/ das die Ninewiten on alles gesez vnd weyse der Jus  
den/ alleyne durch den glauben vnd gute werck/ Gott ges  
fallen vnd gnug thun/ Vnd Gott auch nicht mehr von yhn  
foddert. Denn wo Moses geseze von nöten were/ frum zu  
werden/ müsten sie es auch haben angenommen/ Das ge  
schicht aber hie nicht. Widderumb finden wyr/ das von den  
Juden gefoddert wird der glaube vnd gute werck/ vnd sie  
nicht hilfft yhre beschneyttung vnd so mancherley Gottes  
dienst/ wie Isaia. i. sie mit yhrem opffern vnd thun verwirfft.  
Vnd sind sich hie der spruch S. Pauli Ro. ij. gar feyn/ das  
die heyden on gesez/ das gesez halten/ vnd die Juden durchs  
gesez/ das gesez vbertretten/ das man wol greyssen mus/ wie  
Moses gesez nur alleyne dem Judischen volck/ eyne zeyt  
lang ist auffgelegt/ sie damit zu zwingen vnd demütigen/  
als mit eym kercker vnd stockmeyster/ wie Paulus Gal. iij.  
sagt/ vnd gar nicht/ das sie dadurch solten odder möchten  
frum/ sondern gyrrig nach Christo vnd Gottes gnaden/ wer  
den. Also bestettigt nu Jona mit seynen weyssagung den  
spruch S. Pauli Ro. iij. das durch die werck des gesezts nie  
mand müge für gott frum werden/ sondern der mensch mus/  
on alle werck des gesezts/ durch den glauben frum werden/  
wilcher denn gute werck thut/ wie wyr hie sehen an diesen  
Ninewiten. Sind nu die Ninewiten nicht pflichtig gewest  
Moses gesez zu halten odder Juden zu werden/ dazu mal  
da Christus noch nicht war komen/ vnd das geseze noch  
stund vnd galt bey den Juden/ wie viel weniger sind wyr nu  
dazu verpflichtet/ syntemal Christus komen ist/ vnd das geseze  
auch bey den Juden auff gehaben hat: Darumb ist's vns nu/  
wie den

wie den Nineuiten nichts mehr not/ denn eyn rechter glaube/ der gute werck thu vnd die menschen frum mache etc.

Das sage ich nicht alleyne vmb der Juden willen/ sie damit zu bestreytten/ sondern auch vmb vnser willen/ die wyr nicht eynerley teuffel widder diese gottliche lere haben/ Erstlich den Papsst mit den seynen/ die es heysen eyne newe lere/ vnd legen vns viel grösser vnd mehr gesetz auff/ denn Moses gesetz war/ vnd wollen vns damit frum machen fur Gott. Ich meyne aber/ sie sey ia alt gnug/ weyl sie zu der zeyt Jona fur Christus geburt so lange gewest ist/ dazu auch gnugsam/ weyl sie die Nineuiten hat frum gemacht on Moses gesetz/ auch ehe denn yemands vom Papsstum het mügen treument- Auffss ander/ haben wyr die rotten vnd schwarmgeyster/ die vns mit Moses gesetz wollen beladen vnd meystern/ wissen nichts/ widder was Moses odder Christus ist/ odder wie ferne Moses gilt/ odder wo zu er dienet/ wie die bildensturmer bis her gewesen sind/ vnd die das weltliche schwerd ynn Moses gesetz fassen wolten/ vnd schryen getrost/ Zie ist Gottes wort/ Gottes wort/ Gottes wort. Gerade als were es gnug/ das Gottes wort da sey/ Vnd nicht auch mit vnterscheyd drauff zu sehen sey/ wilche die sind/ denen es befolhen ist. Denn es war auch Gottes wort/ das Noe die archen solt bawen/ vnd Abraham seynen son opffern/ vnd Salomon den tempel bawen. Aber es ist myr nicht auch myr des gleychen zu thun/ Denn es ist myr solch Gottes wort nicht gesagt/ Myr aber ist/ vnd allen dis gemeyne wort gesagt/ Bessert euch vnd glaubt/ wie hie den Nineuiten gesagt wird. Darumb müssen wyr nicht darnach fragen/ obs Gottes wort sey/ sondern ob vns dasselbige sey gesagt odder nicht/ vnd als denn desselbigen vns annemen odder nicht etce.

Aber sihe/ wilch eyn gros ampt Gott auff den Jona legt/ das er dem eynigen menschen die prediget besilhet/ widder das mechtige Keyserthum zu Assyrien/ widder den König vnd seyne

vnd seyne fursten. Habens doch die grossen herrn so trefflich  
vngerne / so man sie schilt vnd strafft / vnd wollen schlechts  
vngestraft seyn. Tu befilht hie Gott dem Jona / er solle yhn  
yhre bosheyt sagen / Da gehört warlich eyn mut zu / Da wil  
das maul auffgethan seyn. Er hat yhe müssen zu yhnen sa-  
gen / Ihr seyt böse vnd verdampft / ewer gutts wesen ist eyn  
lauter scheyn vnd verfuert euch. Denn es ist nicht möglich /  
das ynn solchem mechtigen Königreiche nicht solten seyne  
leute gewesen seyn / die fur der welt eyn erbars / vnstrefflichs  
leben gefurt haben. Diese nu allzumal straffen vnd mit Gottes  
zorn schrecken / ist eyn gros ding / vnd ist vbel zu leyden / son-  
derlich bey den grossen hansen. Summa / wyr sehen die ges-  
chicht geringe an / weyl wyr sie von aussen ansehen / vnd sie  
vns nicht betrifft / solte vns aber der gleychen begegennen / od-  
er weren dazumal da bey gewesen / so wurde vns duncken /  
wyr hetten noch nie nerrischer vnd vnmöglicher ding gese-  
hen noch gehört / denn das eyn eynzeler mensch solt eyn solch  
Keyserthum angreyssen. Wie solt sichs ansehen / wenn du od-  
er ich zum Türckischen Keyser wurde gesand / yhn zu straf-  
fen mit seynen fursten vnd reich? Wie oft ist so lecherlich  
gewest / das etwa eyner widder den Papsst gered hat? Tu  
Gotts werck pflegen sich am ersten / so nerrisch vnd vnmög-  
lich anzulassen / das vernunfft dran mus verzweyfeld vnd  
des spotten. Aber es geschicht vns zu gut / das wyr gleuben /  
Denn Gott furets aus / was er redt vnd anseheth / vnd were es  
noch so nerrisch vnd vnmöglich an zuschen / Gottis nartheyt  
ist weyßer denn die menschen. i. Cor. i. Das beweyset hie Jona  
wol vnd seyn.

Jona aber macht sich auff zu fliehen fur dem  
**HERN** auff's meer / vnd zoch hynab gen Japho.

Der latinische text helt hie sampt dem Griechischen  
(gen Tharsis) da ich verdeutschet habe (auff's meer) Das  
mich nu daruber die Flüglinge nicht zu seer verdammen / mus  
ich des

ich des vrsachen anzeygen. Sie sagen/ Jona sey gefaren gen  
Tarsus / ynn die stad Cilicie / da S. Paulus her war. Act. ix.  
Aber das hat keynen grund nicht ynn der schrift / Denn der  
text spricht hie nicht / gen Tarsus / sonder / yns Tharsis / od  
der auff's tharsis. Die Ebreische zunge hat zwey worter / die  
das meer heysen / als Jam vnd tharsis / Jam heyst nicht als  
leyne das grosse meer / sondern auch die grossen see / als Lucas  
das meer eynen see nennet / da Christus auff schiffet mit seyn  
nen iungern bey Tyberias vnd Capernaum vnd Betsaida /  
welchs Johan. vi. vnd die andern Euangelisten das Gallilei  
sche meer nennen. Also auch Mose Gen. i. spricht. Gott nen  
net die versamleten wasser / Jam / das ist / seen odder meer.  
Aber Tarsis heyst eygentlich das grosse meer / das nicht eyn  
see ist / als das / da Rodis / Cypren vnd viel ander ynsulen ynn  
liegen / da S. Paulus auff schiffte Act. xxvii. Das ist der Tür  
cke / Venediger / Franckreich vnd Hispanien ynn haben / denn  
es reicht von Cilicia an bis an das ende ynn Hispanien / Also  
auch das Rote meer / vnd die andere grosse hohe meer heysen  
auch Tharsis.

Also spricht der lxxij. psalm / Die Könige Tharsis vnd die  
Insulen werden geschencke bringen / Das ist / die Könige an  
grossen meer / vnd die Insulen drynnen / Denn die stad Tar  
sus ist keyn Königreich / hat auch nie keynen König gehabt /  
schweyge denn viel Könige. Also lies Salomo seyne schiff ynn  
Tharsis faren / das ist / auff's meer / gegen morgenwerds dur  
chs rote meer / golt zu holen ynn Indien land / Da Kunden  
ia die schiff nicht gen Tarsus zu der stad faren / man hette  
denn auff dem lande schiffen wollen / Denn zwischen Tarsus  
vnd dem roten meer / eytel land ligt / wie die landferer wissen.  
Also spricht auch psal. xlv. Du zu brichst die schiffe Tarsis  
mit starckem winde. Das ist die schiffe ynn meer. Vnd Esai.  
xxij. Heulet yhr schiffe Tharsis / das ist / yhr schiffe des meeres.  
Vnd der sprüche viel mehr / das auch S. Jeronimus selbst  
hie bekennet / es müge besser / meer / denn Tarsus die stad hey  
ssen / denn

ffen/ Denn es war Jona nicht zu thun vmb eyne gewisse stad/  
da er hyn flohe/ denn er hatte nyrgent nichts zu thun/ Son/  
dern er gedachte nur zu fliehen auff's meer/ er keme wo hyn er  
wolte. Die flucht sucht er/ vnd fragt nicht/ wo er hyn keme/  
wie denn hie der text auch sagt/ er habe sich auffgemacht zu  
fliehen fur dem herrn/ Vnd da er nyrgent hyn wuste/ dachte  
er sich auff's mehr zu geben/ er keme wo yhn der wind hyn  
webte.

Japho / ist die stad Joppe/ da man izt anferet / wenn  
man zu Jerusalem feret / vnd lautet auff deudsch / die schöne  
odder hübsche/ denn da ist der anfurt an das Jüdische land.  
So ist nu Jona von Jerusalem vnd vom Jüdischen lande  
gefahren auff's meer gegen abentwerds. Das weyset auch das  
wort/ da er sagt / fur dem herrn sey er geflohen. Wer kan fur  
dem herrn fliehen: ist er nicht an allen enden: wie der. cxxxviii.  
Psalm sagt / Wo wil ich fur deynem geyst hyn : vnd wo sol  
ich fur deynem vngesicht hyn fliehen. Denn Jona war nicht  
so toll/ das er nicht solt wissen/ wie Gott an allen enden ist/ so  
er selbst hernach bekennet/ er diene dem Gott / der hymel vnd  
erden/ meer vnd das trocken gemacht hat/ So hatte er auch  
gehört / das Gott zu Nincue war/ weyl er yhre bosheyt zu  
straffen furhatte/ vnd Jona dahyn senden wolte. Aber also  
ists zuuerstehen/ Gott hat zweyerley wesen odder gegenwer-  
tickeyt. Eyne ist natürlich / die ander geystlich. Natürlich ist  
er an allen enden / wie Esaias sagt. lxxvi. Der hymel ist meyn  
stul/ vnd der erdboden meyn fusschemel. Also ist er auch mit  
ten ynn der helle/ tod vnd sunden/ wie der obgenante Psalm  
sagt/ Fare ich ynn die helle/ so bistu auch da. etc. Also kan yhm  
niemand entfliehen. Aber geystlich ist er alleyne/ da man yhn  
also kennet/ das ist/ wo seyn wort/ glaube/ geyst vnd Gottes  
dienst ist/ da sind die seynen / wilche alleyne fulen/ wie Gott  
eyn solcher herr ist/ der almechtig vnd an allen enden ist. Die  
gottlosen aber fulen das nicht / glaubens vnd wissens auch  
nicht/ das Gott an allen enden sey / ob sie es gleych horen sa-  
gen vnd

gen/ vnd wol nach sagen können. Also kan man wol für Gott  
fliehen/ wenn man an den ort fleucht / da kein wort/ glaub/  
geyst noch erkenntnis Gottis ist. Also ist Jona geflogen  
für dem herrn/ das ist/ aus dem Judischen volck vnd lande/  
darynnen Gottis wort/ geyst/ glaube vnd erkenntnis war/  
auff's meer vnter die heyden/ da kein glaube/ wort noch geyst  
Gottis war.

Hie hebt sich nu die frage/ ob Jona auch gesündigtet ha-  
be/ das er für dem herrn floch. Die alten heyligen veter sind  
zu mal geneygt gewesen/ die Propheten/ Aposteln vnd grosse  
heyligen zu entschuldigen/ mit wilcher herrischen demut/ sie  
so ferne kómen sind / das sie gleich der heyligen schrift vnd  
Gottis wort ehe haben gewalt gethan / sie gezwungen vnd  
gedrungen / ehe sie die heyligen haben wollen lassen sünd er  
sey. Wie wol nu solch yhre demut zu dulden ist / wilche aus  
hass der sünden / vnd ehre der gerechtickeit kómp / so ist's  
doch ferlich/ die schrift also zu lencken/ vnd yhier auslegunge  
zu folgen. Christus spricht viel anders. Matt. v. das hymel  
vnd erden müste vergehen/ ehe denn der geringste buchstabe  
odder tittel von der schrift solte vergehen. Es ist besser/ man  
gebe den heyligen zu wenig / denn zu viel / vnd besser / man  
breche yhn ab/ denn Gott selbst ym seyn worte. Denn on die  
heyligen können wir selig werden / on Gottis wort mügen  
wir nicht selig werden.

So bleyben wir stracks vnd steyff auff den worten gotts/  
vnd lassen Jona hie eyne grosse schwere sünde gethan  
haben/ dadurch er ewiglich verdampt were/ wo er nicht ym  
der auserweleten zal ym buch des lebens geschrieben were ge-  
west. Denn das kan ia niemand leucken/ das Gott Jona ey-  
nen befelh thut/ vnd gepent/ er solle gehen hyn vnd predigen  
zu Nineue. So ist's auch gewis / das Gott kein schertz / son-  
dern grosser ernst ist/ so gros als er war/ da er Adam ym Pa-  
radis gebot. Denn er spricht / Die bosheyt der stad Nineue  
sey für yhn kómen / Das ist / er wolte das ganze kónigreich  
straffen.

straffen. Kurtz/grosser zorn ist da furhanden. So ist das auch  
offenbar / das Jona solchem ernstern gebot Gottes vngehors  
sam wird / weyl er fleucht / vnd wils nicht thun / Vnd ia so  
schwerlich sundigt / als Adam ym Paradis gesündigt hat.  
Denn er solte nicht alleyn solchem gottlichen willen angeno  
men / sondern auch mit allen freuden ausgerichtet haben /  
vnd ehe hundert tödte leyden / ehe er Gottes wort vngehors  
sam wurde. Denn was kan grösser / greulichher ding sein / denn  
Gottes willen vngehorsam seyn: Sihe / wie es Adam / Saul /  
vnd dem volck Israel druber gangen ist. Ja sihe / wie es hie  
Jona selbst druber gehet / Ich meyne ia / sein vngehorsam wer  
de greulich vnd schrecklich gnug gestrafft / das die straffe  
wol anzeygt / wie es nicht eyne kleyne sünde gewesen ist. Wie  
seyn entfleucht er Gots gehorsam auff dem meer / das er het  
te mügen wünschen drey mal dafur ym lande zusterben. Er  
wil nicht gen Nineue / so mus er mitten yns meer dem Wal  
fisch ynn den rachen faren.

Das ist alles vns zur warnunge geschrieben. Auffß erst /  
das wyr lernen das stück / Wer nicht wil mit gute Gott ges  
horsam sein / der mus yhm doch zu letzt mit vngüte gehorsam  
seyn / vnd gehet doch seyn wille fort. Vnd sehen hie / wer sich  
wegert vmb Gottes willen eyns geringen / der mus so viel des  
ste grössers dafur leyden / Das nichts bessers vns ist / denn nur  
bald gehorsam seyn vnd sprechen / Deyn wille geschehe ym  
hymel vnd auff erden. Doch ist das eyn gros zeychen der gnade  
den / das Gott Jonan so bald nach seyner sünde sucht vnd  
strafft / vnd lest sie yhm nicht zu gute komen / noch lange daryn  
nen verharren / Das er auch wol mag mit David singen / Der  
herr hat mich gesteuert / aber nicht dem tödte vberantwortet.  
Auffß ander / das wyr Gottes gnade recht lernen kennen / vnd  
an vnserm verdienst nicht hangen / widder an gutem noch  
bösem / sondern wissen / das vns wider sünde verdampft / noch  
gute werck selig machen. Alleyn aber Gottes gnade vns er  
halte / vnd vns beyde sünde vnd gute werck verdammen / so  
C iij wyr ynn

wyr ynn sunden zweyffelt/ vnd auff gute werck vns verlass  
sen. Denn hie sihest ia/ das Jona nicht verdienet mit eynich  
em guten werck/ das er ym fischbauche erhalten/ vnd widder  
eraus ans land bracht wird/ sondern aus lauter Gottes gna  
den / wie er das gar seyn ynn seynem lobesang meldet / wie  
wyr hören werden. Widderumb sihestu ia / das grosse sunde  
gnug da ist/ vnd wird doch nicht verdampt noch verlassen/  
das macht er verzagt vnd verzweyffelt nicht ynn der sunden/  
bleybt fest an Gottes gnaden hangen/ vnd ergibt sich willig  
lich ynn die straffe. Denn wo er verzweyffelt hette / were er  
nymmer mehr widder ersur komen. Seyn grosser glaube mitten  
ynn der sunden/ macht/ das Gott seyn nicht kan vergessen/  
sondern mus yhn widder eraus reysen/ Davon hernach wey  
ter zu sagen seyn wird.

So ist das nu auch vns eyn grosser trost/ das wyr sehen  
wie auch die aller grössisten/ trefflichsten heyligen so gröblich  
sundigen widder Gott / vnd nicht wyr alleyne arme / elende  
sunder sind/ sondern sie auch menschen gewesen/ fleysch vnd  
blut gehabt/ wi wyr/ Auff das auch wyr nicht verzagen/ ob  
wyr sundigen vnd fallen/ so ferne/ das wyr nur nicht aus dem  
reych der gnaden fallen durch falsche lere vnd aberglauben/  
Denn gleich wie ym reich der gnaden keyne sünde so gros ist/  
die nicht vergeben werde. Also ist auffer der gnaden keyn  
werck so gut/ keyn leben so heylig / das nicht verdamlich sey.  
Das heysse ich aber ym reych der gnaden bleyben / das man  
nicht auch widder die gnade sundige. Widder die gnaden  
sundigen/ geschicht auff zwo weyse. Die erste/ wenn ich gesun  
digt habe widder Gottes gepot/ vnd ich zu der selbigen sünde  
disen teuflischen zusatz thu/ vnd verzweyffel odder verzage/  
das ich gleube / vnd eyn gewissen myr mache / als wolt myr  
Gott die sunden nicht vergeben vnd sey keyne gnade mehr  
da/ Den da ist denn auch keine gnade mehr da/ sondern Gott  
mit aller gnade ist verleucktet vnd zu nichte worden. Das ist  
denn nicht mehr eyne menschliche / sondern eyne teuflische  
sünde.



sunde / vnd eyne sunde ynn den heyligen geyst / die n icht kan  
vergeben werden / so lange sie also bleybet / denn sie ist stracks  
widder die gnade / da durch die sunde solt vergeben werden.

Das heyst aber ynn der gnaden reich bleyben / wenn ich  
nicht verzweyffel an Gotts gnaden vnd an der vergebung  
der sunden / Es sey die sunde wie gros sie wolle / sondern fest  
bleybe ynn synn vnd gewissen / es sey noch gnade vnd verge-  
bunge da / wenn gleich Gotts vnd aller creatur zorn mich fref-  
sen wolte / vnd meyn eygen gewissen dazu selbst saget / die gna-  
de were aus vnd Gott wolte nicht vergeben. Das heyst denn  
Gotts gnade vber alle ding erheben / loben vnd ehren / vnd  
vber der selbigen trozen widder allen zorn vnd gericht / Wie  
Jacobus sagt ynn seynen Epistel. Die barmhertzigeyt trozt  
widder das gericht / Das ist / gnade gilt vnd mag mehr /  
denn aller zorn / alles vrteyl / alles gericht Gottes. Vnd wer  
das gleubt / der kan auch damit trozen widder allen zorn  
vnd vrteyl Gottis. Wer das nicht kan / bey dem trozt das ge-  
richt widder die gnade / vnd mus die gnade zu nicht werden /  
vnd das gericht alleyne hirschen / zum tod vnd verdammis /  
Gleich wie widderumb / wo die gnade trozt / da mus das ge-  
richt zu nicht werden vnd die gnade alleyne hirschen zum le-  
ben vnd der selickeyt ewiglich / wie hie diesem Jona geschicht.  
Das ist nu nicht mehr eyne menschliche gerechtickeyt / die auff  
vnsern wercken vnd kressen bestehe / sondern es ist eyn englis-  
scheia götliche gerechtickeyt / die auff dem glauben vnd geyst  
on alle werck bestehet / denn sie hanget blos an der gnaden /  
wilchs vermag keyn werck zu thun / Denn es gehet alles ynn  
herzen vnd gewissen zu / da keyn werck ynnen ist / noch dahyn  
kompt.

Die ander weyse / wenn ich gute werck thu / vnd ich zu den  
selbigen diesen teufflischen zusatz thu / vnd verlasse od der trös-  
ste mich darauff / vnd mache myr eyn gewissen darnach / das  
ich dadurch müge fur Gott bestehen / als sey nicht sunde da /  
Denn damit mache ich myr die gnade zu nichte / als sey sie  
nicht not

nicht not noch nütze / weyl solchs die werck mügen ausricht-  
ten. Da ist abermal Gott mit alle seyner gnaden verleuck-  
t. Vnd da ist nicht mehr gottliche / sondern teuflische gerech-  
tikeyt / die nicht mag vergeben werden / so lange sie so bleybt  
vnd nicht erkand wird. Das heyst denn ausser der gnaden  
reich bleiben vnd widder die gnaden sundigen / wenn man so  
frum wird ynn etlichem werck odder wesen / das man nicht  
vergebung noch gnade dazu bedarff / sondern on gnade vnd  
vergebung / das werck selbs fur gut gnug vnd reyn gnug  
helt. Da ist denn der spruch Jacobi vmbgekeret / vnd heyst  
nicht mehr / Barmhertikeyt trotzt widder das gericht / Son-  
dern also / Werck trotzt widder das gericht. Ja werck trotzt  
widder barmhertikeyt / das ist denn sinde ynn den heyligen  
geyst / die nicht kan vergeben werden / das ist / sie hat nicht  
gnade / da durch sie möcht vergeben werden / wie alle ander  
sinde haben / die on solchen zusatz geschehen. Denn alle ander  
sinde behalten das stuck vnd lassen den trotz bleyben / das  
gnade vnd vergabung noch da sey / mehr vnd grösser denn  
die sinde. Diese sinde aber vnd gute werck / thun die gnade  
aus den augen / vnd lassen den trotz nicht bleiben / sondern die  
sinde spricht / Gnade sey nicht da vnd wölle nicht vergeben.  
Gut werck spricht / Gnade ist nichts / vnd ich darff yhr nicht.  
Also sind sie beydes aus der gnaden reich gefallen / vnd sündi-  
gen widder die gnaden.

Hieraus verstehet man nu wol / was Christus meynt /  
das die sinde ynn den heyligen geyst nicht vergeben werde /  
widder hie noch dort / Matth. xij. vnd Mar. iij. vnd Johan-  
nes / da er sagt / man solle nicht bitten fur die todsunde / Denn  
todsunde heyst er die sinde ynn den heyligen geyst. Vnd ist  
alles so viel gesagt. Wer ynn sunden verzweyffelt odder auff  
gute werck trotzt / der sündigt ynn den heyligen geyst vnd  
widder die gnade. Sie sol ich nu wol bitten fur sie / das sie von  
soleher sinde los vnd bekeret werden / Aber das Gott solte  
yhn gnedig seyn ynn solchen sunden / vnd lassen seyne gnade  
mehr gelten

mehr gelten yn yhrem hertzen/ denn solche sünde/ wie es gehet  
yn den andern sunden/ das ist eyn vnmüglich ding. Denn da  
bettet ich zu gleich/ das Gottes gnade solte weniger gelten  
vnd doch mehr gelten denn solche sünde. Da wird nichts aus.  
Sondern ich sol widder solche sünde bitten/ gleich wie Mose  
thut. Nu. xvi. da er widder Core bettet vnd spricht/ Du wolt  
test yhr opffer ia nicht ansehen. Denn Core wolt auch durch  
werck für Gott etwas gelten/ vnd sündiget damit wider die  
gnade/ Das war nicht zu leyden/ Sonst sind alle sünde zu ley  
den/ wo sie die gnade lassen trozen vnd herr seyn. Das sey das  
von izt gnug.

Was hat aber Jona bewegt zu solchem vngheorsam/ das  
er nicht gerne gen Tyneue wolt? Es werden hie wol manch  
erley vrsachen angezeygt/ Erstlich/ das er sich solchs grossen  
newen vngheorten ampts gewegert hat/ weyl er für allen an  
dern Propheten alleyne ausgesand wird/ zu solchem grossen  
könige/ ynn eyn frembd land. Denn man nicht lieset/ das Got  
yhe mals habe einen Propheten aus dem lande Israel so ferne  
vnd zu solchem grossen königreiche gesand. Weyl den das so  
gar eyn newer selzamer befehl ist/ der keyn exempel für sich  
hat/ das des gleichen mehr geschehen were/ Ist dem Prophe  
ten Jona auch wilde vnd wunderlich/ das Gott so eben yhm  
eyn solchs für allen andern befilhet/ Wie denn natürlich  
fleysch vnd blut gesymmet ist/ das wyr schwerlich hynan wolt  
len/ wo Gott etwas sonderlichs mit vns für andern für  
nympt/ Gleich wie Petrus Johan. vlt. auch sich vmb sach  
nach Johannes/ da Christus zu yhm sagt/ folge du myr/ vnd  
fraget/ was denn Johannes thun solte. Vnd sehen nicht/ das  
wyr doch zu letzt müssen alleyne hynan/ gleich wie hie Jona  
geschicht/ der nicht gerne aus dem lande wil von den seynen/  
so mus er zu letzt alleyne/ mitten yns meer vnd dem walfisch  
ynn den rachen/ da er doch nicht anders musste dencken/ denn  
er were alleyne mit Gott ym hymel vnd erden. O das ist eyn  
schweer ding.

D

Item man

Item man möcht auch sagen/ Er habe sich gefurchtet für dem grossen Könige. Auch meynen etliche / er habes darumb gethan/ das er besorget/ seyne weyffagung gienge zurücke vnd geschehe nicht/ was er sagen würde/ wie es den auch ergieng/ Darumb hatte er sorge / man möchte yhn für eynen lügener vnd für einen falschen propheten halten/ des wort nicht war noch von Gott were. Aber diese vsach ist nichts / Denn Jonna wuste nicht/ was geschehen würde/ weyl das vierde capitel sagt/ das er für der stad sas/ vnd wartet/ was der selbigen widerfahren würde/ Daraus man wol merckt/ er habe gewartet bis sie vnter gieng/ wie Sodom vnd Gomorra/ Vnd düber zürnet/ das nicht geschach/ wie er hofftet. Daher man nemen kan/ Das die vsache seynes vngheorsams gewesen ist/ das er der stad Ninene seynd gewest ist / vnd noch eyne Jüdische fleyschliche meynunge von Gott gehabt/ als sey Gott alleyne der Juden Gott vnd nicht der heyden. Darumb ist seyn hertz gestanden also/ das er gedacht hat / die Nineniter weren Gottes wort vnd gnaden nicht werd / weyl sie nicht Gottes volck/ das ist/ Juden odder vnter dem Israelischem volck weren/ Gleich wie die Aposteln auch zu erst fleyschlich meinetē/ Christus Königreich solte leyblich sein/ Vnd hernach da sie es geystlich erkantē / dennoch meyneten / Es solte alleyn der Juden seyn/ vnd predigeten alleyn den Juden das Euangelion. Act. viij. bis sie Gott durch eyn gesicht zu Petro vom hymel Act. x. vnd durch eyn offentlich beruff Pauli vnd Barnaba Act. xij. vnd durch wunder vnd zeychen / zu letzt durch eyn gemeyn Concilium Act. xv. beschloss / das Gott auch den heyden gnade gebe/ vnd auch der heyden gott were.

Denn es den Juden gar schwer war zu gleuben / das außser Israel auch mehr leute Gottes volck weren/ weyl da die sprüche der schrifft stehen vnd von Israel vnd Abrahams samen sagen/ vnd alleyn bey yhnen/ Gottes wort/ Gottes dienst gesetze vnd heylige Propheten waren/ Das auch S. Paulus vmb der

vmb der sache willen am meysten die Epistel zum Römern ge  
schrieben hat / darinnen er auff das aller scherffest vnd mecht  
tigst eben diesen artickel handelt / mit gewaltigen schrifft  
das Gott nicht alleyn der Juden / sondern auch der Heyden  
Gott sey. Denn solchs noch heutigs tages die Juden hyn  
dert / das sie nicht wollen gleuben / das die Heyden so wol  
Gotts volck sind als die Juden. Darumb ist Jona auch ynn  
solchem sym / vnd kompt drüber ynn solchen kampff / das  
ers mus mit solchem grossen puff lernen / dazu mit eyner glei  
chnis der wilden ruben / vnd mit eynem starcken Gottes zeug  
nis vom hymel / das Gott auch die Nineue fur seine stad / vnd  
die Nineuiten fur seyn volck halte. Wienn Christus seynen  
ungern zu gut hielt yhr fleyschliche gedanken von dem  
reich Gottes / Also helt er auch hie Jona zu gut seyne fleysch  
liche gedanken. Denn sihe zu / wie schwer ist bisher gewesen  
zu gleuben / das yrgent Christen weren / die nicht vnter dem  
Bapst weren / da doch eytel falscher scheyn vnd verkerete  
auslegung der schrifft bey stehet / Was solt geschehen / wo  
dürre helle sprüche das Bapstum stofften / wie das Judent  
hum gestift war: Wie solten wir vns fur Türcken / Juden /  
Heyden schewen vnd alleyn vns zum Bapstum halten. Also  
ist Jona auch geschehen ynn dem Judenthum vnd Israelis  
chem Königreich.

Das ist / da er cap. iij. sagt / Er sey darumb geflohen  
das er wisse / wie Gott so gütig sey etc. Damit er antzeygt / das  
yhm gleich leyd sey / das Got so gütig ist / vnd den Nineuiten  
gnade thut / vnd wolte derhalben lieber nicht predigen / ia viel  
lieber tod seyn / denn das die gnade Gottes / die des volcks Is  
rael eygen seyn solte / auch den Heyden mit geteylet wird / die  
widder Gottes wort / noch gesetz Mosi / noch Gottes dienst /  
noch Propheten / nocht nichts haben / sondern wol widder  
Gott vnd seyn wort vnd seyn volck streben. Das aber dis sey  
Jonas meynung / zeygt klerlich / das Gott seynen unwillen  
vnd zorn mit diesen Worten strafft / Solte ich Nineue nicht  
D ij schonen

schonen etc. Da gibt er ia zuuerstehen / das Jona nicht gerne  
gesehen hat / das Gott der stad schonet / vnd zürnet drüber /  
das er sie nicht umbkeret / wie er geprediget hatte vnd gerne  
gesehen hette. Also ist vns dis geschichte eyn tröstlich exempel  
göttlicher gnade. Erstlich / das wyr wissen / wie fur Gott  
keyn ansehen der person gilt / vnd wyr niemand richten / noch  
an keynem menschen verzweyffeln sollen / Denn Jona sticket  
hie ym ansehen der person tieff / das er die Nineuiten gegen  
Israel bey Gott fur nichts helt / richtet sie frisch hyn vnd vr-  
teylt zum tod / als die verdampfen / verzweyffelt auch an yhu-  
nen / das sie solten gnade erlangen / sondern hofft vnd wartet  
auff yhu verderben / vnd denckt schlecht / was solten die sun-  
der werd seyn / die keyn gesetz / keyn Gottes dienst haben? Sol-  
ten sie aber Gottes gnaden haben / Was machet denn Israel  
mit so viel Gottes gesetzen vnd Gottes dienst / so sie nichts bes-  
sonders noch vorteyls haben solten fur den Heyden / vnd die  
Heyden on solch gesetz vnd Gottes dienst zu gnaden komen?  
so were yhe der Juden gesetz vnd Gottes dienst / eyn unnütze  
unnötige mühe / die sie den gantzen tag tragen mit last vnd  
mit hitze / vnd diese sollen on solche mühe gleychen pfennig  
Kriegen / Solt das nicht scheel augen machen / vnd zu murren  
widder den haus vater bewegen? Ja solts nicht unmöglich  
vnd vnbillich fur Gott anzusehen seyn?

Aber er feylet auch gar weydlich vnd leufft getrost an /  
Denn da er meynet / es sey unmöglich / das Gottes gnade da  
solte seyn / vnd eytel vngnade sich da versihet / da ist sie am  
ersten / Vnd da er meynet / man werde Gottes wort nicht hö-  
ren noch annemen / da nemen sie es am aller ersten vnd auff  
aller demütigst an / das er mit eygener erfahrung mus lernen /  
Er solle niemand vrteylen / auch an niemand verzweyffeln /  
vnd gottes gnaden / nicht stet noch ziel / noch zept / noch ma /  
noch person / noch verdienst setzen / wie die fleyschliche ge-  
danken der Juden thetten. Auff's ander / das wyr stracks  
sollen

sollen Gottes befehl folgen / vnd auff nichts anders sehen  
noch erst fragen / wie sichs mit andern sachen reymet / son-  
dern gerne vnd willig vmb Gots willen narren werden / vnd  
yhm die ehre geben / das er weyse vnd gerecht sey ynn allen  
seynen Worten vnd wercken / Gleych wie Abraham thet / da  
er seynen son Isaac opfferte / vnd nicht zu erst fragte / wie  
sich das reymen wurde mit dem spruch / da Gott zuvor ges-  
agt hatte / Inm Isaac sol deyn same genennet werden / Denn  
wo er hette lange damit vmbgehen vñ fragen wollen / were er  
yrr worden / vnd zu lezt auch ynn vngheorsam fallen / gleich  
wie Jona hie geschicht / da er gegenander helt Israel vnd  
Nineue / vnd sibet sich noch lang vmb / felt er ynn vngheors-  
sam / Hette er aber eynfeltiglich hyn gedacht also / Was fra-  
gestu darnach / das Gott Israel mit gesezen vnd gots dienst  
versehen hat / vnd die Nineuiten nicht / Kan er doch gleych  
wol auff beyden seyten seine gnade geben / vnd Israel nichts  
lassen genieffen yhrs gotts diensts / vnd Nineue nichts lassen  
entgelten / das sie on solchen gotts dienst sind / Was ligt dyr  
dran / das er Israel solch ding besilhet / vnd andern nicht be-  
silhet / Es wartte eyn iglicher des seynen / die gnade gehet  
gleichwol fur sich / beyde vbir die da wircken / vnd vbir die da  
nichts wircken / wie Paulus leret Ro. iij. Sihe / so were er wol  
blieben ym gehorsam mit Abraham.

Aber Gott lies eynen grossen wind auff's meer  
komen / das eyn gros vngewitter ward ym meer etce.

Sie müssen vmb eynes sinde willen die andern alle ley-  
den / Denn vmb Jonas willen kompt solch vngewitter. Ist  
denn das auch recht / das eyn er mus bey Gott des andern ent-  
gelten / Aber Gott kan nicht vnrecht seyn noch thun / er thu  
was er wolle / denn wyr haben yhm kein geseze zustellen noch  
gebot zu setzen / Wo aber kein geseze seyn kan / da kan auch  
kein sünde noch vnrecht seyn. Doch wie wol dis vngew-  
itter vmb

D iij

witter vmb

witter umb Jonas willen kompt / wie er selbst sagt / vnd das  
werck auch an yhm selbst beweyset / So waren doch die leute  
ym schiff / nicht on schuld odder sünde / damit sie fur Gott  
verdinet hatten / alle stunde den tod vnd allerley straffe / denn  
wer ist fur Gott on sünde / odder vnstrefflich ? Darumb trifft  
er sie hie zu gleich mit Jona / wie wol Jona die ursach ist mit  
seyner sunden. Es mus auch eyn sonderlich vnuersehen wet-  
ter gewesen seyn / das ploglich daher komet ist / weyl der text  
sagt / Gott habe eynen grossen wind auff's meer geworffen /  
Denn also lautts ym Ebreyschen / das Gott den wind gleich  
habe so lassen komet / als wurffe odder stiesse er yhn auff's  
meer mit eym sturm / das die leute balde gemerckt haben /  
es musste nicht natürlich noch gewonlich zugehen / drum  
schliessen sie auch on zweyffel / Es müsse umb yrgent eynes  
sünde willen also gehen / so merckt auch Jona selbst / Es  
gilde yhm alleyn.

Vnd die leute furchten sich vnd schryen  
eyn iglicher zu seynem Gott.

Hie siehestu / das war ist / das S. Paulus Ro. i. spricht /  
wie Gott bekant sey bey allen heyden / das ist alle welt weys  
von der gottheyt zusagen / vnd naturliche vernunftt kennet /  
das die gottheyt etwas grosses sey fur allen andern dingen /  
Das beweyset sich daraus / das die hie Gott anruffen / die  
doch heyden waren / Denn wo sie nichts von Gott odder der  
gottheyt gewust hetten / wie wolten sie denn haben angeruf-  
fen vnd zu yhm geschrieen ? Wie wol sie nu nicht recht glau-  
ben an Gott / so haben sie doch solchen synn vnd meynung /  
Gott sey eyn solch wesen / der da helffen konne ym meer vnd  
ynn allen notten. Solch liecht vnd verstand ist ynn aller  
menschen hertzen / vnd lest sich nicht dempffen noch leschen /  
Es sind wol etliche gewesen / als die Epicuri / Plinius vnd der  
gleychen / die es mit dem munde leucken / Aber sie thuns mit  
gewalt /



gewalt / vnd wollen das liecht ynn yhrem hertzen dempffen /  
thun wie die / so mit gewalt die oren zu stopffen / odder die  
augen zuhalten / das sie nicht sehen noch hören. Aber es  
hilfft sie nicht / yhr gewissen sagt yhn anders / Denn Paulus  
leuget nicht / das Gott hats yhn offinbart / das sie von  
Gott etwas wissen.

So last vns his auch aus der natur vnd vernunfft ler-  
nen / was von Gott zu halten sey / Denn so halten diese leute  
von Gott / das er sey eyn solcher / der von allem bösen helffen  
müge. Daraus folget weyter / das naturliche vernunfft be-  
kennen mus / das alles guts von Gott kome. Denn wer aus  
allem bösen vnd vnglück helffen kan / der kan auch alles gut  
vnd glück geben. So weyt reicht das naturlich licht der ver-  
nunfft / das sie Gott fur eynen gütigen / gnedigen / barmher-  
zigen / milden achtet / das ist eyn gros licht. Aber es feylet  
noch an zweyn grossen stücken. Das erst / sie glaubt wol / das  
Gott solchs vermüge / vnd wisse zu thun / zu helffen vnd zu-  
geben / Aber das er wolle odder willig sey solchs an yhr auch zu  
thun / das kan sie nicht / darumb bleybt sie nicht feste auff  
yhrem synn / Denn die macht glaubt sie vnd kennet sie / aber  
am willen zweyffelt sie / weyl sie das widder spiel fulet ym vn-  
fal. Das sihestu hie wol / denn die leute ruffen wol zu Gott /  
damit sie bekennen / das er helffen müge wenn er wolt / Gleys-  
ben auch / das er andern helffen wolle / da lassen sie es bley-  
ben / höher können sie nicht komen / Denn sie versuchen ia als  
le yhr macht / thun yhr bestes vnd höhestes. Sie kan der frey-  
wille nicht mehr. Aber sie glauben nicht / das er helffen wol-  
le / denn wo sie das glaubten / so thetten sie so nicht / sie wurden  
nicht das geredte vnd die wahre aus dem schiff werffen / Wur-  
den auch nicht zu Jona lauffen / vnd heysen seynen Gott an-  
ruffen / sondern stille seyn vnd Gotts hulffe harren. Item so  
were auch das meer still worden vmb yhres glaubens willen.  
Nu ist aber von nöten solcher glaube / der nicht zweyffel Got-  
wolle / nicht andern alleyne / sondern auch myr gnedig seyn.  
Das ist

Das ist eyn rechter / lebendiger glaube / vnd eyne grosse / reiche  
salzame gabe des heyligen geysts / wie wir ynn Jona sehen  
werden.

Das ander / Das die vernunft nicht kan die Gottheit  
recht austeylen / noch recht zu eygen / dem sie alleyne ge-  
bürt. Sie weys / das Gott ist. Aber wer odder wilcher es  
sey / der da recht Gott heyst / das weys sie nicht / Vnd ge-  
schicht yhr eben als den Juden geschach / da Christus auff  
erden gieng / vnd von dem teuffer Johannes bezeuget war /  
das er furhanden were / Da stund yhr hertz also / das sie wu-  
sten / Christus were vnter yhn / vnd gieng vnter den leuten.  
Aber wilcher die person were / das wusten sie nicht / denn das  
Ihesus von Nazareth were Christus / kundte niemand ge-  
dencken. Also spielet auch die vernunft der blinden kue  
mit Gott / vnd thut eytel seyl griffe / vnd schlecht ymer neben  
hin / das sie das Gott heysst / das nicht Gott ist / vnd wid-  
derumb / nicht Gott heysst / das Gott ist / wilchs sie keynes  
thet / wo sie nicht wuste das Gott were / odder wuste eben  
wilches odder was Gott were. Darumb plumbt sie so he-  
reyn / vnd gibt den namen vnd Gottliche ehre / vnd heys-  
set Gott / was sie dunckt das Gott sey / vnd trifft also nymer  
mehr den rechten Gott / sondern allwege den teuffel odder  
yhr eygen dunckel / den der teuffel regirt. Darumb ist's gar  
eyn gros vnterscheyd / wissen / das eyn Gott ist / vnd wissen /  
was odder wer Gott ist / Das erste weys die natur / vnd ist  
ynn allen hertzen geschrieben / Das ander leret alleyne der  
heylige geyst.

Des wollen wir exempel geben / Die papisten vnd geyst-  
lichen las zu erst vns furnemen / Wilche haben solhen wahn  
von Gott / das sie meynen / Gott sey eyn solcher / der sich las-  
se mit guten wercken bewegen odder benügen / Darumb sie  
auch so viel stende / secten vnd mancherley weyse haben / zu le-  
ben / damit sie alle meynen Gott zu dienen vnd gefallen. Tu  
sage myr / Wenn nu keyn Gott were / der also gesynnet odder  
des willens

des willens were / was ehren solche leute für Gott: Ist nicht  
wahr / sie ehren yhren eygen falschen wahn vnd dunckel für  
Gott: Denn es ist ynn der warheyt keyn Gott / der also gesynnet  
sey / vnd feylen mit solchem dunckel des rechten Gots /  
vnd bleybt nichts da / denn yhr falscher dunckel / der ist yhr  
Gott / dem geben sie den namen vnd ehre Gottes. Tu kan  
vnter dem falschen dunckel niemand seyn / denn der teuffel /  
der yhn eingibt vnd regirt. So ist nu yhr falscher dunckel  
yhr abegott vnd bilde des teuffels ynn yhrem hertzen / Denn der  
rechte / eynige / warhafftiger Gott ist der / dem man nicht mit  
wercken / sondern mit rechtem glauben von reynem hertzen  
dient / der seyne gnade vnd güter lauter vmbsonst / on werck  
vnd verdienst / gibt vnd schenckt / das glauben sie nicht / Dar  
umb kennen sie yhn auch nicht / vnd müssen feylen vnd neben  
hin schlagen.

Da sihestu / Wo her alle abegotterey kompt / vnd war  
umb es billich abegott vnd abeglaube vnd abegotterey heysse /  
on zweyffel darumb / das solcher dunckel vns abfuret von  
Gott / vnd abwendet von rechtem Gots dienst. O freylich  
ein Abegott vnd abeglaubeen / der vns zum teuffel hynab von  
Gott ynn die helle weyset. Denn weyl eyn iglicher furnympt  
etwas / das yhn dunckt / vnd glaubt / es gefalle Gott / vnd  
meynet / Gott sey also gesynnet / der doch nicht so gesynnet  
ist / vnd gefellet yhm nicht / Darumb müssen so viel abegottes  
rey seyn / so mancherley dunckel sind / die furgenomen wer  
den / das Gott also gefalle / ausser dem eynigen dunckel des  
glaubens / den der heylige geyst gibt. Also kam bey dem  
könige Ahab auff der abegott Baal / Denn der könig / weyl er  
wusste / das eyn Gott war / lies er sich duncken / das wer  
Gott / der yhm liesse gefallen die weyse die er furnam ym  
Gotts dienst / Vnd hies also Gott Baal / vnd widderumb  
Baal hies er Gott / wie das aus Hosea .ij. wol scheynet.  
Item der könig Jerabeam meynete / das were Gott / der  
yhm liesse den Gots dienst für den gulden kalbern gefallen.  
¶ Und musten

Vnd musten also die Kalber Gott Israel heysen / vnd widder  
umb Gott eyn Kalb heysen. Gleych als wenn man itzt Chris  
stum vnsern herrn eynen Kappenhold / odder Plattenhold  
hiesse / darumb / das man meynet / er sey eyn Gott / der den  
Kappen vnd platten hold ist / vnd gefalle yhm solcher dienst  
wol / wie denn die monche vnd pfaffen yhn gewislich ym  
herzen so halten vnd nennen. Aber es ist eyn abegot vnd  
abeglauben vnd abedunckel der weyt feylet / vnd eyn ertz re  
chte abegotterey. Also ist der abegotterey keynzal / so viel der  
dunckel sind / die etwas anders furnemen / vnd selbs erwelen /  
das Gott gefalle / on den glauben ym Christo. Tu denn  
solcher Gott nyrgent ist / dem solchs gefalle / so dienen sie alle  
dem teuffel damit vnd nicht Gott.

Also sihestu hie auch / Das diese leute ym schiffe alle von  
Gott wissen / sie haben aber keynen gewissen Gott / Denn ein  
iglicher (spricht er) rieß seynen Gott an / das ist / seynen  
dunckel / odder das / das er fur Gott hielt ym seynem synn.  
Darumb feylen sie alle des eynigen rechten Gottes / vnd ha  
ben eytel abegotter / vnter Gottis namen vnd ehre. Derhalben  
auch yhr glaube nicht recht / sondern eyn abeglaube vnd abe  
gotterey war / der sie auch nichts halff / Denn yhr Gott lest sie  
sincken ym der not vnd vmbsonst ruffen / das sie so gar ver  
zweyffeln / vnd nicht wissen wo sie eynen Gott finden sollen /  
der yhn helffe / vnd lauffen hinab zu Jona / den wecken sie  
auff / vnd heysen yhn seynen Gott anruffen / ob yrgent ein  
ander Gott were / denn yhr Gott / der helfen wolle. Da si  
hestu / wie falscher glaube nicht bestehet ym der not / son  
dern sinckt / vnd verloren wird / beyde Gott vnd glauben / abe  
gott vnd abeglauben / das eytel verzweyffeln da bleybt. Der  
halben alleine der eynige lebendige Gott den namen vnd den  
reym furet / das er sey eyn nothelffer psal. x. vnd xlv. vnd als  
lenthalben / denn er kan aus dem todte helfen psal. lxxij.

Darumb sihestu auch / wie demütig diese leute waren /  
das sie

das sie ynn der not zu Jona lauffen / welchen sie doch / da es stille war / nicht achteten / Vnd wo sie zuuor gewist hetten / das er ein Jude were / so hetten sie yhn noch mehr verachtet / wie denn die heyden den Juden feynd waren. Aber igt / so die not her gehet / vnd yhr abegott sie lest sincken / ach wie fro wird yhr stolze verachtunge / das sie den armen Jona anruffen / vnd mehr guts bey yhm suchen / denn bey all yhren abegotten vnd alle yhrem vermügen. Sothut der falsche geserbete glaube allzeit / So lange es yhm wolgehet vnd steht so ist er stolz auch vber Gott vnd alles was Gott ist / vnd ist so verstockt vnd hart / das nie keyn anbos so hart ward. Aber wenn er begynnet zu sincken vnd zuuerzagen / so ist auch nichts blöders noch verzagters ynn hymel vnd erden / das er denn wol ynn eyn meuse loch kröche vnd yhm die weyte welt zu enge wird / vnd denn beyde bey feynnden vnd freunden / beyde bey verachten vnd hochgelobten / hulffe vnd rad sucht vnd gerne anneme.

Jona schlefft aber dieweyl vnden ym schiff / vnd fulet solch vngewitter nicht / Das mag wol eyn todschlaff heysen / den er zur leze gethan hat / vnd balde drauff ynn den tod faren musste. Aber so geht es allwege mit den sundern zu / vnd Gott handelt also mit yhn / gleych wie hiemit Jona / Denn Jona hatte sich hoch versündigt an Gott. Weyl aber Gott schweygt vnd still helt mit der straffe / vnd weret der sunden nicht / odder schlegt nicht so balde dreyn / so ist der sunden natur vnd art / das sie den menschen verblendt vnd verstockt / damit er sicher wird / vnd sich nicht furcht / sondern legt sich dahyn vnd schlefft / vnd sibet nicht / wilch eyn gros wetter vnd vnglück vber yhn furhanden ist / das yhn gar grewlich wird auffwecken. So stellet sich die weyl Gott auch / als hette er der sunden vergessen / weyl er so verzeucht / Vnd versucht also / was doch menschen kinder thun wollen / ob sie sich auch wollen bekeren / wie der zehende psalm sagt / Die augen liden des herrn

des herren versuchen die menschen Kinder. Aber da wird nicht  
aus / Da ist keyn bekennen / noch bedencken / Der Jona schliesse  
wol seyn lebenslang ymer hyn / Vnd wo Gott wolt seyner sun  
de vergessen / er würde freylich nymer dran gedenccken. Das  
wird hie bedeut ym Jona / das er mitten ym vngewitter / so  
tieff vnd hart schlesst / dazu vnden tieff ym schiff / Als solt er  
sagen / Er ist gar verblind / verstockt / versuncken / ia gestorben  
vnd ligt ym grund des vnbusfertigen hertzens / bliebe auch  
ewiglich so liegen vnd verdorbe. Denn die sunde lisset nicht  
zu / das sich eynerley krafft ym menschen reget zum guten / Es  
sey der frey wille da odder vernunfft. Da ligt er vnd schnarckt  
ym seyner sunden / höret vnd sibet nicht / fulet auch nicht /  
was Gotts zorn vber yhm handelt vnd furnympt.

Aber da yhn der schiffman auffweckt vnd heyst yhn sey  
nen Gott anruffen / Da hebt sich eyn anders / Da wird er ge  
war / wie Gott hynder yhm ist mit der straffe / vnd seyner sun  
den nicht so vergessen hat / Da gehet das gewissen an / da  
kompt die sunde widder vnd wird lebendig / Da ist die sunde  
des tods stachel / vnd zeygt den zorn Gotts / Da wird yhm  
nicht alleine das schiff / sondern die welt zu enge / Ja wol / das  
er hie solte Gott anruffen / Er furcht sich mehr denn keyner  
ym schiffe / Denn er fulet vnd merckts / seyn gewissen sagts  
yhm auch / das yhm das vngewitter gillt / vnd Gotts zorn  
vber yhn komen sey. O wie demütig ist er da. Er absoluir alle  
die ym schiffe sind vnd helt sie nicht fur sunder / keyne sunde si  
het er on die seyne. Denn also thut der Rewel / wenn der  
kompt vnd beyst vnd schreckt das gewissen / So ist alle welt  
denn frum / on er alleyne ist eyn sunder / Aller welt ist Gott  
gnedig / on yhm alleyne / Da trifft Gotts zorn niemand denn  
yhn alleyne / meynet auch / es sey sonst keyn zorn denn der / den  
er fulet / vnd findet sich also den aller elendesten menschen.  
Eben so thet er mit Adam vnd Heua auch / da sie gesündigt  
hatten / were Gott nicht komen / da der tag küle war worden /  
sie hetten

sie hetten nymer mehr die sünde geachtet / Aber da er kam / ver-  
krochen sie sich. Also Petrus auch / da er Chustum verleucktet  
hatte / da war er dahyn / er fulet keyne sünde nicht. Er schliff  
auch vnden ym schiff vnd war tod / bis yhn Christus ansah /  
da fulet er sich widder vnd weynet bitterlich. Also haben wyr  
hie / wie die sünde den menschen starrig / vnempfindlich /  
schlecht gantz tod macht / das er widder sich selbs / noch  
Gott fulet / vnd sicher on furcht dahyn gehet / bis Gott ko-  
me vnd wecke yhn auff / Damit der rhum des freyen willens  
gar darny dder ligt.

Da nu Jona nicht anruft seynen Gott / sondern sitzt  
vnd zittert fur Gotts zorn / vnd beysset sich mit dem tod / der  
yhn alle augenblick fressen wil / vnd die leute auch vmbsonst  
yhr götter anruffen vnd alles thun das sie kunden. Vnd Jo-  
na doch wol sihet vnd fulet / das vmb seynen willen solchs  
geschicht / ist er nicht so frum / das er doch eraus fure vnd sey-  
ne sünde bekennete / sondern lest die armen leute vmb seynen  
willen solch schrecken vnd fahr vnd iamer leyden / bis yhn  
Gott die sünde aus dringet / das er sie / durchs loss verrathen /  
mus bekennen. Das ist auch der sunden zarte tugent eyne //  
das sie die leute zu stummen macht / vnd wil sich verbergen //  
schemet sich / vnd wölt ia gerne schöne bleyben / gleych wie  
Adam vnd Heua sich mit den schürzen deckten / vnd wolten  
gar nicht zur beycht komen. Des thut weh / das eyner sol sey-  
ne eygen schande auff decken / vnd seynen schmuck zu vnehren  
machen. Aber nu mus es seyn / odder ist keyn ruge noch fride  
da / wie der .xxxij. psalm sagt / Da ichs verschweygen wolte //  
veralteten meyne gebeyne fur meynem teglichen heulen. Also  
hies Gott die kinder Israel auch yhren schmuck ablegen fur  
dem berge Sinai. Exodi. xxxiiij. Das heist denn recht den sack  
anziehen vnd ynn der asschen sitzen / sich selbs zu nichte mach-  
en fur Gott / auch wo es Gott haben wil / fur den menschen.  
Denn weyl hie Jona die leute mit seynen sunden ynn schaden  
vnd fahr bracht hat / mus er widderumb schaden leyden / sey-  
ne ehre

ne ehre verlieren / vnd sich selbs schenden / die leute zu ehren  
vnd vnschuldig machen / dazu selbst eyn vrtteyl vber seynen  
hals fellen / das sie yhn erseuffen müssen. Also bezalet er vnd  
büßt mit leyb vnd leben / ehr vnd gut vnd mit allem das er ist  
vnd hat / seyne nehisten / die er so hoch beleydigt hat / Er bra-  
cht sie on yhren willen / ynn fahr des lebens / so bringen sie yhn  
durch seyn eygen vrtteyl vnd willen / on yhren willen / wider  
vmb s leben. Das heyst meyn ich / strenge vnd recht gericht.

Da sprach eyner zum andern / Kompt  
last vns lossen. etce.

Weyl hie niemand ist der bekennen wil / vnd sie es doch  
dafur hielten / das yemands sünde müste solch vnnatürlich  
wetter verschuldet haben / vnd hie menschlich vrtteyl nicht zu  
finden ist / vnd offentlich gericht nicht kan gehalten werden /  
lauffen sie zu Gotts gericht vnd vrtteyl / vnd suchen das vrtteyl  
durchs los / O wie sol da Jona gefessen seyn / vnd das los ges-  
cherwet haben / wie denn eyn böse gewissen thut / das sich  
auch fur eym rauschenden blat furcht / So mancherley todte  
mus der arme Jona leyden / vnd doch nicht entleufft / son-  
dern hernach recht dreyn kompt. Sihe / so viel vn fals vnd  
herzenleyds richt die sünde an / wenn man sie bergen wil vnd  
nicht bekennen / vnd mus doch darnach mit zwoyfeltigem scha-  
den bekand werden. Aber die sünde leß vns nicht anders  
thun / sie wil vnd kan sich selbs nicht auffdecken / das ist ver-  
loren / Es wil eyn iglicher fur dem menschen schon vnd reyn  
seyn / vnd wil doch heymlich die sunden nicht lassen / so mus  
er sie doch zu letzt lassen andere auffdecken / vnd also schaden  
vnd schande zu lohn haben / Denn man kan die wunden nicht  
heylen / die man nicht wil auffdecken / so kan die sünde nicht  
vergeben werden / sie werde denn gebeychtet / das ist / bekand.

Hie fragt man / ob die leute auch gesündigt haben / das  
sie lossen /



ſie loſſeten / weil das loſſen ſol verboten ſeyn / als darynnen  
man Gott verſucht. Es hat aber Jona auch mit müſſen loſſe  
ſen / Darumb iſt auch Jona mit ynn der ſunde / ſo es ſunde iſt.  
Wie antworthe ich zum erſten / Es ſind ettliche werck der art /  
das ſie mögen geſchehen / wol vnd vbel / als das ſchweren  
verbeut Chriſtus Matt. v. vnd kan doch wol eyn göttlich eyd  
geſchehen. Also zurnen vnd todten iſt auch verboten. Vnd  
iſt doch göttlich / die vbelheter durch offentlich gericht tod  
ten vnd ſtraffen. Darumb iſt ynn ſolchen wercken zu ſehen /  
auff die meynung des hertzen / Das / wer ſie aus eygener luſt  
thut / der ſündigt. Wer ſie aber aus beſelh vnd gehorſam Got  
tes / odder aus not vnd pflicht des nehiften thut / der thut  
wol. Welche nu on beſelh Gottes / odder on pflicht des ne  
hiſten / aus eygener luſt odder mutwillen ſolchs thut / den  
laſſen wyr faren / Denn eyn ſolcher thut nicht wol / wenn er  
gleich alle tage auff den knyen lege / vnd bettet vnd faſtet  
tage vnd nacht / Ja wenn er gleich wunder zeychen thette.  
Darumb ſey das eyn iglichen auff ſeyn gewiſſen geſtellet /  
wyr mügen ſeyn hertz nicht richten. Iſt nu das loſſen auch  
eyn ſolch werck / ſo ligt nichts dran / ob dieſe leute ſampt dem  
Jona geſündigt haben / denn ſie ſind vngleubig geweſen /  
vnd haben ſonſt yhre werck alle Gott nichts gefallen / bis  
hernach / da ſie bekeret wurden / wie folget.

Zum andern ſage ich / das myr noch nicht bewuſt iſt /  
das loſſen eyn verboten werck ſey. Es iſt wol verboten /  
man ſolle Gott nicht verſuchen / Aber loſſen vnd Gott ver  
ſuchen / iſt weyt von eynander / Denn auch die Apoſteln Act.  
loſſeten vber S. Matthes. So ſpricht Salomo / Das los  
wird wol ynn ſchos geworffen / aber vom herrn wird es ge  
meyſtert. Da verwirfft er ia das loſſen nicht / ſondern beſtet  
tigers viel mehr. Wie wol ettliche veter ſagen / man ſolle ſolch  
en exempel nicht folgen / Aber ſie haben des keynen grund.  
Mich dunckt loſſen ſey an yhm ſelbs ein recht glaubens werck  
vnd müge

vnd müge wol durch furwitz vnd eygen lust / misbraucht werden / wie des schwerds vnd eydes / Aber das ist nicht des wercks / sondern der person schuld / wie gesagt ist. So bes weyssen sie auch nicht / das lassen sey Gott versuchen / Denn das heyst Gott versuchen / wenn ich fur mich vnd meynent furwitz on alle not / Gott / eyn gewis ziel / stund / stet / mas / person / weyse vnd werck setze / das er thun / vnd sich also greyfflich mercken lassen solle / als da die Juden ynn der wüsten / essen vnd trincken auff gewisse zeyt fodderten / vnd nicht yhm traweten noch heymstelleten / wie auch die Juden Matt. ix. eyn gewis zeychen vom hymel fodderten / was sie gut daucht. Aber ym lassen geschicht solchs nicht / Sondern da werden zween / drey oder wie viel yhr sind / eynes vnd machen eynen bund vber eynere sachen / so odder so zuentrichen / wie des losses denn mancherley weyse ist / vnd stymmen keyne gewisse personen / sondern befehlen solchs Gott / wilchen das los treffen werde / Vnd sind zuuor der sachen eyns / das wilchen es trifft / der sols seyn / als von Gott geordnet.

Möcht man doch solchs lassen wol thun on Gott / frey dahyn / wie die Heyden / die nicht glauben / das Gott das los meystere / sondern glück gebe es alles / Wie denn auffwürffeln vnd andern glück spielen geschicht. Aber Christen menschen zymet sichs / das sie nicht so frey hyn lassen / sondern sollen glauben / das Gott das los vnd glück meystere / vnd nicht zweyffeln / das von Gott gegeben vnd genomen wird / alles was durchs los vnd spiel gegeben odder genomen wird. Mus man doch die eyde auch also thun vñ nemen / das man glaube / Got sey da / der das eyd anneme / vnd darnach eynen iglichen richte. Aber weyl man nicht stympt / wie er richten soll / sondern stellet yhm heym / vnd ist drüber zu friden / ist keyne versuchunge. Also auch / weyl man ym los nicht stymmet / wilchem ers geben sol / sondern stellet frey dahyn auff Gottes berad / vnd ist zu friden / so ist auch nicht Gott ver suchen /

suchen / sondern eyn gut werck an yhm selbst / vnd wo es ym  
glauben geschicht / eyn gottlich werck / das yhm zu ehren ges  
schicht. Denn wem etwas durchs los wird / das ist ia seyn /  
vnd wer es yhm neme / der thet widder Gott. Vnd was ist  
lossen doch anders / denn eyn verbündnis / des wyr vnternan  
der eins werden vber einer sachen / die wyr ym die fahr setzen /  
wem sie werde durchs los. Sie ist nichts arges / sondern eyn  
fridliche vereynigung vnd verwilligung / des dings zu em  
peren odder zu haben / nach dem das messer mal odder umb  
mal tregt / nach dem es gerade oder vngerade ist / vnd so fort  
an. On das Chriſten den zusatz dazu thun / das sie glauben /  
wie Gott alle ding thut vnd schickt / so thu vnd schick er  
das auch / wilchs die heyden nicht glauben odder doch nicht  
achten.

Ja wie wenn es aber eyn solch los ist / da eyner zum tod  
düber kompt / vnd seyn heymliche sinde gesucht wird / wie  
hie mit Jona geschicht / vnd wie Saul mit seyn son Jona  
than / vnd Josua mit Achan thet. Jos. viij. Sie antworthe ich /  
Die vngleubigen mügen lassen zum todte odder zum leben /  
durch furwitz odder ernst / Was gehts vns an / was die thun /  
die nichts rechts thun? Aber das los an yhm selber bringt  
nicht mit / das man yemand tödten solle / Die Chriſten vnd  
frumen lassen auch nicht darumb. Denn hie sihestu auch / das  
diese leute ym schiff nicht gedachten Jona zu tödten / sondern  
alleyne die ursache suchten solchs vnglücks / das sie die selbi  
gen abetheten / denn sie wolten Jona nicht tödten / ob er sie  
es gleich hies / sondern wolten mit yhm zu lande / da sie aber  
nicht kundten / sahen sie / das es Gott haben wolte / wie Jona  
gesagt hatte / vnd müstens thun / wie wol gar vngerne / vnd  
betten gar fleysig etce. So thet Saul auch vnrecht / das er  
seynen son tödten wolt / denn so ferne solt er das los nicht ges  
hen lassen. Mit Josua war es eyn anders / dem ward es also  
befolhen von Gott / wie er thun solt. Warumb solten diese  
leute nicht eynen bund machen / das der die schuld haben solt  
S te / den

te/ den das los treffe: sonderlich weil sie die not dahyn drin-  
get/ die andern zu erretten / Vnd Gott so frum vnd recht ist/  
das er das los nicht lest yrrer / Gleich wie die on schuld sind /  
das sie den für vnschuldigh halten/ der den eid thut/ so er doch  
wol mag falsch schweren vnd schuldig seyn. Aber das sey auff  
dis mal dauon gnug.

**I**ch byn eyn Ebreer / vnd fürchte Gott von hymel/  
der das meer vnd trocken gemacht hat.

Hie kompt die beychte/ vnd bringt die sünde an den tag/  
Da geht auch der rechte kampff an mit Jona vnd dem tod/  
Aber doch ist das grössiste geschehen. Denn wie wol der tod  
vnd zorn Gottes daher dringen vnd mechtiglich Jonan an-  
greiffen / So ist doch die schwere last der sünden zum theil  
vom hertzen/ vnd das gewissen etwas leychter worden durch  
bekentnis der sünden / vnd der glaube ansehet zu brennen/  
wie wol gar schwach / Denn er bekennet ia den rechten  
Gott schepffer hymels vnd der erden/ wilchs nicht eyn ge-  
ringer anfang ist des glaubens vnd der selickeit / Denn eyn  
gantz verzweyffelt vnd verzagt gewissen / thut den mund so  
weyt nicht auff / sondern verstummet / odder lestert Gott/  
vnd kan nicht von Gott dencken/ halten oder reden anders/  
denn als von eynem grewlichen tyrannen / odder als vom  
teuffel/ vnd wolte nür gerne für yhm fliehen/ vñ ferne weg sein  
Ja wolte lieber / das er nicht Gott were / auff das es nicht  
müste solchs von yhm leyden / vergisset auch der beicht / vnd  
bekennet die sünde nicht/ so gar ist's ym der angst versuncken  
vnd verstockt / das es nicht mehr sihet noch fulet denn die  
angst/ vnd nür denckt/ wie es der selbigen los werde/ vnd kan  
doch nicht los werden / weyl es die sünden auff yhm behelt/  
So bleybts denn ewiglich / beyde ym der sünde vnd ym  
tod sticken.

Daraus last vns lernen / wilche die rechte kunst vnd der  
rechte

rechte griffist / aus aller not vnd angst zu komen / nemlich /  
das man für allen dingen der sünden acht neme / flux eraus  
damit vnd frey bekand / So hats denn nymmer so grosse sache  
odder not. Denn es mus für allen dingen dem hertzen am er-  
sten geholffen sein / das es leichter werde vnd lufft kriegen / dar-  
nach ist dem ganzen leybe deste bas zu raten. Also mus am er-  
sten das gewissen von seyner last rettunge vnd lufft kriegen /  
so wird aller not wol rad funden / Denn ynn solchem fall /  
wenn Gotts zorn kompt / sind die zwey stücke da furhanden /  
Die sünde vnd die angst. Wo nu die vnuerstendige hertzen  
sind / die schicken sich verkeret vnd vnrecht ynn die sachen /  
lassen die sünden die weyl stehen / vnd sehen alleyne die angst  
an / wie sie der selbigen möchten los werden / Das hilfft denn  
nicht / vnd müssen also verzweyffeln. Vnd auff diese weyse  
thut alle vernunfft / wo nicht gnade vnd geyst da bey ist. Aber  
wo verstendige hertzen sind / die schicken sich so / das sie die  
synne von der angst keren / vnd am meisten die sünde anse-  
hen / das sie die bekennen vnd der los werden / ob sie gleich  
ewiglich ynn der angst bleyben solten / vnd geben sich dreyn /  
wie hie Jona thut. Das ist aber aller gottlosen art vnd wey-  
se / das sie die straffe fürchten vnd achten / Aber der sünde  
achten sie nicht / wolten gerne on straffe ymer sündigen / Das  
thuts denn nicht / sondern straffe hangt ymer an der sünden.  
Widderumb der gottfürchtigen art ist / das sie die sünde  
fürchten vnd achten / der straffe achten sie nicht so fast / wol-  
ten lieber ynn der straffe on sünde / denn ynn der sünden on  
straffe / bleyben.

Das Jona hie aber sagt / Ich fürchte Gott von hymel /  
ist auff Ebreisch geredt / Denn Gotts dienst heysen sie Gotts  
fürcht / wie das aus Esai. xxviij. wol ist zu mercken / da er  
spücht / Sie fürchten mich mit menschen gebot / das ist / sie  
meynen / das sie mich ehren vnd myr dienen / mit menschen ge-  
bot. Denn Jona hengt die beyde aneynander / Ich byn cyn  
Ebreer vnd fürchte Gott von hymel / so er doch bis auff die  
S 4 stunde

stunde Gott verachtet vnd ungehorsam war gewesen. Aber er wil also sagen/ Ich ehre vnd diene nicht frembden gottern/ wie yhr/ vnd andere Heyden/ sondern dem eynigen vnd rechten Gotte. Vnd des war Jona sünde vnd schande deste grösser / das er / der des rechten Gottes diener / vnd aus dem heyligsten lande vnd volck war / solte fur allen andern abgöttischen Heyden / der ergeste vnd grossste sunder erfunden werden / das auch vmb seynet willen die abgöttischen Heyden müssen fahr vnd not leyden / So doch sonst gemeyniglich durch die diener Gottes / andern sundern geholffen wird / wie dem Könige Ahab vnd seynen nachkomen durch Elia vnd Elisa geholffen ward. Hie ist gantz vnd gar umbgekeret. Dort geniessen die bösen der frumen / Hie müssen die bösen der frumen entgelten / Vnd wird also der frumest der ergest / der erste der letzte. Das ist auch / das er sich seynere sünden also geschemet hat fur den leuten zubekennen / Denn er nicht gerne erger wolt seyn / denn die Heyden / vnd musste doch seyn.

Werfft mich yns meer / so wird euch das meer stille werden / Denn ich weis / das vmb meynet willen solch wetter vber euch kompt.

Hie las vns sehen ynn dem Jona / was der glaube von reynem hertzen vermag / vnd was er ausrichten kon / Da steht das trefflich exempel des glaubens / dauon wyr droben gesagt haben / wie er gleich almechtig ist / vnd sieget ynn allen stücken die widder yhn sind. Zum ersten nympt er die sünde auff sich von den andern / vnd bekennet / das vmb seynet willen solch wetter kome / entbindet damit vnd spricht los alle andere / vnd bleybt alleyne eyn sunder / das die andern müssen alle frum seyn. Hie mit thut er der liebe gnug vnd büffet / was er an den leuten gethan hat / da er sie ynn solche fahr bracht / vnd lest es alles vber yhm ausgehen. Vnd da findet widderumb die liebe eyne seyne danckbare stat / Denn die guten leute  
lin begeren

lin begeren solche hohe busse nicht / vnd wolten yhm die sünde gerne schencken / lassen yhn benügen an der offentlichen beicht vnd bekentnis / mühen sich widderumb mit allen krefftten / yhm widder zu lande zu helffen / vnd also liebe mit liebe vergelten / Aber es wil nicht seyn.

Zum andern nympt vnd tregt er fur Gott solch gewissen von der sünden auff sich / das er auch fur Gott zu sünden vnd zu schanden wird / als dem seyn hertz gar gewaltiglich zeuget vnd bekennet / das er sich greulich beyde an Gott vnd menschen verwirckt hat . Diese schande ist nu tausentmal grösser / das eyner fur Gott mus schamrod werden. Denn da ist denn zu gleich keyn winckel noch loch ynn allen creaturn / auch ynn der hellen nicht / da eyner möcht hyn kriecken / Sondern mus sich alle creaturn lassen ansehen vnd fur yhn stehen mit allen schanden / wie das wol fulen die bösen gewissen / wo sie recht troffen werden. Denn du must Jona hie nicht ansehen / als er wird hernach erlöset vnd widder zu ehren / sondern wie er yn der schanden sticket / vnd nicht sibet / wo er solle ymmer mehr eraus komen / Denn so eyn hertz solchs wüste odder sehe / thet yhm die schande vnd das gewissen nicht so wehe / Aber Gott thut alle ehre vnd trost aus den augen / vnd leßt eytel schande da seyn / das ist der iamer.

Zum dritten folget nu natürlich der tod nach der sünden / als die straffe / wie S. Paulus sagt . i . Cor . xv . Das gesetz ist der sünden krafft / Aber die sünde ist des todes stachel odder der schneytte . Also sibet hie Jona wol / das nichts mehr fur handen ist denn der bitter tod / gibt sich dreyn vnd spricht selbst eyn vrt eyl vber seyn eygen leben / werfft mich yns meer / als solt er sagen / Ich mus sterben / Es wird sonst nicht stille . Denn du must abermal Jona hie nicht ansehen / als vns die geschicht ansihet / Denn weyl wyr fur vns haben die ganze geschicht / wie er ist erlöset worden / dunckt es vns geringe / vnd bewegt vns wenig . Aber du must sehen / wie Jona zumut ist

S iij mut ist

mut ist ym diesem stos/der sihet nicht eyn füncklin mehr vom  
leben noch von der erlösunge / sondern eytel tod / tod / tod / ist  
da / das er mus am leben verzagen / vnd sich dem tod ergeben  
ben / Denn wo Gott also mit vns handelte / das er vns das  
leben sehen ließe ym todte / odder zeygte vnser seelen / stet vnd  
ravn / weg vnd weyse / wo sie auff treten vnd fussen solte /  
wo sie auch hyn faren vnd bleyben solte / so were der tod nicht  
bitter / sondern were als ein sprunck vber einen flachen strom /  
da man auff beyden seyten eyn gewissen grund vnd vfer si  
het vnd fulet. Aber nu zeygt er vns der keyns / vnd müssen  
von dem gewissen vfer dieses lebens / hynuber springen ym  
den abgrund / da keyn fulen / noch sehen / noch fussen / noch stö  
nen ist / sondern frey auff Gotts berad vnd enthalt / gleich wie  
hie Jona aus dem schiff geworffen wird / das er fulet / yns  
meer / da er keinen grund fulet / vnd von allen creaturn ver  
lassen / alleyn auff Gotts enthalt dahin feret.

Zum vierden tregt er ym tod auch Gotts zorn / Denn er  
ia fulet / wie der tod nicht aus gnaden / sondern aus zorn /  
durch seyne sünde verdienet / vber yhn kompt. Nu were der  
tod auch noch zu leyden vnd nicht so ganz durch bitter /  
wenn er on Gotts zorn keine / wie er denn kompt / wenn yet  
mand vmb Gotts willen vnrecht veruorteylt wird / als die  
heyligen merterer / die da wissen / das die menschen fur Gott  
yhn vnrecht thun / Drumb weyl sie eyne gute sache fur Gott  
haben / sind gewis / das Gott gnedig vnd nicht zornig ist /  
Derhalben auch dem der tod nicht aus Gotts zorn / sondern  
gnaden vnd wolgefallen daher komen / erkand wird. Aber  
wo der tod verschuldet vnd durch sünde verdienet ist / da ge  
het der zorn Gottes mit / vnd macht den tod vntreglich / das  
nichts denn tod dazu finden vnd zu fulen ist.

Nu sihe du / eyn iglichs dieser vier stücke fur sich selbs al  
leyne / ist schwerlich zu tragen auch den heyligen / vnd vntreg  
lich den



lich den gottlosen. Denn wer ist so starck / der da möchte eyn  
frölich gemüt odder des hertzen Friden haben / so er gotts zorn  
vber sich fület / ob er gleich nicht stirbt: hats doch viel gotts  
lose leute toll vnd vnynnig gemacht. Also auch / wer ist / der  
den tod nicht schewet vnd dafur zittert / ob er gleich den zorn  
gotts nicht fület noch weys: wie die heyden / odder eynen gne  
digen Gott fület / wie die heyligen. Also ist auch auff erden  
keyn grösser last / denn die sünde vnd gewissen / Denn wer  
kann leyden / das er für Gott vnd der welt zu schanden wer  
de: Wer wolt nicht lieber tod seyn / denn also leben: Aber  
auff diesen armen Jona fallen diese stück allzumal / vnd dren  
gen vnd engsten yhn zu verzweyffeln an gotts gnaden vnd  
vom glauben zu fallen / Wilch eyn kampff ist da ynn seyn her  
gen geweest: Da hette er wol auch mocht blut schwirzen für  
angst / Da mus er widder seyne sünde / widder seyn eygen ges  
wissen vnd fülen seyns hertzens / widder den tod vnd widder  
gotts zorn / zu gleich auff ein mal fechten / Da wird seyne seele  
an eyn seiden faden vber der hellen vnd ewigem verdammis  
gehangen haben. Es ist gros ding ynn dem hertzen began  
gen durch gotts krafft / das er ist blieben vnd erhalten / Denn  
das er ynn glauben sey blieben / beweyset seyne erlösunge wol /  
Gott hilfft keynem gottlosen aus solchem tod vnd iamer / so  
bekennet er selbst / er sey Gotts diener / vnd gibt sich ynn die  
straffe / wilcher keyns zu thun vermöchten alle gottlosen / son  
dern verzweyffelten alle ynn sünden.

Vber das hat er zum funfften noch mehr vnglucks / Das  
meer wird seyn tod bette / das er mus eynzelen sterben / vnd  
niemand vmb yhn ist / der yhn tröstet / sondern die leute mit  
dem schiff weg faren / vnd lassen yhn da mitten ynn meer / als  
gewislich ersoffen vnd verloren. Vnd zum sechsten / hat es  
noch ynn meer keyn ende / vnd ist an eynem todte nicht gnug /  
mus noch dazu dem walfisch ynn den rachen faren / Damit  
sich Gott gar grewlich hat lassen ansehen / als sey er so zorn  
nig / das

nig/ das er am tode vnd an der straffe / der sich Jona willig  
ergibt / nicht wolle gnüge haben / sondern könne sich nicht  
grewlich gnug an yhm rechen. Denn es kan freylich des  
Walfisches rachen nicht anders denn eyn schrecklich bilde  
gewesen seyn / dem armen verlorren vnd sterbenden Jona /  
da sich das maul des fisches so weyt hat auff gethan / vnd die  
scharffen zene umbher gestanden / wie spitzige seulen odder  
balcken / vnd so ein weyter kellershals / ynn den bauch hynein.  
heyst das trösten ym tod? Ist das der freundliche blick ym  
sterben / das sterben vnd tod nicht gnug seyn sol? Das heyst /  
meyn ich / eyn glaube / ia eyn kampff vnd streyt des glaubens /  
Da ist eyn sieg vnd triumph / vnter der grösssten schwacheyt  
verborgen. Wie zeigt vns hie gott / was sein wort vnd glaube /  
vermag / das alle creaturn yhm nichts mügen abbrechen /  
noch Gotts zorn selber / wenn gleich alles auffshöbest vnd  
grewlichst tobet. Aber Jona hat aller welt hie mit müssen  
zeygen / wie seyn hertz gestanden sey vnd wie eyns iglichen  
gleubigen hertz ynn gleicher anfechtunge stehe / wie wyr her  
nach hören werden / Denn gleich wie das meer mit aller vn  
gestümickeyt Jona erseuffen wil / dazu der walfisch yhn ver  
schlingt vnd verzeren wil / also fulet das gewissen eytel vnge  
stüm von Gotts zorn vnd tod / vnd wil die helle vnd ewiges  
verdammis schlecht die seele fressen etc.

Vnd Jona war drey tage vnd drey  
nacht ym bauch des fisches.

Das sind freylich die lengsten tage vnd nacht gewesen  
die vnter der sonnen yhe komen sind / so man auff Jona ge  
dancken sihet. Denn es hat yhn müssen aus der massen lang  
düncken / das er also ym finstern ist gefessen / Ja ich halt / er  
habe zu weylen gelegen vnd gestanden / Er hat ia widder  
sonn noch mond gesehen / vnd gar keine stunde zelen mügen /  
Er hat auch nicht gewust / wo er ym meer umbher gefaren ist  
mit dem

mit dem fisch. Wie offft mügen yhn die lunge vnd lebern ges-  
schlagen haben. Wie wundersam ist seyne wonunge da gewe-  
sen vnter dem eingeweyde vnd grossen rieben. Aber er ist so  
gar ym tod gefangen gewesen / das er sich nicht viel bekümert  
hat vmb den fisch / vnd ymer gedacht / wenn / wenn / wenn /  
wils doch ein ende werden. Hilff Gott wilch ein wunderlich  
werck ist doch das / Wer kan es gnugsam bedencken / das ein  
mensch sol drey tage vnd nacht so einsam / on liecht / on spey-  
se / mitten ym meer / ym fische leben vnd widder komen. Das  
mag wol eine seltsame schiffart heysen / Wer wolts auch  
glauben / vnd nicht fur eine lügen vnd meerlin halten / wo es  
nicht ynn der schrift stünde.

Gott hat vns damit beweyset / wie gewaltiglich er den  
tod vnd alle ding ynn seiner hand hat / vnd wie gar leicht es  
yhm sey / vns zu helfen / auch ynn vnaussprechlichen vnd ver-  
zweyffelten nöthen / das wyr doch so gar schwerlich konnen  
glauben. Er ist allenthalben gegenwertig ym tod / ynn der  
hellen / mitten vnter den feinden / ia auch ynn yhrem hertzen.  
Denn er hats alles gemacht vnd regiert es auch alles / das es  
mus thun was er wil. Es ist aber vmb vnser willen geschrie-  
ben / vnd wird auch vmb vnser willen / so wunderbarlich sey-  
ne almechtickeit beweyset / das wyr yhm trawen vnd glauben  
sollen / wyr seyen ym tod odder ynn der feinden hende. Denn  
vmb seynen willen durfft ers widder thun noch schreiben las-  
sen. So darffs Jona auch nicht fur sich / das es geschrieben  
werde / Vnd wie wol alle welt weys von göttlicher almech-  
tickeit zu sagen / vnd dunckt yederman leicht zu glauben /  
wenn ers höret sagen. Aber ynn der erfahrung leret sichs wol /  
wie viel es mit rechtem hertzen glauben / da eyner sol leyb vnd  
leben auff solch wort von der almechtickeit gotts wagen /  
vnd selbst durch tod vnd sund / erfahren / das war sey / wie das  
wort dauon lauret. Diese erfahrung wird auch den grössisten  
heyligen schwerc zu erleyden. Doch ist tröstlich zu wissen  
G vnd solch

vnd solch exempel kennen / wie der Prophet ym Psalter rühmet / Herr ich dacht an deyn thun / das tröstet mich etc.

So nu Jona dahin ist / vnd der welt vnd yhm selbst gestorben ist / das keyne hoffnung mehr da ist seynes leben. Denn diese leute ym schiff wissen nicht anders / Er müsse erschauften vnd sterben / weil sie Gott bitten / er wolle sie nicht lassen vmbkommen vmb Jona seele willen / noch yhn vnschuldig blut zu rechnen / Damit sie ia bekennen / das sie Jona nyrgent sehen denn ym todte / vnd müssen yhn / göttlichem willen zu gehorchen / helffen tödten / wie wol gar vngerne. Da gehet an aller erst das leben vnd die frucht des tods Jona / Denn er wird ym tod gewaltiglich bey dem leben erhalten / so werden die leute auch vom tod / dazu auch vom vnglauben vnd sünden erlöset vnd zum erkenntnis Gottes gebracht / das sie frum vnd rechte gotts diener werden / so gar demütig vnd fürchtam / das sie auch da sich für sünden fürchten / da eytel gehorsam gotts ist / Denn sie Jona ia gerne bey dem leben erhielten vnd fürchten sich für dem mord / das sie yhn erschuffen solten / Vnd sehen doch / das es Gott so haben wil / Wie reyne gottfürchtige vnd Christliche gewissen haben sie da / die zuvor nach keynem mord / noch gotts gehorsam gefragt hetten / faren zu vnd opffern vnd geloben Gotte gelübde / vergessen sind alle die mancherley götter / die sie voryhn anriessen / Vnd solchs geschicht alles durch vrsachen des Jonas vnd seynes sterbens. So gar nützlich mus ein diener gotts seyn / das nichts an yhm sey / damit nicht andern nutz vnd frumen geschehe. Was Gottes fürchte heysse / ist droben gesagt / nemlich Gottes dienst / Denn rechter Gottes dienst ist Gott fürchten vnd ehren / also haben diese leute auch Gott gefürcht / das ist / sie sind Gottes diener vnd gottfürchtige leute worden.

Das ander Capitel.

Vnd Jona

Vnd Jona bettet zum **HERRN** seynem Gott  
ynn dem leybe des fisches vnd sprach.

Nicht das er so eben diese wort mit dem munde geredt  
vnd so ordenlich gestellet habe / Denn so wol ist yhm nicht  
gewesen ynn solchem grewlichen tod / das er hette mügen ein  
solch sein liedlin tichten / Sondern er zeygt damit an / wie  
yhm zu mut gewesen ist / vnd was seyn hertz fur gedancken  
gehabt habe / da er mit dem tod ynn solchem kampff gestan-  
den ist / Denn wie ich gesagt habe / wyr müssen Jona ynn das  
hertz sehen / ehe er aus der not kompt / da er noch stickt ynn  
todte / vnd yhn schlecht fur eynen todten menschen halten /  
Denn er wuste nicht von seyn erlösunge / sondern dachte  
nicht anders / denn es müste gestorben sein / vnd hat also den  
tod geschmackt vnd gefulet / vnd ist on vnterlas gestorben /  
Darnach aber als er ist genesen / vnd widder lebendig wor-  
den / hat er hyndersich gedacht / vnd solch gebet ynn schrift  
verfasset / Gott zu lobe vnd den menschen zu nutze. **Hie kome**  
**ni her** / wer so furwitzig ist / vnd gerne wissen wolte / wie es  
vmb die todten stehe / Denn viel sind / die gerne Lasarum het-  
ten gefragt / was er doch gemacht / gedacht / gefulet vnd ges-  
ehen hette / da er vier tage ym grabe lag / Johan. xi. also auch  
andere todten die Christus vnd die Propheten vnd Apostel /  
vom tod aufferweckt haben. Es faren aber etliche leichtfer-  
tige schwerer herein / vnd schreiben / wie sie sollen solch greu-  
lich ding gesehen haben / das sie hernach yhr lebenlang nie  
sind frölich worden / Die andern lassens bleyben bey dem spru-  
ch Sapien. ij. Es ist nie keyner von todten komen / der vns sa-  
ge / wie es dort zu gehe. Ich aber wil hie lassen lasarum vnd  
ander todten faren / vnd bey der schufft bleyben / die do sagt /  
sie schlaffen. Denn mich dunckt / das solcher schlaff habe sie  
so gar ynnen / das sie nichts fülen noch sehen / viel weniger  
denn man ym natürlichen schlaffe fulet / Vnd wenn sie auff-  
erweckt werden / geschehe yhn / das sie nicht wissen / wo sie  
gewest sind

gewest sind. Diese wollen wir für uns nemen / die nicht so schlaffen / vnd doch tod sind / vnd ym tod den tod vnd die hellen fulen / welche wir noch für lebendig halten. Aber nach yhrem fulen zu rechnen ( darnachs denn auch zu rechen ist / vnd nicht nach vnserm ansehen ) sind. sie tod vnd ist keyn leben mehr da / Die sollen uns die rechte warheit sagen vnd den furwitz büßen / wie es gehe nach diesem leben / sonderlich den bösen

**I**ch rieß den **HERRN** an ynn meynem trübsal /  
vnd er antwortet myr / Ich schrey zu meynem  
Gott ynn dem bauch der hellen vnd du  
erhöretest meyne stymme.

Zum ersten hebt er an Gottes gnade vnd hulffe zu preysen vnd zu dancken / das er yhm aus der not geholffen hat / helt uns damit am ersten für gotts güete / darnach seyne not / daraus yhm geholffen ist. Vnd leret uns dieser erste vers zwei grosse vnd nötige lere. Die erste / das man ia für allen dingen balde zu Gott lauffe vnd schreye ynn der not zu yhm vnd klages yhm. Denn das kan Gott nicht lassen / er mus helffen / dem der do schreyet vnd rufft / Seyne göttliche güete mag sich nicht enthalten / sie mus hören. Es ligt nür daran / das man ruffe vnd schreye zu yhm / vnd schweyge ia nicht / Den kopff nür auffgericht vnd die hende auffgehoben vnd flux geruffen / Hilff Gott meyn herr. etc. So wirstu als bald fulen das es besser wird / Kanstu ruffen vnd schreyen / so hats freylich keyne not mehr / Denn auch die helle nicht helle were / noch helle bliebe / wo man drynnen rieß vnd schrye zu Gott. Denn das du viel heulen vnd weynen wilt / vnd dich lange mit dem trübsal wilt beyssen vnd fressen / odder dich umbsehen wer dyr helffe / das ist verloren / damit kumpstu nicht eraus / sondern tieffer dryn. Höre wie Jona thut / er hat sich auch lange mit der angst gefressen / ehe er geruffen hat / Wie er selbst

er selbst hernach wird sagen / er were sonst wol ehr erlöset /  
Er heyst auch vnd leret dich solchs nicht zuthun vnd yhm  
folgen / sondern flux form an setzt er / wie er geruffen habe / vnd  
also erlöset sey.

Aber es gleubt keyn mensch / wie schwer es wird / solch  
anruffen vnd schreyen zu thun. Heulen vnd Klagen / zittern  
vnd zweyffeln / vnd vns auff das aller scheuffelichst stellen /  
können wyr wol / Aber ruffen das wil nicht eraus / Denn da  
drückt vns vnter vnd ligt auff dem halße / das boße gewissen  
vnd die sünde / da schlecht denn zu / das man Gott zornig fuß  
let / das sind solche laste / das die ganze welt nicht so schweer  
ist. Kurtz vmb / der natur alleyn oder eynem gottlosen ist  
vnmüglich widder solche last sich auffrichten / vnd gleich  
den Gott selber anruffen / der da zornet vnd strafft / vnd zu  
keynem andern lauffen. Wie Isaias viel mal schreybt / das  
das volck sich nicht habe gekeret zu Gott / der es schlug. Die  
natur ist viel mehr geschickt / das sie fliehe fur Gott / wenn er  
zurnet oder strafft / schweyge denn / das sie sich solte zu yhm  
wenden vnd yhm anruffen / vnd sucht ymer anders wo hulf  
se / vnd wil dieses Gotts nicht vnd kan yhm nicht leyden. Dar  
umb fleuget sie auch ewiglich / vnd entfleuget doch nicht /  
vnd mus also ym zorn / sund / tod vnd helle bleiben verdampt.  
Vnd hie sihestu der hellen eyn gros stucke / wie es den sun  
dern gehet nach diesem leben / Nemlich / das sie Gotts zorn  
fliehen vnd nymmer mehr entfliehen / vnd doch nicht zu yhm  
schreyen noch ruffen Widderumb aber spricht Isaias. xxviij.  
Wer auff den ecksteyn Christum trawet / der wird nicht flie  
hen / als solt er sagen / Alle gottlosen fliehen ewiglich fur Got  
vnd seynem zorn / vnd können doch nicht entfliehen / fur wil  
chem engstlichem fliehen die gleubigen sicher sind durch  
Christum.

Es kan natur nicht anders thun noch sich schicken /  
denn wie sie fulet / Tu sie aber Gotts zorn vnd straffe fulet /  
helt sie nicht anders von Gott / denn als von eym zornigen

G iij tyrannen /

tyrannen / kan sich nicht vber solchen zorn schwingen / odder  
vber solch fulen springen / vnd durch hyn widder Gott zu  
Gott dringen vnd ruffen. Drumb da Jona so ferne komen  
ist / das er rieß / da hatte er gewonnen. Also dencke vnd thu  
du auch / schlahe nicht den kopff nydder odder fensch / son-  
dern stehe stille vnd far vber dich / So wirstu erfahren / das dis-  
ser vers war sey / Ich rieß ynn meynen angst zum herrn / vnd  
er antwortet myr. Zum Herrn / zum Herrn / vnd sonst nyr-  
gent hyn / eben zu dem der da zurnet vnd strafft / vnd zu keyn-  
nem andern. Das antworten aber ist / das es balde besser  
wird vnd wirst balde fulen / das der zorn gelinder / vnd die  
straffe sensster wird. Vngeantwort lest er nicht / wenn du nur  
ruffen kanst / Vnd nicht mehr auch denn ruffen kanst / denn  
er fragt nach deynem verdienst nicht / weys wol / das du eyn  
sunder bist / vnd den zorn verdient hast / Er straffte dich sonst  
nicht. Aber das kan die natur auch nicht lassen / sie wil ymer  
etwas mit bringen / das gott versune vnd findet denn nichts /  
Denn sie gleubt vnd weys nicht / das alleyn das ruffen gnug  
sey / gotts zorn zu stillen / wie Jona hie vns leret. Also sind al-  
le menschen gethan / Wenn Gott nicht zurnet noch strafft /  
sondern gibt gnug vnd thut vns wol / so sind wyr so frech /  
Eyne / stolz vnd thürstig / das niemand kan mit vns aus ko-  
men. Da hilfft keyn dreyen / keyn schrecken / keyn exempel  
Gotts zorns / Es ist alles eytel spot vnd verachtung. Aber  
widderumb wenn Gott strafft / sind wyr so verzagt vnd blö-  
de / das keyn trost / keyn gut / keyn gnade vns mag auffrich-  
ten noch stercken / Also wie es Gott mit vns macht / so sind  
wyr doch keyn nütz. Sihe wie stolz die baur / wie verzagt  
die herrn / waren ynn dieser nehisten grewlichen auffrur. Da  
halff widder flehen noch schrecken bey den baur / widder  
trost noch vermanen bey den herrn. Jzt widderumb ist bey  
den herrn auch keyne masse yhis trotz vnd vbermuts / hilfft  
aber mal keyn dreyen noch schrecken / bis sie widder Gotts  
zorn fulen. Art leest von art nicht.

Die ander



Die ander lere ist/ das wyr also schreyen/ das wyr auch  
ym hertzen fulen/ es sey eyn solch schreyen dem Gott antwor-  
te/ vnd auch mügen mit Jona rhümen/ das vns Gott ant-  
worde/ wenn wyr ynn der not ruffen. Das ist nu nicht anders  
denn mit rechtem glauben des hertzen ruffen/ Denn der kopff  
lest sich nicht auffrichten/ noch die hende sich auffheben/  
das hertz sey denn zuuor auffgericht/ Wilchs sich also auff-  
richtet/ wie ich gesagt habe/ das es durch des geysts beystand  
zu dem zornigen Gott leufft/ vnd vnter dem zorn gnade sucht  
Lest Gott straffen vnd thar sich dennoch zu gleich seyner  
güte trösten. Da mercke du/ wilch eyn scharff gesichte das  
hertze müsse haben/ das mit eytel zorn vnd straffe von Gote  
vmbgeben ist/ vnd doch keyne straffe noch zorn/ sondern gna-  
de vnd güte sibet vnd fulet/ Das ist/ es wil sie nicht sehen  
noch fulen/ ob sie es gleich auffhöhest sibet vnd fulet/ Vnd  
wil die gnade vnd güte sehen vnd fulen/ ob sie gleich auff-  
tieffest verborgen sind. Sibe eyn solch gros ding ist/ zu  
Gott zu komen/ das man durch seyner zorn/ durch straffe  
vnd vngnade zu yhm breche/ als durch eytel dornen/ ia durch  
eytel spieße vnd schwerdter. Das heyst eyn ruffen des glau-  
bens/ wilchs sich mus fulen ym hertzen/ das er Gott tresse/  
gleich wie Christus fulete/ das eyne krafft war von yhm aus-  
gangen/ da er der frawen den blutgang stilltet/ Denn des  
geysts wort vnd werck fulet man/ das sie treffen vnd nicht  
feylen/ Wilche aber so hin schreyen vnd beten ynn den wind/  
Es tresse odder tresse nicht/ das ist nichts/ vnd schafft auch  
nichts/ Es ist mehr ein spot vnd heuchley fur Gott.

Das ander teyl dieses verses/ ist eben das selbige/ das izt  
gesagt ist/ Denn es ist ein ding. Ruffen zu dem herrn ynn der  
not vnd antwort kriegen/ Vnd schreyen zu Gott aus dem  
bauch der hellen vnd die stymme erhöret werden/ Er zeu chts  
aber zwey mal an/ das es deste gewisser sey/ vnd wyr deste be-  
stendiger solchs glauben/ es gehe also zu/ wie er sagt/ fur gott.  
Denn die

Denn die schrift hat die weyse / eyn ding zwey mal zu sagen  
auffeynander / darumb das es gewis also sey / wie Joseph Ge.  
pli. die zweene trewme Pharao auch auff eyn ding deutet / der  
ursachen halben / das es gewis sey. etc. Das er aber sagt / ynn  
dem bauch der hellen / meynet er den bauch des fisches / vnd  
nennet yhn / der hellen bauch / nicht das der fisch die helle sey /  
Sondern der bauch ist yhm eben so viel gewest als die helle /  
Vnd Jona seyne helle drynnen hat / gleich als er möchte  
sprechen / Aus dem bauch des tods / nicht das der fisch der  
tod sey / sondern das Jona seynen tod drynnen leyd. Denn  
er redet hienicht / was der fisch sey / sondern wie yhm zu synn  
gewest sey ynn dem fisch / nemlich / das yhn gedaucht hat /  
er were hynuntern ynn die helle / da er dem fisch ynn den bauch  
fur / vnd wol mocht also sagen / Aus dem bauch meynes hel-  
len / oder aus dem der meyne helle war.

Was aber die helle sey fur dem iungsten tage / byn ich  
noch nicht alzu gewis. Denn das eyn sonderlicher ort sein sol-  
te / da die verdampften seelen izt ynnen seyen / wie die maler  
malen vnd die bauch diener predigen / halt ich fur nichts /  
Denn die teuffel sind ia noch nicht ynn der hellen / sondern  
wie Petrus sagt / mit stricken zur hellen verbunden / So heyst  
sie S. Paulus der welt regenten vnd gewaltigen / die dro-  
ben ynn der lufft schweben / Christus auch den teuffel der  
welt fursten nennet. Vnd ia nicht seyn kundte / wenn sie ynn  
der hellen weren / das sie die welt regierten vnd so viel buberey  
vnd iamer trieben / Die peyn würde yhn wol weren. So redet  
auch die schrift von vielen heyligen / das sie hynuntern ynn  
die helle faren / wie hie Jona. Item wie Hiob / vnd wie Jacob  
Gen. xxxvi. spricht / Ich mus betribt hynuntern ynn die helle  
faren zu meynem son. Derhalben braucht die schrift des  
worts Scheol fast dazu / das sie des todes letzte nöthen vnd  
angst anzeyget der ienigen / so da sterben / Denn wie den selbi-  
gen zu synn ist / so redet sie / Es ist yhn aber zu synn / alsüren  
sie hynuntern

ſie hynunter ynn die helle / das iſt / ynn Gottes zorn ſincken  
ſie / wie wol ſie keynen ort wiſſen / da ſie hyn faren / Denn eyn  
iglicher hat ſeyne helle mit ſich wo er iſt / ſo lange er die letzte  
nöten des todes vnd Gottes zorn fulet. Auff die weyſe deutet  
S. Petrus Act. iij. den xv. Pſalm von Chriſto / Du wirſt meine  
ſeele nicht ynn der helle laſſen. ect. vnd ſpricht / Gott habe die  
ſchmerzen des tods auffgelöſet / das S. Petrus durch die  
hellen / des todes ſchmerzen / ſo Chriſtus fulet / da er verſchied  
am creutze vnd da hyn ſang vnd für ynn gottes gewalt / wil  
bedeutet haben. Aber am iungſten tage wirds freylich eyn an-  
der ding werden / Da eyn ſonderlicher ort die helle ſeyn wird /  
odder da die ſeyn werden / die ynn der hellen odder ewigen  
zorn Gottes ſo verdampt ſind. Aber dauon gnug / Es ligt  
nicht gros dran / ob yemand halte von der hellen / wie man  
malet vnd ſagt. Es wird doch ſo vnd noch viel erger izt ſein  
vnd denne werden / wenn yemand ſagen / malen odder  
dencken kan.

Du warffteſt mich ynn die tieffe mitten ynn  
meer / das mich die flut vmbgaben. Alle deys  
ne wellen vnd wogen giengen vber mich.

Hierzelet er nu die ſtücke / darinnen man ſehen kan / wie  
ſein hertz geſtanden iſt / ehe denn er zu Gott ſchrey vnd der  
glaub ym kampff vnd ſchyr vnterlag. Da vergiſſet er der leute  
die yhn yns meer worffen vnd ſpricht / Gott habe es gethan /  
Du (ſagt er) Du warffteſt mich etc. Denn ſo fulet ſichs auch  
ynn gewiſſen / das alles vnglück / ſo vns vberfellet / ſey Gottes  
zorn / vnd alle creaturn duncken eynen / eytel Gott vnd gottes  
zorn ſeyn / wens auch gleich eyn rauſchen blad iſt / wie Moſes  
ſagt Levit. xvi. Es ſol ſie eyn rauſchend blad ſchrecken. Iſts  
nicht eyn gros wunder ? Nichts geringers vnd verachters  
iſt denn eyn dürr blad / das auff der erden ligt / da alle würm  
lin drüber lauffen / vnd ſich nicht eyns ſteublins erwerben kan /  
h Das auch

Das auch Hiob / da er sich auff's geringst scherzen wolt / nicht  
geringers kund finden / denn das er sich für Gott eyn durren  
blat vergleicht. Doch wenn das stundlin kompt / sol sich für  
seyn rauschen fürchten / ros / man / spies harnisch / köning / für  
sten / gantz heerkrafft / vnd alle macht / vnd solche trozige /  
türstige vnd zornige tyrannen / die man sonst mit keyner hel  
len / noch mit keynem Gottes zorn / noch gericht kan schrecken /  
sondern nur stolzer vnd verstockter dauon werden. Sind  
wyr nicht seyne gesellen : für Gottes zorn fürchten wyr vns  
nicht vnd stehen steiff / Vnd fürchten vns doch vnd fliehen  
für dem zorn eynes amechtigen durren blads / Vnd solchs  
blads rauschen sol vns die welt zu enge machen vnd vnser  
zorniger Gott werden / die wyr zuuor hymel vnd erden poch  
en vnd trozen kunden. Wyr mügen vns fürwar wol rühmen  
vnser stercke vnd macht. Vermag solchs vber vns eyn durre  
blad / was solt nicht das tieffe meer thun / da hie Jona von  
sagt : Ja was wil am iungsten tage das hellische feu thun /  
vnd die maifestet Gottes selbs mit allen engeln vnd creaturn :

Also spricht er auch nicht / Des meeres wellen vnd wog  
gen giengen vber mich / sondern / deine wellen vnd deine wog  
gen / Darumb das er fulet ym gewissen / wie das meer mit sey  
nen wellen vnd wogen / Gott vnd seynem zorn dienen / zu stra  
ffen die sünde. Vnd spricht / alle wellen vnd wogen giengen  
vber mich / Denn so daucht yhn vnd fulet sich also / als gien  
gen alle wasser yn hymel vnd erden vber yhn / vnd were sonst  
niemand / den gotts zorn drucket denn yhn / sondern alle crea  
turn mit Gott widder yhn / Also sprechen auch etliche / so  
ym grosser angst sind / Mich dunckt hymel vnd erde liege  
auff myr. Das sind nu die rechten stücke vnd peyn / die nach  
diesem leben vber die sunder gehen. Also fehet an der zorn  
gotts vnd seyn gericht vnd weret ewiglich. Es ist aber die  
ser vers gleich dem psalm . xliij. da auch der prophet also  
spricht / Alle deyne wellen vnd wogen giengen vber mich /  
Vnd Jona

Vnd Jona hat yhm villeycht aus dem selbigen Psalm genomen.

Denn ich gedacht / ich were von deynen  
augen verstoffen / Ich wurde deynen heyligen  
tempel nicht mehr sehen.

Da trifft die straffe das gewissen / Denn er wolte für  
dem herrn fliehen / das er nicht gen Ninive gienge / das war  
seine sünde vnd ungehorsam. Zu fulet er / wie er recht von des  
herrn angesicht verstoffen mus sein / zur straffe / das er nicht  
gerne hat / der zumor nicht wolt bleiben für Gottes angesicht  
durch seyne sünde / Da hat yhm seyn hertz geklopfft vnd ge-  
sagt / Sihe da / ich meyne du hast recht geflohen vnd bist fer-  
ne gnug vom herrn komen / da beyst die sünde zu gleich / vnd  
druckt auch die peyn. Es mag aber zweyerley weyse verstan-  
den werden / das er von Gottes augen verstoffen sey / Aufss  
erst leyblich / also / das seyn hertz beschlossen hat / er müste ster-  
ben / vnd daran verzweyffelt / das er nymer mehr solte widder  
zu land lebendig komen / vnd widder vnter seynem volck für  
Gott wandeln ym lande Israel / dauon er geflohen war /  
wie wyr droben gehört haben / das von dem angesicht des  
herrn fliehen sey gewesen / das er aus dem lande Israel flohe /  
darynnen Gott wonet vnd gotts dienst war / wie denn auch  
offt ym andern buch der Könige gesagt wird / das Gott Is-  
rael habe von seynem angesicht weg gethan / vnd drawet Ju-  
da auch von seynem angesicht zu thun / das ist / aus dem lan-  
de / da seyn wort vnd dienst war. Diesen verstand gibe das  
nach folgende stück da er sagt / Ich würde deynen heyligen  
tempel nicht mehr sehen / nemlich / der zu Jerusalem war / Da  
mit bezeuget er / das er sey ym tods kampff gestanden / vnd  
sich gantz ergeben / er were des tods / Da ist der glaube ynn  
grosser not vnd angst gestanden / da ist nicht viel ruffens zu  
Gott gewesen / sondern eytel verzweyffeln am leben. Vnd ist  
nicht wunder / Wer solt des lebens yn solchem fall hoffen / so  
h ij er ynn

er ym tiffen meer / dazu ym walfisch / verschlungen vnd versuncken war :

Zum andern geystlich / das er gefulet hat / als sey er auch ewiglich von Gott verstossen gewesen / vmb seynes vngheorsams willen / wie die verdampften / gleich wie auch Dauid ym Psalter offte solchen spruch furet / als Psal. xxxi. Ich sprach ym meynem zagen / ich byn von deynem angesicht verworffen. Vnd solchs bringt natürllich die sünde ym gewissen mit sich / sonderlich ym tods nöten / Darumb hats gewislich Jona auch so gefulet / vnd ist also gestanden auch ym kampff mit der verzweyffelung an gottes gnaden vnd barmhertigkeit / ehe denn er widder zum glauben ist komen vnd geruffen hat / Da wird yhm seyn eyngesfallen allerley exempel Gottes zorns / da er die sündler gestrafft hat / als Adam vnd Heua / Cain / die sintflut / Sodom vnd Gomorra. Das ist auch der rechten stück eyns von der hellischen pein / die nach diesem leben vber die gottlosen komen wird / Vnd siehest hie ym den zweien stücken furgemalet / was die sündler nach diesem leben thun / dencken vnd machen / das da sey / eytel tods angst vnd not / zittern vnd verzweyffeln ewiglich. Aber zu solchem gedanken vnd verzweyffeln ist Jona komen aus dem / das er den zorn vnd straffe gottes leyblich vnd eusserlich fulet / wie er ym die tieffe geworffen / vnd mit den fluten vmbgeben / mit wellen vnd wogen vberfallen ward / als er droben hat gesagt vnd noch weytter erzelet vnd spricht.

Denn wasser vmbgaben mich bis an meyn leben / Die tieffe vmbbringete mich / Schilff bedeckte meyn heubt.

Wie solt ich des lebens mich mügen versehen odder trösten / so mich wasser vmb vnd vmb / als mitten ym meer gefangen hatten / Vnd schilff vber myr stund vnd mich zu deckt : Das ist so viel gesagt / Am rande vnd vfer des meers  
vnd grosser

vnd grosser seen odder teyche pflegt schilff vnd rhor zu wach  
sen/ Wer nu ym meer ersoffen ist/ der ligt vnter dem schilff  
bedeck/ das ist/ vnter dem wasser da schilff ymen wechset/  
Das also alles was ym meer vnd am meer vmbher ist/ habe  
yhn vnter sich/ auch die erde am vfer/ wie folget.

**I**ch sanck hynuntern zu der berge grunde/  
**D**ie erde hatte mich verriegelt ewiglich.

Dem alle meer/ see vnd tieffe wasser stehen ym grün  
den zwiffchen bergen/ auff ebenem lande konnen sie nicht  
bleyben/ So sind nu der berge grunde/ das tiffeste tal vnd  
boden ym meer/ da die berge vnden zusammen rüren. Solchs  
alles redet Jona/ als eyner der ym meer ersufft vnd vber sich  
gedenckt/ odder als eyner der eym zusihet odder nach denckt/  
der ersufft/ Denn so er vber sich geddenckt/ sihet er die wasser  
wogen vber sich vnd zu beyden seyten das vfer/ schilff vnd  
land odder erden/ Weyl er denn vnter scheu st vnd sinckt/ ist  
yhn/ als sincke er zwiffchen bergen zu grunde auff den boden  
hynab. Da hat yhn denn die erde verriegelt ewiglich/ das ist  
er denckt nicht anders/ denn er müsse da bleyben vnd konne  
nymer mehr widder eraus komen/ Denn gleich als eyner der  
ym thurm odder gefengnis bleiben mus/ so die thür vnd fen  
ster verriegelt sind/ also mus auch der ym meer bleiben/ wo er  
hynuntern sinckt/ So hat yhn die erde/ das ist/ die berge/ da  
das meer zwiffchen ist verriegelt/ das ist/ mit wasser also ge  
fangen vnd verwaret/ das er nicht kan aus komen. Da si  
hestu abermal/ was Jona fur gedanken hat getrieben ym  
walsisch. Essen vnd trinckens vnd alles dings ist wol ver  
gessen/ Alcyne sicht er mit tödlichen gedanken/ Ja er ver  
zweyffelt allerdinge am leben vnd ist ganz des tods. Da ist  
noch keyn ruffen zu Gott.

Aber du hast meyn leben aus dem ver  
derben gefurt. **HERR** meyn Gott.

h ij

hie wils

Hie wils nu besser werden / vnd wollen ander gedanck /  
en komen / Da richt der glaube das heubt auff vnd wil gewin  
nen / Da lassen ab die verzagten gedanken. Eben da ich am  
tieffesten ym tod war / vnd am wenigsten hoffnung / dazu  
vnmüglich war / das ich leben solte / da kamestu mit deynen  
macht vnd wunderwerck vnd furetest meyn leben aus dem  
tod vnd verderben. Also wenn der strick am hertesten helt / so  
bricht er / Darumb heyst Gott eyn nothelffer / das er denn  
hilfft / wenn alle ding verzweyffelt vnd vnmüglich sind. Aber  
wie thut er / wenn er so hilfft : Höre zu.

Da meyne seele bey myr verzagte / gedachte ich  
an den herrn / Vnd meyn gebet kam zu dyr  
ynn deynen heyligen tempel.

Zu erst / gibt er gnade vnd geyst / das hertz auffzurich /  
ten / das es an Gottes barmhertzikeit gedencke / vnd lasse die  
gedanken vom zorn faren / wende sich von Gott dem rich /  
ter / zu Gott dem vater. Aber das ist nicht menschen krafft /  
Denn Jona spricht hie / seine seele habe bey yhm verzagt / za /  
gen sey yhr krafft vnd werck geweest / Das er aber des herrn  
gedenck / vnd beginnet zu glauben / das ist nicht seiner seelen  
werck / der geyst vnd sonst niemand kan an den herrn gedenc  
cken. Wenn aber das geschicht / das des herrn gedechtnis  
yns hertz kompt / da geht eyn newe liecht auff / da blickt das  
leben widder her / da wird das hertz widderumb küne zu rus /  
fen vnd zu bitten. So ist's denn auch gewislich erhört. Das  
ist's / da Jona ym ersten vers sagt / Ich rieff zum herren ynn  
meyner angst vnd er antwortet myr. Hie hat nu der tod /  
zorn / sund / helle vnd alles verderben ein ende / vnd wird alles  
vberwunden vnd verschlungen durch den glauben auff  
Gottes güte gegründet.

Das er aber sagt / Meyn gebet kam zu dyr ynn deynen  
heyligen tempel / meynet er abermal den tempel zu Jerusalem  
da Gott



da Gott wonete zu der zeyt leyblich. Denn das volck Israel  
hatte das geseze/ das sie nyrgent musten anbeten/on wo got  
tes stete war/ die er bestympt vnd erwelet hatte/ wie er sagt/  
Exodi. xix. Wo ich meynes namens gedechtnis mache/ da  
hin wil ich komen vnd dich segenen. Also musten auch alle  
die ym lande odder aussen dem lande/ wenn sie beten wolten/  
yhr gebet da hin richten vnd yhr hertz hefften/ an die stet/ da  
Gott leyblich wonete/ durch sein wort. Auff das sie keynen  
andern Gott anbetten/ denn den/ der vber den Cherubin sass  
auff dem gnaden stuel. Dahin musten alle gebet komē/ Gleich  
wie nu zu vnser zeit ym newen testament/ alle vnser gebet  
müssen zu Christo komen/ wilcher ist vnser gnaden stuel/ das  
wyr auch keynen andern Gott widder wissen noch anbeten  
noch anrufen sollen/ on den/ der ym dem menschen Jesu  
Christ wonet leyblich/ Denn es ist auch sonst keyner mehr.

**Wilche aber sich verlassen auff eytelkeit vers  
geblich/ Die lassen barmhertzikeit faren.**

Im Ebreischen steht/ Die lassen yhre barmhertzikeit  
faren. Aber weil das ym deutschen laut/ als rede er von der  
menschen barmhertzikeit/ die sie beweysen sollen/ habe ich  
das wörtlin (yhre) ausgelassen/ vnd schlecht/ barmhertzi  
keit gesetzt/ das es deste deutlicher were. Denn Jona redet  
von Gottes barmhertzikeit vnd güte/ wilche ist vnser/ das  
ist/ vns angebotten/ verheysen vnd dargelegt/ gleich als  
wenn ich von Christo so sagte/ Wilche yhren Christum/ od/  
der yhren glauben/ odder yhr Euangelion lassen faren etc. So  
doch der keynes vnser/ sondern alles Gottes allein ist/ der es  
gibt/ Vnd doch vnser heyst/ weil es vns ist alles angebotten  
vnd surgelegt/ das wyr nemen vnd fur vnser haben sollen.  
Denn Jona strafft mit diesem vers die vnuerstendigen werck  
heyligen vnd heuchler/ die nicht auff Gottes gnade alleine/  
sondern auff yhr eygen werck trawen/ die selbigen/ weil sie  
nicht wissen/

nicht wissen / was glaube ist / Sind auch noch nie ynn nöten  
gewest / Das sie gelernt hetten / wo zu der glaube gut ist / vnd  
wie gar gute werck da nichts helffen / Die selbigen weyl sie so  
bleyben / achten sie der gnaden geringe / vnd yhr eygen thun  
halten sie köstlich. Aber Jona spricht hie / Es sey eytelkeit / das  
ist auff Deutsch / Es ist nichts vnd tang nichts fur Gott / fur  
wilchem nichts gilt / denn seyne gute barmhertzigeyt / mit  
rechtem glauben gefasset vnd bekand / on alle werck vnd ver-  
dienst vns geschenckt / Welche sich nu auff solche eytelkeit ver-  
lassen / das ist vergeblich (spricht er) das ist umbsonst vnd  
verloren / Denn es hilfft sie nichts / das yhr vertrauen odder  
verlassen ia so wenig tang / als yhr thun odder eytelkeit / da  
rauff sie sich verlassen. Hie mit rüret er ynn sonderheyt seyn  
volck Israel / das sich auff das geseze vnd die werck verlies /  
das sie das Euangelion odder Gottes gnaden nicht alleine  
faren liessen / sondern auch verfolgeten / so sie doch yhr solt  
seyn fur allen andern / als denen sie verheysen war.

Jch aber wil danckopffern / meyne gelübe wil ich  
bezalen dem **HERRN** / das myr geholffen ist.

Da rüret er abermal die Juden mit yhren opffern vnd  
wercken / als solt er sagen mit dem .xlix. psalm. Sie opffern  
ochsen vnd böcke / als gelüftet Gott ochsen fleysch vnd bocks  
blut / meinen doch / sie habens wol ausgericht. Aber ich halts  
damit / das fur Gott das danckopffer / das rechte opffer sey /  
das man yhn lobe / preyse vnd predige vmb seyne gute vns  
vnwürdigen geschehen / wie hie Jona sagt / das myr geholffen  
ist. Ihene aber wollen viel mehr von Gott gelobt vnd gepre-  
digt seyn / als die mit yhren wercken Gott grossen dienst vnd  
nutz geschafft haben. Solch erkentnis der gnaden gotts / wie  
wol sie Jona zuvor auch gehabt hat / doch hat er sie nicht so  
reichlich gehabt / als er nu ynn diesem sturm gelernet hat /  
Denn hie greyfft er ia / das Gott keyne person noch verdienst  
ansihet /

ansihet/der so unwirdigen sundern hilfft/Vorhyn war Jona  
gar tieff darynnen/das Gott auch die person ansehe vnd  
werck/sonderlich des volcks Israel/wie wol er auch noch  
nicht gar eraus ist.

Das er aber sagt/Ich wil meyne gelübde bezalen/ist  
nicht zuuerstehen/das Jona etwas gelobt hat/Denn man  
lieset ia nicht dauon/so zeygt ers auch nicht an vnter andern  
gedancken/die er ym walfisch gehabt hat/sondern alleyn sein  
gebet. Drum müssen wyr der schrifft gewonen/das wo die  
lieben heyligen ym gemeyn von gelübd vnd bezalen reden/  
vnd nicht aus drücken ym sonderheyt eyn eygens/Das da  
selbst verstanden werde das gemeyn gelübde/aller die Gotts  
volck sind. Da geloben wyr aber/das wyr keynen Gott mehr  
haben wollen/denn yhm alleyne/drum heyst solch gelübde  
bezalen nichts anders/denn bekennen/loben vnd predigen/  
vnd also ehren vnd dienen dem Herrn/wie der. xlix. psalm/  
Opffer Gott das danckopffer vnd bezale dem höhsten deys  
ne gelübde. Vnd psalm. cxv. Ich wil meyne gelübde bezalen  
dem herrn fur allem seynem volck. Also wil Jona auch seyn  
gelübde bezalen/das ist/den Herrn preysen vnd predigen als  
seynen eynigen Gott. Drum das yhm geholffen ist.

Vnd der **HERR** sprach zum fisch/vnd  
der selbe speyet Jona aus ans land.

Das ist auff rechte schrifft weyse geredt/als das Gott  
alle ding thut vnd macht/durchs sprechen odder wort/wie  
Johan. i. Alle ding sind durch das wort gemacht/vnd on  
das wort ist nichts gemacht/Vnd psalm. xxiiij. Er spücht/  
so geschichts/Er gebet/so stehts da. Also hat der fisch nicht  
müssen Jona verderwen/vnd die natur des fischs hat da  
nicht alleyne müssen stille halten von yhrer gewonlichen wir-  
ckunge vnd derwunge/sondern hat auch müssen die speyse  
widder geben/dazu ans land tragen/vnd vnuerseert aus spey  
en/Das

en/ Das also eytel grosse wunder Gott an dem Jona wirckt.  
Da ist alles vmbgekeret/ Was vorhin zum tode dienet/ mus  
zum leben dienen/ Da mus der fisch/ der vorhyn des tods ge-  
zaw war/ des lebens gezaw seyn / Vnd mus Jona durch den  
zum leben komen/ durch wilchen er zum tod gefangen vnd  
gefurt ward. Das meer mus auch raron geben/ vnd seynen  
gast gehen lassen ans land/ Zie halten der berge gründe nicht  
mehr/ der erden riegel sind weg / der schilff deckt nicht mehr.  
etc. Das ist alles vnser trost vnd zuuersicht / auff das wyr  
lernen Gott trawen / bey dem es gleich ist / tod vnd leben/  
vnd so leicht / als spiele er damit/ wenn er eyns gibt vnd das  
ander nympt / odder eyns vmb das ander wechselt / Aber vns  
sind es grosse vnmögliche ding / daran er vns seyne macht  
vnd kunst beweyset/ wie der . ciij. psalm sagt.

### Das dritte Capitel.

Vnd es geschach das wort des HERRN zum  
andern mal zu Jona vnd sprach / Mach dich  
auff vnd gehe ynn die grosse stad Nineue.

Dis wird dumber geschrieben/ das wyr mercken/ wie ni-  
chts furzunemen ist on gotts wort vnd befelch/ Denn der erste  
befelch gotts war zu nichte worden durch Jonas vngehor-  
sam/ Darumb wo es Gott nicht von newes hette gebotten/  
hette Jona nicht gewust / ob ers thun solte / Ja es solte yhm  
wol gangen seyn / wie es den kindern Israel gieng Lu. xiiij.  
die auch zum ersten nicht wolten streyten aus gotts befelch/  
darnach wolten sie von yhm selbst / vnd wurden drüber ge-  
schlagen. So gar ist nichts vnd eytel vnrecht / was men-  
schen aus eygener wal vnd freyem willen / on gotts befelch  
vnd wort / furnemen. Ober das wird bey diesem andern be-  
felch/ das hynzugesetzt/ das er predigen solle / was yhm Gott  
befelcht / das also beyde das ampt vnd des ampts wort mus  
ynn gottlichem

ynn göttlichem befelch gefasset gehen / So gehets denn auch  
recht vnd bringt frucht / Sonst wo sielauffen on Gotts be-  
felh / odder predigen anders denn Gotts wort / die thun eytel  
schaden / wie solche stücke alle beyde auch Jeremia leret vnd  
spricht / Sie lieffen / vnd ich sandte sie nicht / Sie predigeten /  
vnd ich befalch yhn nichts. Die zwey stücke las dyr gesagt sein /  
der du predigen solt / vnd mercke sie wol / sie gelten dyr vnd  
dem volck das du lereest die seelen. Also hat auch Petrus die  
zwey stücke gefasset. So yemand redet / das er rede Gotts  
wort / So yemand eyn ampt furet / das ers thu aus gottes ver-  
mögen / auff das er gewis sey / das beyde das wort vnd ampt  
göttlich / vnd von Gott befolhen sey / Denn es ist beschlossen /  
Er spricht so geschichts / durch seyn wort sollen alle ding ges-  
chehen Joh. i. Darumb alle pflanzen / die nicht der vater  
pflantz / werden ausgerentet / Denn ob sie wol gepflantz  
werden vnd auffgehen / so kómen sie doch nicht zur frucht.  
Also menschen thand gehet wol an vnd thut schaden / aber  
sie enden das nicht / das sie wollen / sondern vergehen doch zu  
legt mit yhrem thand wenn sie schadens gnug gethan haben.

Vnd Nineue war eyne stad Gottes  
drey tage reyse gros.

Warumb heyst er Nineue eyne stad gottes? War doch  
daselbst nicht der gotts dienst / tempel odder propheten. Ich  
halt sie heysse darumb also / das sich yhr Gott so an nympt /  
vnd nicht verderben wil / sondern sorget fur sie / schickt yhr ey-  
nen propheten / auff das er yhr schone / Darumb wird freylich  
die stad den rechten Gott vnd schepffer hymels vnd erden  
geglaubt haben / So hat er auch gewust / das sie seinen prophe-  
ten hören / vnd sein wort an nemen vnd sich bessern würden /  
Gleich wie die schrifft auch sagt vom Naeman zu Syrien /  
das Gott durch yhn dem land Syrien halff / Vnd den kónig  
zu Babylonien Nebucad Nezer auch seynen knecht nennet /

J ij

Damit er

Damit er anzeygt/wie er auch sey der heyden Gott/vnd nicht alleine der Juden Gott/sondern habe vnter den heyden auch die seynen.

Das die stad aber drey tage reyse gros sey/verstehen etliche also/das sie ym ringe so weyt umbfangen sey gewesen/das man ynn drey tagen habe mügen umbher gehen. Die lasse ich yhre meynunge haben./Es müste myr aber eyn eben stedlin seyn/das zwolff odder funffzehen Deutsche meylen ynn der ring mauren hette./Denn die were wol funff odder sechst meylen lang vnd breyt. Ich verstehe es also/ Das Nineue sey so gros gewesen/das man ynn drey tagen sie habe durch gehen mügen ynn allen gassen/doch nicht seer lauffen/sondern wie man auff der gassen gehet mit müssen. Denn hernach spricht er/Jona sey eine tage reyse weyt hyneyn gangen vnd habe gepredigt./Das acht ich sey eyn ort vnd strich/den man ym tage möcht durch spaciern. Dazu hilfft das wort Mahalach transitus/das heyst eyn gang wie man ynn der stad hyn vnd wider umb gehet/gleich wie Moses spricht Exo. xiiij. Der Herr sey ynn der nacht ynn Egypten gangen/vnd alle erste geburt geschlagen./Der selbige gang ist nicht eyn schnur gleicher durch lauff/sondern eyn umbgang hyn vnd wider gewesen. Eyn ander halte was er wil.

Vnd predigt vnd sprach/Es sind noch vierzig tage/so wird Nineue umbgekeret.

Eyne tage reyse weyt gehet Jona vnd predigt./Wie viel tage aber er habe zu bracht/bis er den ort vnd strich beprediget habe/ist vnberuust. Die predigt ist auch kurtzlich angezeygt/was er gesagt habe./Nemlich/Nineue wird vber vierzig tage umbkeret werden. Er wird on zweyffel nicht alleyn diese wort gered haben/sondern hat sie müssen austreichlen/warumb solcher zorn Gottes vber sie kome/vnd was fur bosheyt ynn der stad sey/vnd wie man solte frum seyn/vnd was daz

was dazu gehört/ Gleich wie man noch thut/ das man eyne  
predigt kurz ynn eyner summa fasset vnd spricht/ Er hat von  
der sunden gepredigt/ Er hat von der messen gepredigt.

Da glaubten die leute zu Nineue vnd liessen  
predigen man solte fasten/ vnd zogen secke  
an beyde gros vnd kleyne.

Ich meyne das eytel heyligen sind ynn der stad gewesen/  
das sie Jona billich eyne stad Gottes nennet/ Denn zeyge myr  
eyne stad mehr ynn der weyten welt/ die yhr sey zu gleichen/  
wenns auch gleich die heylige stad Jerusalem were. Denn  
sihe sie doch an/ Jona hat nur eyne tage reyse gepredigt/ vnd  
sie haben yhn nicht alle gehört/ vnd bekeren sich doch alle/  
Jerusalem haben nie mügen/ widder Christus noch alle apo-  
stel noch propheten/ durch yhr wort vnd wunder dahyn  
mögen bringen/ ob sie gleich lange damit umbgangen vnd  
durch vnd durch gepredigt haben/ das Gott auch hie möchte  
sagen/ wie Christus Matt. viij. vom heubtman sagt/ Ich hab  
besolchen glauben nicht funden ynn Israel. Ja zu Jona zey-  
ten war Israel vnd Jerusalem fast böse/ da Nineue frum  
wird. Wie wol ob Jerusalem des gleichen gethan hette/ als  
zun zeyten David/ Salomo/ Ezechia/ Josia/ were es doch  
nicht solch wunder/ weyl sie Gottes gesetz/ so viel propheten/  
so viel gottsfurchtiger könige/ fursten priester vnd ander treff-  
liche leute hatten/ die teglich trieben vnd anhielten. Aber zur  
zeyt Jona ist Nineue die beste vnd gröste stad auff erden vnd  
hat keyne gleiche.

Diesen ort des propheten Jona pflegen die Sophisten  
auff die werck zu zihen/ vnd sagen/ da da sihestu/ das Gott  
die werck ansihet vnd die Ninuiten dadurch gnade erwer-  
ben/ ob sie wol heyden vnd ungläubig sind/ der frey wille kan  
sich wol zur gnaden mit wercken bereyten. etc. Hie antwor-  
te ich/ Solchem geschweiz ist Jona zuuor komen/ da er zu erst/

J. iij. ehe er

ehe er die werck erzelet / der Nineuiten glauben preysset / vnd  
spricht / Die leute zu Nineue glaubten an Gott. Solchen  
spruch Konnen sie feyn vberhüpfen / vnd vns die werck zey-  
gen. Item Jona nennet Nineue eyne stad gotts. Eyne stad  
gottes seyn vnd an Gott glauben / lest warlich nicht zu / das  
der freye wille habe diese werck gethan / sondern gotts gnade  
vnd der glaube haben solchs gethan / Vnd vmb solcher gna-  
de vnd glaubens willen / haben solche werck Gotte gefallen.  
Denn sie haben damit eusserlich yhren glauben vnd die gnade  
ym hertzen beweyset / was fur frucht Jona durch seyne pre-  
digt hat geschafft. Was solt aber nicht Gott gefallen / wo  
glaube vnd gnade zuvor ist ym hertzen / so auch die sunde  
nicht schaden / so noch vbrig bleyben?

Vnd mercke / das sie ettliche stück thun / die yhn Gott  
nicht befilhet / vnd sie doch Jona erzelet / als das sie fasten  
vnd secke anziehen. Was fraget Gott nach dem fasten vnd  
secken? Er wil das hertz haben vnd das gantze leben verent-  
dert / Gott hat sie auch nicht durch Jona gefoddert von  
yhn / sondern alleyne / das sie von yhrer bosheit liessen. Tu  
mag eyner wol ynn secken gehen vnd fasten / vnd dennoch  
eyn schalck ynn der haut seyn / wie die münche sind ynn yhren  
kappen. Derhalben er auch hernach nicht das fasten noch die  
secke preysset / sondern das sie sich bekeret hatten (spricht er)  
von yhren bösen wegen. Sie haben aber solchs gethan aus  
alter gewonheit / wie sie es von yhren vorveteren gelernt ha-  
ben / die sich also fur Gott mit secken vnd fasten gedemütigt  
haben. Eben das selbige ist auch dauon zu sagen / das sich der  
König mit seynen fursten ynn die aschen setzt / vnd so nerrisch  
ding gebent / das auch die thiere vnd das viehe nicht essen  
noch trincken sollen / dazu auch secke anziehen / vnd zu Gott  
ruffen. Wer hat yhe gehört / das vnuernunfftige thiere / sollen  
fasten / secke anziehen vnd zu Gott ruffen? Fragt Gott auch  
nach solchem thun der thiere?

Es gilt



Es gilt freylich bey Gott der thiere fasten vnd secke  
eben so viel als der menschen fasten vnd secke/ Vnd widder  
umb der menschen so viel als der thiere. Aber eyn furchtsam  
hertz vnd demütig erschrocken gewissen/ thut auch wol neri/  
scher ding/ damit es beweyse/ das es sein ernst sey/ Vnd wo es  
möglich were/ so zwunge es auch steyn vnd holtz zu trawren/  
vnd alle creaturn mit yhm zu weynen/ vnd dennoch sich dün  
cken liesse / es were nicht gnug. Denn es ist vnsprechlich vnd  
vnbegreyfflich/ was fur eyn ernst ist umb eyn recht rewiges  
hertz/ Das meynt/ es solle aller welt so zu mut seyn vnd thun/  
wie es thut/ Das wol S. Paulus sagt/ das suffzen des geysts  
sey vnansprechlich Ro. viij. Vnd David. psalm. xxxi. spricht  
er habe gebrüllet wie ein lawe/ fur suffzen seines hertzen/ das  
ist/ seyne rewe vnd suffzen ym hertzen war so gros vnd gewal  
tig/ das er aus brach mit heulen vnd weinen so greulich / als  
höret eyner eynen zornigen lawen brüllen. Wenn nu Gott  
solchen ernst sibet/ so hat er gnug/ vnd lest yhm auch solche  
nerrische dinge alle wol gefallen/ die er sonst nicht ansehe wo  
solcher ernst nicht ist. Dumb hat Jona furwar der Lüne  
uiten rewe vnd busse/ meysterlich vnd gewaltiglich ausge  
strichen/ als die hefftig/ ernst vnd thettig gewest ist.

Wollen nu die sophisten hierhümen die werck/ das die  
fur Gott gelten/ wolln wyr nicht weren/ Aber sie schawen  
drauff/ das sie den ernst auch rhümen/ aus wilchem solche  
werck geschehen/ Denn so sie die werck alleyne mit gedanken  
an sehen vnd an nemen/ on solchen ernst/ wie die angenome  
ne weyse sind ynn klöstern vnd kirchen/ sonderlich ynn der  
fasten vnd marterwochen / so sind furwar eytel narren  
werck/ als wenn man die thiere hiesse fasten büssen vnd beten/  
on busse der menschen/ Damit man nichts ausricht/ denn das  
man Gottes spottet vnd grössern zorn anrichtet. Darumb  
weyt weyt von solchen wercken/ odder mit ernst furgeno  
men. Solchen ernst aber gibt nicht der freye wille oder vnser  
kraffe/

Krafft / sondern der glaube aus des heyligen geysts krafft.  
Denn wyr sehen auch hie / das es die Ninuiten / bey den tolt  
len wercken nicht lassen bleyben / sondern vber das fasten vnd  
schreyen der thiere / greysen sie die rechten stück an vnd gebiet  
ten / eyn iglicher solle sich bekeren von seynem bösen wege vnd  
vom freuel seynen hende. Man wil ia viel die werck rhümen /  
vnd lassen anstehen das dabey stehet / nemlich / das man solle  
frum werden / auff das sie alleyn sprewn on Korn / vnd die hül  
sen on safft / die schalen on kerne opffern / vnd Gott yhr narr  
vnd spot vogel sey. Las sie vor frum werden vnd die werck  
thun die sie rhümen / darnach sol sich der hadder wol selbst  
legen. Aber nu haddern sie vmb gute werck / der sie keyne ges  
dencken zu thun / können auch nicht / wollen doch ymer das  
von plaudern vnd meyster drynnen seyn.

Secke an zihen ist auff Ebreisch gered / das es heyst ge  
ringe kleyder anthun / vnd on allen schmuck daher gehen / wie  
die thun / so leyde tragen / vnd müssen nicht so eben melseck  
odder sacktuch tragen / wie Jeremia spricht / Ich wil dem hy  
mel sack an zihen / das ist / tuncfel vnd mit wolcken finster  
machen / Vnd ynn Apoca. vi. spricht er / die sonne sey worden  
wie eyn haryn sack. Also zihen hie die thiere auch secke an / das  
ist / sie müssen mit trawren vnd sawr sehen. Gleich wie auff  
Ebreische weyse / brod vnd wasser / heyst essen vnd trincken /  
Vnd ynn der asschen sitzen / heyst sich ernyder setzen / nicht  
hoch faren vnd ynn ehren daher gehen / Nicht das sie so eben  
hätten müssen eytel brod vnd wasser brauchen / vnd ynn der  
asschen fur dem offen odder auff dem herde sitzen / Sonderit  
weyl keyn geringer speyse ist / denn wasser vnd brod / vnd keyn  
geringer kleyd / denn sacktuch / vnd keyn geringer stet / denn  
asschen / wird damit allerley geringe speyse / kleyder vnd stet  
te / gewand / wie Esaia von Babylon sagt / Ernydder Baby  
lon ernydder / setze dich ynn die asschen.

Wer

Wer weys? Gott möcht sich keren vnd rewen. etc.

Da redet der König / als zweyffel er vnd seynicht gewis /  
das gott gnedig seyn wolle / wilchs doch der glaube foddert /  
odder ist nicht glaube. Aber er zweyffelt nicht / sonst hette er  
so nicht gethan vnd sich so nicht gestellet / Denn zweyffeln  
russt nicht zu Gott / vnd wendet nicht solchen ernst fur. Es  
geht also zu / das eyn recht rewig hertz / fur furcht ym kampf  
stehet vnd sicht mit dem verzweyffeln / vnd hat noch nicht  
gewonnen / darumb redet es / als sey es vngewis / Aber ym  
der warheyt / so lauts nicht anders / denn als sey es noch nicht  
hyndurch / sondern sticke ym der erbeyt vnd not. Wenn nu  
keyn glaube da were / so hielte es nicht ym solcher erbeyt vnd  
not / Darumb sind diese wort viel mehr zeychen / das glaube  
da sey / aber eyn solcher glaube / der ym furcht steht vnd sicht /  
vnd doch Gotts gnaden fur augen hat / wie er hie spricht /  
Gott möcht sich keren vnd rewen etc. Das ist / es ist ia noch  
güte dahinden / vnd nicht eytel zorn.

Es ist nicht not hie die spitzigen frage zu handeln / wie  
sich Gott kere vnd rewe / vnd las yhm leyd werden / so er doch  
vnuandelbar ist / damit sich etliche hoch beküern / vnd ma-  
chen yhn selbs schwer ding draus. Da last vns viel mehr auff  
sehen / wilch ein trefflicher glaube ym den leuten gewest ist /  
Die nicht alleyne das gleubten / das Jona predigt / wie die  
stad würde vntergehen / Sondern auch Gottes gnaden sich  
thüren vertrösten / wie wol sie dauon keyne verheysung von  
Jona hören / sondern alleyne die drewe wort / Das erste stücke  
ist gros / das so eyne mechtige stad vnd König so bald erschre-  
cken / vnd sich so hoch furchten fur Gott / vnd so tieff demü-  
tigen / von eynes mannes cyniger predigt / vnd nicht den-  
cken / warumb sie fur allen andern stedten ym der welt / so  
eben müsten sunder vnd verdampft seyn. Wie steyff stund So-  
dom vnd Gomora widder Loth: Wie feste hielt Pharao  
widder

A

widder

widder Mosen vnd Aaron: Wie verstockt bleyb Jerusalem  
widder Christum vnd die Apostel: Wie tobete vnd wütete  
Roma widder die Christen allzumal: Wie trozig sind noch  
itzt Fursten vnd Bischoff widder das Euangelion: Es ist  
furwar die ganze welt eytel buben / ia teuffel gegen diese leute  
zu Nineue / vnd sie eytel engel gegen die welt.

Das ander stücke ist noch grösser / das sie ynn solcher  
furcht vnd angst nicht verzagen / vnd haben doch keyne ver-  
heysung. Lieber woran halten sie sich / das sie nicht verzwey-  
ffeln: so viel Propheten / so viel Apostel / so viel schrifft / so viel  
bücher / prediger vnd tröstlicher wort haben wyr / vnd kon-  
nen dennoch nicht Gott wol trawen / Das vnser reichum  
ynn gotts wort / wol möcht ein meer heysen / gegen eym trös-  
pff lin das sie gehabt haben / Denn sie haben ia nichts mehr  
können haben / on das eynige wort / Das Gott hymel vnd er-  
den geschaffen habe vnd rechter Gott sey / das ist / das er gü-  
tig vnd gnedig sey / Solch stücklin machen sie yhn so trefflich  
nützt zu yhrer selickeyt / vns beyde Juden vnd Christen zu al-  
len schanden / die wyr vns so reichlich vberfluss ynn Gottes  
wort nicht können die helfft so nütze machen / Darumb sie  
auch Christus Matt. xij. den Juden vnd vns allen auffruckt  
vnd spricht / Die leute zu Nineue werden aufftreten am iung-  
sten gericht vnd dis geschlecht verdamnen / Denn sie büßeten  
durch die predigte Jona / Vnd sihe / hie ist mehr denn Jona.  
vnd das nicht vnbillich / weil wyr nicht die helffte des ernstes  
fur wenden / mit so viel tausent drawen vnd verheysungen  
Gottes vermanet / da die Nineuiten aus eynem drawenwort  
erschreckt / on eyniche verheysung getröstet / so reichen glau-  
ben beweysen. Aber es gehet so zu / Wo wenig Gottes wort  
ist / da ist gros hunger vnd ernst darnach / Wo es vberflüssig  
ist / da ist man seyn vberdrüssig vnd verachtet es.

Da sahe Gott yhre werck an / das sie sich be-  
kereten von yhrem bösen wege .etc.

Zie / Zie

Hie/ Hie/ werden die werck gepreyset/ Was wollen wyr  
da widder sagen? Hie haben die werckheyligen gewonnen.  
Ja fein gewonnen/ Siehe auff den text/ Er spricht/ Gott sahe  
yhr werck an/ das ist/ sie gefielen yhm wol/ Aber was waren  
es fur werck? Er deutet sie selbst vnd spricht/ Sie kereten sich  
von yhrem bösen wege. Solche werck thu vnd lere/ so gonnen  
wyr dyr nicht alleyne den rhum der werck/ sondern wollen  
sie helffen rhümen/ Von bösen wegen sich keren/ ist nicht eyn  
geringe werck/ Es begreyfft nicht ynn sich fasten vnd secke/  
sonder gleuben an Gott von hertzen vnd den nechisten lieben  
als sich selbs/ das ist/ es foddert den ganzen menschen/ frum  
vnd gerecht/ beyde ymnerlich vnd eusserlich/ an leyb vnd seele/  
Denn Gott foddert den ganzen menschen vnd mag der  
helblinge vnd heuchler nicht.

## Das vierde Capitel.

Das verdros Jona fast seer / vnd ward  
zornig vnd bettet zum **HERRN**.etc.

Das ist myr yhe fur war / eyn wunderlicher / selzamer  
heylige/ der da zürnet/ das Gott den sundern gnedig ist/ vnd  
gonnet yhn keyn guts / sondern eyttel vnglück widder die  
art der liebe / wilche auch den feyn den alles guts wunscht  
vnd thut / Vnd das noch mehr ist / das er solchs thut / nach  
dem er den grossen ernst göttlichs willens erfahren hatt ym  
meer vnd walfische. Dazu lest er noch nicht abe/ da yhn Gott  
dumb straffet / das er vnbillich zürne / Vnd stehet doch da  
neben auff solchem grossen glauben / das er Gott vmb den  
tod bittet/ vnd wil nicht leben/ Wilches er nicht kunde bitten  
wo er nicht Gotte auff's aller hohest vertrauet hette / Was  
wollen wyr hie zu sagen? Wie kan solcher glaube vnd solche  
vntugent bey eynander stehen? Hie solte man fragen/ da were  
nüz an. Leucken mügen wyr nicht / das Jona vnbillich zür  
net vnd

R ij

net vnd

net vnd vnrecht thut / weyl Gott yhm darumb strafft / beyde mit Worten / mit that vnd mit eym zeychen der wilden ruben / So müssen wir auch bekennen / das er sey ym glauben vnd Gott angenehme gewesen / weyl Gott so freundlich mit yhm redet / vnd eyn zeychen gibt / vnd sich stellet wie eyn mensch / der mit seynem nehisten freundlich redet vnd handelt.

Vnd wenn yhm solchs alles were zu schencken / so ist doch das ia vber die masse / das er gleich seinen ersten vngeschoriam vnd flucht / daruber er so greulich gestrafft ist / aller erst wil billichen vnd vertheydingen vnd die schuld Gottes güte zu rechen / da er spricht / Ach herr das ist / das ich sagte / da ich noch ym meynem lande war darumb ich auch wolte zumor komen / auff's meer zu fliehen. etc. Was ist doch das anders gesagt / denn so viel / Ich thet recht daran das ich flohe vnd nicht hieher wolte / vnd ist deynes güte schuld / ist schuld da? Was sucht Jona damit? Trotz er nicht Gotte? Ringet er nicht darnach / das er auff's new ym tausent meer vnd walffische geworffen werde / als der widder Gotts güte murret vnd sich selbst rechtfertiget? Wenn solchs Saul odder etwa eyn ander thet / was solt yhm wol begegennen? Solten werck bey Gott gelten odder entgelten / so müste Jona hie ym abgrund der hellen faren / als der mit seinem zorn widder glauben vnd liebe ganz halstarriglich tobet / Denn Gotts güte schuldigt er / vnd vergonnet seynem nehisten gnade vnd alles gut / Sind das gute werck? ia ist da nicht alle vntugent / was ist denn vntugent? Ich wüste schier nicht / was ich hie solt antworten.

Das erste ist aber / das wir hie mercken / wie gar wunderbarlich Gott ym seynen heyligen ist / auff das niemand leicht fertig sey / yemand vmb eyniches wercks willen zu richten odder zu verdamnen / Das werck mag böse seyn vnd ist auch böse / noch solich die personen nicht verachten odder verwerffen / Denn so wir hie Jona an sehen / so ist warlich seyn werck vnrecht /

vnrecht/ als da gott selbst strafft/ Noch ist er das liebe kind/  
vnd redet mit Gott so frey/ als fürchte er sich nichts für yhm/  
(wie es auch war ist) vnd trawet yhm als eynem vater. Das  
ander/ das wyr lernen/ wie Gott seyne liebe kinder lest/ gute/  
grosse/ grobe stücke narren vnd feylen/ wie Christus auch mit  
den Aposteln thut ym Euangelio/ zu trost allen gleubigen/ so  
zu weylen sundigen vnd fallen. Das dritte/ das wyr sehen/  
wie gar/ freundlich/ veterlich vnd lieblich Gott mit denen  
handelt vnd umbgehet/ so yhm vertrauen ynn nöten/ wie  
lieb der vater wird nach der ruten vnd staupe/ als die Epistel  
zu den Ebreern sagt/ das die zucht die allerlieblichsten frucht  
bringt/ denen die drynnen geubt werden/ Denn hie siehestu/  
mus das gar nichts schaden noch zur sünden gerechnet wer-  
den/ das doch warhafftig sünde vnd strefflich ist/ Sondern  
ist eyne tegliche Kindes sünde/ die der vater williglich vnd güt-  
tiglich tregt. Aber mit den gottlosen gehet er nicht so umb/  
sie können sich auch nicht dreyn schicken/ sondern werden  
ganz vnd gar zu frech vnd zu wilde/ wo sie fulen/ das Gott  
gnedig ist vnd schonet/ gerade als solt er auch yhr gottlos  
wesen yhm gefallen lassen odder dulden.

Es ist aber nicht wunder/ das Jona nicht wil den Hey-  
den gotts gnade gönnen/ Denn rechen du selbst/ Es war bey  
den Juden eyn bestendiger glaube/ das alleyne Israel Gottes  
volck were/ wie ich droben auch gemeldet habe/ vnd alle heys-  
den vnter gotts zorn/ wie der vers psal. lxxviij. lautet/ Herr  
schütte deynen zorn vber die heyden die dich nicht kennen/  
vnd vber die königreiche die deynen namen nicht anruffen.  
Darumb stunden sie drauff/ das keyn mensch solt gotts gna-  
den teylhafftig werden/ er müste zuvor Moses gesetze anneh-  
men vnd Jude werden/ Denn es die Apostel vnd ersten Chris-  
ten anch nicht anders verstunden/ wie Luca Act. viij. schre-  
ybt/ das sie umbher giengen vnd predigeten das Euange-  
lion niemands denn den Juden alleyne/ vnd zurneten mit S.  
K iij Petro/

Petro / das er den Heyden hatte gepredigt Act. x. vnd xi. Vnd  
ist Jona nicht von den Juden drumb verfolget odder getödt  
tet / das er zu Nineue predigt den Heyden vnd Nineue cyne  
stad Gottes nennet / so sols eyn gros wunder seyn / Denn es  
war den Juden vnleydlich / das eyn volck Gottes solt etwa  
seyn vnd nicht Mose gesetz haben vnd halten / wie hie die Ni  
neuiten von Jona gepreyset werden. Was müssen die izt vnd  
allzeyt warten / die da leren / Es seyen etwa Christen vnd mü  
gen Christen seyn / die doch des Papsts gesetz vnd Römi  
scher Kirchen weyse vnd gebot nicht haben noch halten : All  
zumal Kezer Kezer vnd verbrand.

Vnd möcht wol seyn / das dis sey die rechte ursache / war  
umb Jona nicht wolte gen Nineue vnd noch murret / das sie  
nicht vntergehet / vnd lieber tod were / denn das er das sehen  
sol / das yemand gotts gnade kriege vnd Gottes volck werde  
on gesetz Mose vnd der Juden weyse. Was ist das anders /  
denn eine schande dem volck Israel / als die vnnötige vnd ver  
gebliche gesetz haben / so wol on die selbigen die menschen mü  
gen selig werden : Solten sie hie nicht sagen : Was machen  
wyr denn mit so grosser mühe vnd erbeyt / so diese letzten nur  
eyne stunde erbeyten / vnd kriegen gleichen lohn mit vns / die  
wyr des tages hitze vnd last tragen / wie ym Euangelio steht :  
Solt das nicht schele augen machen : Solten sie nichts bes  
ser seyn : Solte sie nichts mehr kriegen : Eben so gehets hie  
auch zu / das die Nineuiten gnade erkriegen on gesetz vnd  
propheten / Vnd die Juden mit yhres grossen erbeyt ym ge  
setze / nichts mehe kriegen denn sie / ia auch zu letzt der gantz  
lich feylen vnd mangeln / da sie mit yhrem murren vnd schel  
sehen / etwas bessers wollen denn das Euangelion haben /  
vnd den Heyden nicht gonnen wolten Christen zu werden.  
Solchs hat müssen Jona gantz vnlustig machen / als der  
solchs alles eyne ursache ist mit seynem predigen zu Nineue /  
vnd er solte der erste seyn / der das Judenthum verachtlich  
vnd vnnötig



vnd vnnötig machete: wie hette er thüren ym lande bleyben?  
Er hat nicht on vrsache geflohen vnd sich gewegert solcher  
predigt/ Denn ein Jude sein/ vnd doch predigen/ das Judens  
thum vnnötig sey/ vnd on das Gotts gnade wol zu erkriegen  
sey/ das ist eben so viel / als wolt ein Jude seyne eygen Juden  
zu nichte vnd vnnütze machen vnd die heyden erheben/ gleich  
wie es S. Paulo auch gieng ynn gleychem fall / wie Luca bes  
schreybt ynn Actis.

Das nu Jona gestillet würde/ vnd auch hett / das er  
seynen zornigen Juden darauff antwortet / spielet Gott mit  
yhm vnd gibt yhm ein zeychen/ gleich wie er Petro thet/ Act.  
.x. da er auch gleich ynn Jona meinunge stund / Vnd gab  
yhm ein gesichte vom hymel/ ein leynen tuch mit allerley thies  
ren / vnd sagt zu yhm / Es were alles rein / So es doch eytel  
heyden waren / on gesetze Mosi etc. Also gibt Gott hie Jona  
ein zeychen / vnd lies eine wilde rube wachsen / das Jona  
eine lustige lauberhütte dran hatte. Da er nu sich wol frewete  
solcher hütten/ verschaffte der herr einen wurm früe morgens  
das sich Jona nicht versach/ der stach die wilden rube/ das  
sie verdorret vnd beraubt den guten Jona seiner lust/ Dazu lis  
es er yhm die heysen sonne auff den kopff stechen/ da er keine  
hütten mehr hatte / also das er abermal vnlustig wird / vnd  
schlecht eine vnlust zur andern / vnd wil nyrgent gehen / was  
er gerne hette. Darumb bittet er abermal vmb den tod / das  
er der vnlust abkeme. Da kompt nu Gott/ vnd stillt yhn vnd  
schleust/ das er müge thun was er wil/ wie der haus vater ynn  
Euangelio sagt / Beweyset auch / das Jona vnbillich zürne/  
Sibe/ spücht er/ Du zurnest vmb einen geringen strauch/ das  
der selbige nicht blieben/ sondern verdorret ist/ Wie viel weni  
ger ist aber ein solcher strauch / denn ein mensch / schweyge  
denn eine solche stad? Soltestu denn nicht auch wunschen  
vnd gerne sehen/ das die stad bliebe/ der du die wilden rube so  
gerne sehest bleyben? Was kondte Jona hie widder sagen? Er  
müste verstummen/ als mit seinem eigen vireyl vberwunden/  
Dareyn

Dareyn er fein gefuret ward vber der wilden ruben / ehe er sich  
vmbfah. So gar ifts nichts / menschliche wize gegen Gott.

Vber der wilden ruben / die auff Ebreisch Kik / vnd hie  
Kikaion / das ist ein Kiklin odder Kleyne Kik heyst / haben vorzey  
ten die lerer sich wol versucht / Die eltesten habens einen Kurbis  
bis genand. Darnach ist S. Hieronimus komen / vnd verdol  
medschd es hedara / das ist / Ephaw / vnd spricht / es sey nicht  
ynn latinischem lande / sondern ynn Syria / Es sey aber ein  
solcher strauch / der seer schwinde wechset vnd bald so gros  
wird / das er eine hütten gibt vnd dicken schatten / hat bletter  
wie weinreben / Daher es die alten villeicht Kurbis haben wol  
len machen / Wyr achtens dafur / Es sey der strauch / den die  
natur kündigen auff latinsch vitis alba nennen / wilchs deud  
sch heyst / Wilderuben / Unser pfarherr Er Johann Pomer  
meynet / Es heysse bey seynen Pomern heylige wurzel / vnd  
wachse so gros / das vber ein haus hin gehe / wilchs der nacht  
schatten ehlicht. Denn Ephaw / wie es Hieronimus macht /  
Kans nicht wol sein / wie er selbst bekennet / weyl der selbig  
pusch nicht auff seynem stengel stehet / wie Kikaion thut / son  
dern henger sich an mauren vnd bewime / das die viel nehr ha  
ben troffen / die es Kurbis haben gedeutet / wie wol Hierony  
mus yhr spottet / vnd sie Kurbisser nennet.

Vu es ligt nicht so grosse macht dran / vnd sollen vns  
nicht so fast vmb die wort haddern / wenn wyr des dinges  
gewis sind / Das ist war / das dieser strauch / wie wol er von  
natur selbst schwinde wechset / so ist er doch hie yn einer nacht  
bereyt worden wunderlich / vmb Jona willen / Vnd Jona  
hat lange drunder gefessen / villeicht bis die vierzig tage vmb  
gewesen sind / Denn der text spricht / Er sey zur Stad aus  
gangen / da er sahe / das sie sich bekereten / vnd hat sich gesetzt  
zu sehen / ob die stad würde vntergehen. Denn es verdros yhr  
schon bereyt / das er sie sahe busse thun / vnd hatte wol sorge /  
sie wurde

sie würde nicht vntergehen / Aber nach den vierzig tagen  
da er sahe / das die bestympte zeyt fur vber war / hebt sich sein  
zorn / das nichts aus seiner predigt solt werden / Da murret er  
widder Gott / vnd mus sich meystern lassen / vnd also mit  
schanden vnd gedemütiget widder heym zihen / doch mit  
grosser frucht vnd nutz seyns verstandes.

Aus den allen lernen wyr / wie Gott eyn helffer ist aller  
menschen / nicht alleyn der Juden / wie S. Paulus spricht. 1.  
Timo. ij. Gott wil das alle menschen genesen vnd zum erkent  
nis der warheyt komen. Vnd das wyr heyden / als die zur lezt  
ten stunde komen sind vnd gar nichts geerbeytet / gar vnwir  
diglich zu Gottes gnaden komen / weyl vns die selbige nicht  
ist verheysen gewesen / wie den Juden / Gott wolte / das wyr  
danckbar weren / vnd machten vns die selbigen nütze / wie  
diese leute zu Ninue gethan haben / Auff das wyr nicht auch  
zu lezt / durch vndanckbarkeyt erger vmbkemen / wie denen  
zu Ninue hernach geschach. Denn diese geschicht Jona ist  
drumb geschrieben / das Gott vns zeyge seyne wunder / nem  
lich / das sein wort da am aller ersten frucht schafft / da mans  
am wenigsten meynet. Widderumb / da am wenigsten schafft  
da mans am meysten sich versihet / Denn hie glauben die heys  
den zu Ninue die keyn wort zuvor hatten / Vnd die Juden  
werden vngleubig / die teglich gottes wort hatten. Auff das  
wyr an niemand sollen verzweyffeln / auch widderumb auff  
niemand vns vermessen.

Er spricht hie / das zu Ninue sey mehr denn hundert  
vnd zwentzig tausent menschen gewesen / Daraus man kan  
abnemen fast hynbey / wie gros die stad gewesen ist / Denn  
weyl er nennet hundert vnd zwentzig tausent vnd ettliche zal  
döber / zeygt er gnug an / das nicht hundert vnd dreyszig tau  
sent darynnen gewesen sind / Denn er hette sonst wol gesagt /  
mehr denn dreyszig odder vierzig tausent / odder zweyhundert  
tausent /

tausent/ Tu ist's noch nicht vber alle masse eine grosse stad/  
da zweyhundert tausent menschen ynne sind/ sonderlich wo  
sie wol steht vnd ym schwang gehet/ wie hie Cincue/ als die  
königliche stad/ stund/ das heubt ym keyserthum zu Assyrien.  
Es were denn/ das man es so deuten wolt/ das der mensch  
en/ die nicht wusten was recht odder linck were/ solte so viel  
gewesen seyn/ als iunge kinder vnd narren/ Der alten leute  
aber sey viel mehr gewesen. Aber solche deutunge halt ich  
nicht/ sondern/ das sie allzu mal nicht haben gewust/ was  
linck odder recht sey/ das ist/ wie wyr sagen/ sie wusten wid  
der dis noch das ym göttlichen sachen/ als die keyn geset  
Mosi noch Propheten hatten/ wilche sie hetten geleret wie  
sie solten beyde ym geystlichen vnd leyblichen/ ym eusserlich  
en vnd ymnerlichen dingen fur Gott sich halten/ wie die Ju  
den hatten/ Denn so mag man die rechte deuten auff's geyst  
liche ymwendig/ vnd die lincke auff's leybliche eusserlich/  
Denn man Gott mit leyb vnd seele dienen mus. Das sey da  
von gnug. Tu müssen wyr auch die geystlichen deutunge  
handeln/ der sind drey.

## Die Erste.

Jona heyst auff Ebreisch eine taube/ Tu ist ym newen  
testament die taube des heyligen geysts gestalt/ Luce. iij. vnd  
Johan. ij. vnd sonderlich der offenberlicher heyliger geyst/  
wilcher gegeben ist/ Christum ym aller welt durchs Euan  
gelion zuverkündigen/ Also das Jona mit seynem namen ein  
furbilde ist des heyligen geysts vnd seynes ampts/ nemlich  
des Euangelij/ Das alle Apostel vnd prediger sollen auch Jo  
na seyn/ vnd die taube/ das ist/ den heyligen geyst haben/ vnd  
nichts von sich selbs on den geyst leren odder thun/ wie auch  
Christus selbst Matthei. x. seinen iungern befilht/ das sie sol  
ten seyn on falsch/ wie die tauben/ vnd fürsichtig wie die  
schlangen/ das ist/ das sie das wort gotts lauter vnd reyn/ on  
allen zusatz/ einfeltiglich leren/ wie es der geyst gibt/ Vnd mit  
niemand

niemand felschlich vmbgehen/ ynn wercken so wol als ynn  
der lere. Eine heyst auff Ebreisch die schöne odder hübs  
sche/ wie eyne hübsche wolgebawete stad schön ist. Das ist  
die welt/ so ynn yhrem reichthum/ wollust/ weysheyt/ stercke/  
heylickeyt vnd ehren lebt vnd schwebt auffss aller schönest  
vnd feynest. Aber da ist vnter eytel gewel vnd sünde für  
Gott. Das sie nu das wort höret vnd annympt/ fastet vnd  
secke an zeucht vnd ynn die aschen sich setzt/ Deutet/ das  
Gotts wort frucht bringet/ vnd kret alles vmb/ vnd macht/  
das sie yhre heylickeyt/ stercke/ reichthum/ lust/ ehre vnd gut/  
für sünde/ schwachheit/ armut/ vnlust/ schande vnd schaden  
helt/ vnd alles veracht/ Das heyst recht ynn der aschen sitz  
en/ secke an zihen vnd fasten/ also das auch die thiere/ das ist/  
yhre leychnam müssen fasten vnd secke an haben/ das ist/ sich  
kasteyen vnd züchtigen.

Das auch Jona aus dem Judischen lande so ynn ein  
frembd land gesand wird/ bedeut/ das der geyst vnd Gottes  
wort solte von dem Judischen volck genomen/ vnd den  
heyden gegeben werden/ wie Christus sagt/ Matt. xxiij. Ich  
sage euch fürwar/ Das reich Gottes wird von euch genomen  
werden vnd den heyden gegeben werden/ die frucht damit  
schaffen etc. Das er aber fleucht vnd ym meer solche fahr ley  
det/ bedeut/ das creuz vnd verfolgung so dem Euangelio  
ynn der welt widderferet/ das sichs anleest/ als fliehe das Chri  
stliche predig ampt vnd wolle vntergehen vnd verloren sein/  
so gar schwach scheynet es gegen solchem wesen/ vmb des  
willen/ das die personen die es furen/ flüchtige/ das ist/ schw  
ache geringe menschen sind/ das meer/ das ist/ die welt/ ist  
gros vnd mechtig mit yhrem wüeten vnd toben. So ist der  
walfisch grausam vnd erschrecklich mit seinem rachen vnd  
zehen/ das ist/ der welt furst vnd gott/ der teuffel/ ist grausam  
durch seine fursten vnd grosse herrn/ mit würgen vnd tödten  
ect. Aber doch wird Jona erhalten mechtiglich durch Gottes  
krassste vnd kan seine predigt widder durch seine eygen flucht  
L ij noch

noch durch des meeres toben verhindert werden. Sondern dringt fort vnd kompt doch gen Tineue. Also ob wol die prediger schwach / die welt gewaltig ist / so ist doch Gotts wort das heylig Euangelion mechtiger / dringt durch vnd ist ungehindert / Vnd wenn gleich die prediger alle verschlungen werden / gehet es nur deste stercker vnd kompt doch ynn die welt vnd keret sie umb / wie wyr sehen / das an den Aposteln ergangen ist / Vns zu trost / das wyr auch nicht erschrecken für dem meer vnd walfisch / gewis / das vnser wort odder Euangelion mechtiger ist denn das alles.

### Die andere.

Ist von geystlicher verfolgung / wie es mit eym sunder zu gehet / wenn er geystlich stirbt vnd lebendig wird / das ist / wenn er sol gerecht vnd von sunden los werden / Das gehet also zu. Das erst ist die sünde / dareyn wyr alle sind gefallen durch Adams ungehorsam / vnd haben die selbige erger vnd grösser gemacht / durch vnsern eygen ungehorsam / vnd sind also von Gottis angesicht geflohen / das wyr nicht thun / was Gott wil / Vnd sonderlich / wenn Wyr ynn die schöne sünde fallen / das ist ynn heuchley vnd falschen Gotts dienst / vom rechten Gotts wort. Das ist der ungehorsam vnd das fliehen Jona von Gottis angesicht / Denn weyl wyr ynn sunden sind / sehen wyr Gott nicht vnd sind ferne weg / wie der verlorn son ym Euangelio. Das er aber auff's meer fleuhet vnd an keynem gewissen ort / bedeut / das der sunder so er von Gott fleuhet / nyrgent gewisses furnympt / sondern gehet vnd feret nach dem fleysch vnd der welt / wo der teuffel yhn hyn furet vnd treybt / fragt auch nicht darnach / wo er hyn kömet / on allein / das er nicht durffe ym lande vnd vnter Gotts gehorsam seyn / sondern seynem gutdunckel folge.

Er kompt aber hynab gen Tapho vnd find ein schiff das auff's meer feret / gibt sehgelt vnd trit dreyn / legt sich / schlefft vnd feret so dahyn. Tapho heyst hübsch odder feyn / das ist /

Das ist/ der gottlose hauffe/ die do ein gleiffend leben furen  
ynn gotts vngheorsam. Diese stad ist denn eben recht fur  
den vngheorsam / gutdunckel vnd eygen erwelte gerechtigkeit/  
Denn da find er eyn schiff/ das ist/ als yhn dunckt/ eine  
gute weyse vnd lere/ die yhn solle furen/ als da ist/ das geseze  
Gotts/ auff menschlichen dunckel verstanden/ Da sind schiff  
männer / das ist lerer solchs gesez vnd eygener werck/ vnd  
furen/ das man nicht weys wo hyn/ sondern nur auffs mehr/  
Denn da ist keyn gewis noch sicher gewissen fur Gott/ son-  
dern feret/ wie das mehr geht. etc. Diesen gibt Jona fehzgelt/  
Denn solche lerer sind bauchdiener/ vmb gelt leren vnd furen  
sie/ man gibts yhn auch gerne vnd macht sie reich/ Gleich wie  
Gott dem volck Israel das land Canaan gab auch vmb yhre  
werck. Aber den Aposteln vnd Euangelisten gibt man nichts  
sondern nympt yhn wol dazu was sie haben. Da tritt Jona  
ynn das schiff vnd gibt sich ynn die lere/ ligt vnden ym schiff  
vnd schnarckt/ Das ist/ er ist sicher vnd meynet er sey nu wol  
dian/ vnd feret ynn dem wesen ymer hyn/ wie denn thun alle  
werckheyligen/ die ynn yhrem gleysen so tieff drunden liegen  
vnd schlaffen vnd fulen nicht/ was vbels sie thun/ wie Salo-  
mo sagt Eccle. Gehorsam ist besser denn der gottlosen op-  
ffer/ die nicht wissen was vbels sie thun. Sibe da / das heyst  
wol hynab gen Japho vnd hynuntern ynn das schiff gehen/  
freylich hoch erab von Jerusalem/ von gotts gehorsam ynn  
die tieffe des vngheorsams vnd eygen dunckels.

Aber da kompt nu Gott vnd wil den vngheorsamen  
heyligen auffwecken vnd seyne heyligkeit offentlich zu sunden  
machen/ vnd lest ein wetter komen/ das ist/ seinen zorn vnd  
gericht lest er fulen/ Da gehet denn vnter alle eygene heylig-  
keit/ Da verzweyffelt denn beyde lerer vnd schüler/ vnd wol-  
len die werck denn nicht halten noch bestehen/ Da wil das  
schiff zu brechen vnd vnter gehen/ Da rufft ein iglicher seynen  
Gott an/ das ist/ wil sich trösten seynes guten lebens/ Aber

L iij Da höret

Da höret vnd hilfft der gözen keyner/denn des rechten gotts  
kennen sie nicht/ Da wecken sie Jona auch auff/ das ist/ da  
werden sie rechte gesetz lerer/ da kompt das gesetz zu seynem  
rechten ampt/ vnd leret nicht mehr werck noch falsche gewis  
sen/ sondern zeygt sunde vnd gotts zorn vnd erschreckt das  
gewissen/ Das ist/ da sie lossen vnd die sunde suchen/ vnd  
treffen Jona. Denn das gesetz lest nicht abe zu suchen vnd zu  
martern das gewissen/bis es den sunder finde vnd zwingt zu  
bekennen/wie David spricht psalm. xxxvij. Da ichs schwey  
gen wolt/veralteten meyne gebeyne. etc. Das lossen aber be  
deut/das sich die sunde findet vngesehr/ vnd das gesetz vns  
eriffet/nicht wenn wyr meynen/ sondern wenn wyr am we  
nigsten gedenccken/so kompt der hausvater vnd findet vns/  
Da mus Jona eraus vnd dem gesetz bekennen vnd recht ge  
ben/wie er eynt sunder sey/sonst (spricht er) höret das meer  
nicht auff. Vnd wie wol sie seer treyben vnd rudern/das sie  
zu lande möchten komen/hilffts doch nicht/Das ist/wie wol  
ein solch gewissen vberwunden ist/noch wils nicht gerne das  
vrt Eyl des tods leyden/obs wol bekennet/es solle vnd müsse  
es leyden vnd habs wol verdienet/dumb springt Jona nicht  
selbst vns meer/sondern wird hyneyn geworffen.

Zu lezt werffen sie Jona vns meer/weyl es nicht anders  
seynt wil/bitten aber Gott/das ers yhn nicht zurechne/ vnd  
furchten vnd dienen Gotte/das ist/wie S. Paulus sagt Ro.  
vij. Das gesetz ist gut/ frum vnd heylig/ vnd tödtet gleich  
wol vnd macht myr Gott zornig/Da von izt nicht weyter zu  
sagen ist. Das sie aber nu Gott furchten vnd dienen/bedeut/  
das das gesetz/ wenn es zu seynem rechten ampt kompt/so  
dient es Gott/das ist/ es macht furchtsame/ demütige die  
ner Gottes/wilchs zu vor/da es zu Japho noch war/ynn mis  
brauch der werck vnd des gutduncfels/dient es dem bauch  
vnd nam sehr gelt/ vnd macht schnarkende/ sichere/ falsche  
werck heyligen. Zie kompt nu der walfisch vnd verschlinget  
Jonas



Jona/das ist der tod vnd die helle/Denn so gehts nach eyn  
nander/zu erst das gesez/darnach die sunde/zuletzt der tod/  
wie S. Paulus sagt.i.Cor.xv Das gesez ist der sunden krafft.  
Der tod aber der sunden stachel/Das ist/wo nicht sunde wes  
re ym gewissen/da künde der tod nichts thun/widder steche  
en noch hawen/widder wurgen noch martern/hette widder  
spitzen noch schneyden/Sondern were stumpff vnd nichts/  
Wenn aber sunde da ist vnd gefulet wird ym gewissen/so  
bald hat der tod spies vnd schwerd/vnd wil den menschen  
schlechts erwurgen/vnd erwurget yhn auch/wo yhm nicht  
hulffe geschicht. Also auch wo keyn geseze nicht were/  
das ist/wo es nicht eyn recht gesez vnd ym seyn rechten  
ampt gienge/da were auch keyne sunde/das ist/man fulete  
die sunde nicht/vnd die sunde were krafftlos vnd bisse nicht/  
wie sie thut/wo die Jona schlaffen ym schiff vnd die sichere  
werck heyligent/Wie es denn auch ym der natur ist/das wo  
kein gesez ist/kein sunde sein kan/Aber wenn das geseze  
kompt/so balde ist die sunde da/vnd fulet sich ym gewissen/  
Wie greulich nu der walfisch mit seym rachen dem Jona  
gewest ist/so greulich ist des tods dreyen ym eym sundigen  
erschrockenem gewissen.

Da stirbt nu Jona drey tage vnd nacht ym walfische/  
Das ist/der sunder ligt ym solchem schrecken vnd tods nöts  
ten vnd ringt mit dem tod/bis er gar verzweyffelt/Denn yns  
wendig drey tagen kan man wol spüren/ob eyner tod sey/  
Vnd wer den dritten tag erreicht ym tod/da ist keyne hoff  
nung mehr/wenn er gleich nicht ganzer drey tage lege/das  
ist wenn er vber ein ganze nacht vnd tag ligt/so ist er dahyn/  
Denn der selbige mag wol eyne stunde des vorigen tags vnd  
eine stunde des folgenden tages erreichen. Solche drey tage  
sind nicht lang ym diesem geystlichen sterben/Denn es ist  
bald geschehen/das yhn der tod vnd angst yns verzweyffeln  
treibt. Darnach kompt das lebendige Gotts wort/das

L iij Euangelion

Euangelion der gnaden/ vnd spricht zum fische/ das ist/ es  
gepeut dem todte/ das er den menschen lebendig lasse. Da ge-  
het der glaube an vnd wird der mensch/ beyde von sunden  
vnd tod ledig vnd los/ vnd lebt also ynn gnaden vnd gerech-  
tigkeit mit Christo. Da lernt nu Jona das stücklin singen/  
Ich wil mit danck opffern. etc. vnd schilt die ienigen/ so sich  
auff eytelkeyt verlassen/ vnd achten der gnaden nicht/ Denn  
solche leute erfahren/ das werck vnd gesetz leben/ eytel vnnütze  
ding sey/ vnd alleyne gotts gnade helfen mus/ Vnd so wer-  
den dem leute draus/ die grossen nutz ynn der welt schaffen/  
denn sie können recht leren/ radten vnd regiern/ weyl sie es  
nicht alleyne aus den büchern odder Worten/ sondern aus  
dem geyst vnd eygen erfahrung haben/ Da schneyt denn vnd  
ist kressrig/ was sie leren/ wie Jona hie mit seyner predigt zu  
Nineue bedeutet.

### Die dritte.

Hat Christus selbst auff sich gedeutet Matth. xij. wie  
wol es nicht eyne ganze allegorey odder deutunge ist/ son-  
dern ein beyspiel/ Denn Christus nympt Jona alleine fur sich  
wie er ym walfisch ist gewesen/ vnd spricht/ er werde eben al-  
so auch ynn der erden tod liegen/ vnd nennets ein zeichen Jo-  
na/ das ist/ eyn zeichen das Jona gleich sey/ Denn er macht  
die drey tage nicht geystlich/ wie sichs gepürt ynn geystlichen  
deutungen/ drum ist ein gleichnis mehr denn eyne allego-  
ria/ vnd niemand thürste es so deuten/ wo es Christus nicht  
selbst hette gethan. Tu dauon ist hie nicht viel zu reden/ weyl  
es alles selbst am tage vnd ynn aller welt bekand ist/ wie Chri-  
stus gestorben vnd auffgestanden ist/ Vnd solchs das wun-  
der zeychen sey/ das den vnglaubigen Juden gegeben ist/ ia  
aller welt furgetragen wird durchs Euangelion/ auff das sie  
wissen sollen/ wie sie alzumal durch das selbige wunder zeych-  
en vnd trefflich göttlich werck/ erlöset sind/ vnd dran sich  
halten sollen mit rechtem glauben. Es stößet sich aber die  
ganze

gantz welt an dem zeychen / sonderlich die Juden / vnd ist  
yhn ein ergernis vnd thorbeyt / Aber es mus gleichwol sein /  
yhn wird doch keyn anders / wie sie gerne wolten / Denn da  
stehets / wie Christus sagt / Dieser bösen art wirt keyn ander  
zeychen widderfaren / on das zeychen Jona des Propheten /  
Dauon ist auch anderswo weytter gesagt.

Zu letzt ist da die wilde rube mit dem wurme der sie sticht  
ym morgen rödte. Die geschicht reymet nicht alleyne  
auff Jonas zorn vnd gedanken / wie der text lautet / sondern  
auch auff das Judenthum / wilchs ist eyne rechte wilde rube  
gewest. Erstlich / grosse bletter hat sie / das ist das beste dian /  
dauon Jona feynen schatten hat vnd eyne hütten drunder  
hat / widder der sonnen hitze. Aber nichts wird da gemeldet /  
vnd ist auch nichts da von fruchten. Die bletter sind die wort  
vnd Gotts geseze / wie S. Paulus sagt Ro. iij. Gottes rede  
sind yhn vertrawet gewest. Vnter diesen blettern sitzt Jo-  
na / das ist / die propheten vnd heyligen veter sind vnter dem  
Judenthum gessen / als vnter eyner zeytlichen hütten vnd  
eusserlichem gotts dienst / bis auff Christum / Denn es war  
eyne sommerleube odder lauberhütten / die zeytlich war / vnd  
auff hören solte. Aber fruchte trug es nicht / Denn das geseze  
on geyst / kund von sich selbst niemant helffen / Wie wol viel  
solcher heyligen leute ym geyst drunder waren / Darumb auch  
Christus den feygen bawm mit den blettern on frucht ver-  
flucht das er verdurret / wilchs eben ein ding ist mit dieser  
wilden rube. Doch frewet sich Jona solcher lauberhütten /  
vnd wartet auff verberben der stad Ninene / Denn es gefiel  
den Juden wol vnd rhümeten sich auch / das sie alleine solten  
Gotts wort vnd gotts dienst haben / vnd hielten die heyden  
allzumal verloren / gleich wie Jona hie die Nineuiten helt.

In dem sie nu sich auff sicherst darauff verlassen / das  
sie alleyne gotts volck seyen / vnd gleich der Jona am frölich-  
sten ist

sten ist vber solcher wilden ruben / verschafft Gott eyn wurm  
lin / das die wilden ruben sticht / Das ist / Christus kam eben  
mit seynm Euangelio / da die Juden am aller meysten stolz  
waren / das sie gotts volck alleyn were / vnd stach die wil  
den ruben / das ist / predigt dawidder / vnd hub das geseze  
auff / durch seynen heyligen geyst / vnd macht vns alle frey  
vom geseze vnd seiner krafft. Daher ist verdorret vnd zu nichte  
te worden das Judenthum / bis auff diesen tag / ynn aller  
welt / vnd grunet noch blühet nicht mehr / Sitzt auch kein  
heylige noch prophet mehr vnter seynem schatten / Es ist  
aus mit yhnen. Denn Christus ist ein wurm / wie er sagt. psal.  
xxi. Ich bin ein wurm vnd nicht ein mensch / nemlich dar  
umb / das er so iemerlich gecreuzigt vnd verachtet ist. Aber  
doch sticht der arme gecreuzigte wurm / einen solchen seynen  
strauch das er verdurret / vnd macht mit dem geringen stich /  
das ist / mit dem verachten Euangelio / eyn solch seyn reich  
vnd volck zu nichte.

Das aber der wurm nicht des abends / sondern frue mor  
gens / da die morgen rotte anbricht / den schaden thut / bedeut  
das solcher fall des Judenthums sey geschehen / da die  
zeyt der gnaden / das newe testament auff gieng / durchs E  
uangelion ynn aller welt / Denn der die wilden rube hatte las  
sen wunderbarlich wachsen / der selbige lies sie auch durch  
den wurm stechen vnd verdurren / Also / das Judenthum  
gieng auch schnell auff durch grosse vnd manche wunder  
that / aus gotts gewalt / nicht aus yhrer eygen krafft noch  
macht / wie das die historien wol weysen zum zeyten Mose  
vnd aller Könige. etc. Eben so ist auch verdurret vnd vnter  
gangen aus gotts willen vnd befehl / da das stundlin des E  
uangelij kam. Hie murret nu Jona / aus zwo grossen vsachen.  
Eyne / das die wilden ruben verdorret vnd nicht mehr vnter  
yhem schatten sitzen mag / Die ander / das Clineue nicht sol  
vntergehen / das ist / es war yhe vnbillich anzusehen auch fur  
ettlichen

etlichen grossen heyligen/ das die Juden solten so verlassen  
werden / vnd verdurren vnd versiegen/ Vnd die Cincuiten  
die heyden solten das Euangelion annemen vnd gotts volck  
werden/ da sticht die sonne Jona heys auff den kopff/ vnd  
kompt ein durrer ostwind/ das er matt wird/ Denn auch S.  
Paulus Ro. x. sich hoch bekümmert/ das die Juden so verder  
ben/ vnd wolte gerne verbannet seyn von Christo vmb yhren  
willen. Aber yhm wird geantwortet / Es were billicher zu  
zurnen das Cincue solt vntergehen denn das die wilden rube  
verdurret/ vnd billicher Cincue bliebe denn die wilden rube/  
Das ist/ wie S. Paulus. Ro. xi. sagt/ Aus der Juden verder  
ben kompt der heyden heyl / das ist / Besser vnd billicher ist  
das das Judenthum vergienge ( wilchs doch on geyst / kein  
nütze / vnd eytel bletter war on frucht ) denn das durch yhr  
bleyben/ die ganze welt verdörbe. Das vitayl gefiel Gott vnd  
ist auch recht / das wyr heyden wol mügen dancken seyner  
gnaden / Denn den Juden / so sie wolten auch gleuben vnd  
das Judenthum faren lassen / geschehe damit kein schaden/  
vnd vns doch alle selickeyt dran ligt. Dazu helff vns Gott.

A M E N.

Gedruckt zu Wittenberg.  
Michel Lotter. Im  
M. D. XXVI. Jar.

Faint, illegible text, likely bleed-through from the reverse side of the page.

Gebruckt zu Wittenberg.  
Büchel Nummer 311  
M.D.C.XXVI.



Thomas ...

1.5.2.0

46493


AB 46493

ULB Halle 3  
 004 068 718




55









2